


ॐ

अच्छिद्रम् - अश्वमेधम्

ACCHIDRAM - ASVAMEDHAM
Sanskrit



Published by

R.S.VADHYAR & SONS

Book Sellers & Publishers

**KALPATHI, PALGHAT .678 003
SOUTH INDIA.**

2009

Rs. 80/-

SANSKRIT MADE EASY SERIES

A Reformed Series of Four Illustrated Sanskrit Readers

Infant Reader	संस्कृत बालादर्शः	23.00
Reader I	संस्कृत प्रथमादर्शः	20.00
Reader II	संस्कृत द्वितीयादर्शः	20.00
Reader III	संस्कृत तृतीयादर्शः	25.00

USEFUL GRAMMAR BOOKS FOR STUDENTS

Easy Texts on Sanskrit Grammar - संस्कृत व्याकरण ग्रन्थाः

1. शब्दमंजरी Declension of nouns - तिङन्त-अव्यय-समास
प्रकरण-शब्दार्थकोश सहिताः Enlarged Edition 35.00
2. धातुरुपमंजरी - Conjugation of Verbs-Deals with
500 most common roots 30.00
3. संस्कृत व्याकरण प्रवेशिका - 47 Lessons dealing on
Nouns, Grammar, Verbs, Tenses, Parsing etc. 15.00
4. **Exercises in Sanskrit Translation** - With
Guidelines for Translation from Sanskrit to
English and vice-versa 15.00

Easy text on Sanskrit Poetry लघु काव्य ग्रन्थाः

श्रीरामोदन्तम् - With Instructive Notes in

Sanskrit to English 20.00

Sanskrit Copy Books - संस्कृत प्रतिलेखांजलिः

No. 1 Bold Hand (स्यूललिपिः)

No. 2 Medium Hand (मध्यमलिपिः) and

No. 3 Small Hand (सूक्ष्मलिपिः) Each Rs. 8.00

तैत्तिरीय ब्राह्मणे तृतीयाष्टके सप्तम प्रपाठकः

॥अच्छिद्रम्॥

हरिः ओम्॥ सर्वान् वा एषोऽग्नौ कामान् प्रवेशयति। योऽग्नीनन्वाधाय
व्रतमुपैति। स यदनिष्ट्वा प्रयायात्। अकामप्रीता एनं कामा नानु प्रयायुः।
अतेजा अवीर्यः स्यात्। स जुहुयात्। तुभ्यं ता अङ्गिरस्तमा विश्वाः सुक्षितयः
पृथक्। अग्ने कामाय येमिर इति। कामानेवास्मिन् दधाति।[१] कामप्रीता एनं
कामा अनुप्रयान्ति। तेजस्वी वीर्यावान् भवति॥ संततिर्वा एषा यज्ञस्य।
योऽग्नीनन्वाधाय व्रतमुपैति। स यदुद्वायति। विच्छित्तिरेवास्य सा॥ तं
प्राञ्चमुद्धृत्य। मनसोपतिष्ठेता। मनो वै प्रजापतिः। प्राजापत्यो यज्ञः।[२]
मनसैव यज्ञं संतनोति। भूरित्याह। भूतो वै प्रजापतिः। भूतिमेवोपैति॥ वि वा
एष इन्द्रियेण वीर्येण धर्यते। यस्याहिताग्नेरग्निरपक्षायति। यावच्छम्यया
प्रविध्येत। यदि तावदपक्षार्येत। तं संभरेत्। इदं त एकं पर उत एकम्।[३]
तृतीयेन ज्योतिषा संविशस्वा संवेशनस्तनुवै चारुरेधि। प्रिये देवानां परमे
जनित्र इति। ब्रह्मणैवैनं संभरति। सैव ततः प्रायश्चित्तिः॥ यदि
परस्तरामपक्षार्येत। अनु प्रयायावस्येत। सो एव ततः प्रायश्चित्तिः॥ ओषधीर्वा
एतस्य पशून् पयः प्रविशति। यस्य हविषे वथ्सा अपाकृता धयन्ति।[४] तान्
यदुद्वायात्। यातयाम्ना हविषा यजेता। यन्न दुद्वायात्। यज्ञपरुरन्तरियात्। वायव्यां
यवागूं निर्वपेत्। वायुर्वै पयसः प्रदापयिता। स एवास्मै पयः प्रदापयति। पयो
वा ओषधयः। पयः पयः। पयसैवास्मै पयोऽवरुन्धे।[५] अथोत्तरस्मै हविषे

व॒थ्स॒नपा॒कुर्या॑त्। सै॒व ततः॑ प्रायश्चि॒त्तिः॥ अ॒न्य॒तरान् वा ए॒ष दे॒वान् भा॒ग॒धे॒येन॑
व्य॒र्धय॑ति। ये यज॑मानस्य सा॒यं गृ॒हमा॒गच्छ॑न्ति। यस्य सा॒यं दु॒ग्ध॒ग्ं
ह॒विरा॑र्ति॒मार्छ॑ति। इन्द्रा॑य व्री॒हीन्नि॒रु॒व्योप॑वसेत्। पयो वा ओष॑धयः। पय
ए॒वार॑भ्य गृही॒त्वोप॑वसति। यत्प्रा॒तः स्या॑त्। तच्छृ॒तं कुर्या॑त्। [६] अथे॑तर ए॒न्द्रः
पु॒रोडा॑शः स्यात्। इन्द्रि॑ये ए॒वास्मै॑ समी॒ची द॑धाति। पयो वा ओष॑धयः। पयः
पयः। पय॑सै॒वास्मै॑ पयोऽव॑रुन्धे। अथो॒त्तर॑स्मै ह॒विषे॑ व॒थ्स॒नपा॒कुर्या॑त्। सै॒व
ततः॑ प्रायश्चि॒त्तिः॥ उ॒भया॑न् वा ए॒ष दे॒वान् भा॒ग॒धे॒येन॑ व्य॒र्धय॑ति। ये यज॑मानस्य
सा॒यं च प्रा॒तश्च गृ॒हमा॒गच्छ॑न्ति। यस्यो॒भय॑ग्ं ह॒विरा॑र्ति॒मार्छ॑ति। [७] ऐ॒न्द्रं
पञ्च॑शरावमो॒दनं॑ निर्व॒पेत्। अ॒ग्निं दे॒वता॑नां प्रथ॒मं य॑जेत्। अ॒ग्निमु॑खा ए॒व
दे॒वताः॑ प्री॒णाति॑। अ॒ग्निं वा अ॒न्व॒न्या दे॒वताः॑। इन्द्र॑म॒न्व॒न्याः। ता ए॒वो॒भयीः॑
प्री॒णाति॑। पयो वा ओष॑धयः। पयः पयः। पय॑सै॒वास्मै॑ पयोऽव॑रुन्धे। अथो॒त्तर॑स्मै
ह॒विषे॑ व॒थ्स॒नपा॒कुर्या॑त्। [८] सै॒व ततः॑ प्रायश्चि॒त्तिः॥ अ॒र्धो वा ए॒तस्य॑ य॒ज्ञस्य॑
मी॒यते॑। यस्य व्र॒त्येऽह॑न् प॒त्न्य॒नाल॑म्भु॒का भ॑वति। ताम॑प॒रु॒ध्य य॑जेत। स॒र्वेणै॒व
य॒ज्ञेन॑ यजते। तामि॒ष्ट्वोप॑ह्वयेत। अ॒मू॒हम॑स्मि। सा त्वम्। द्यौ॒रह॑म्। पृ॒थि॒वी त्वम्।
सा॒माह॑म्। ऋ॒क्त्व॑म्। तावे॒हि सं॑भवा॒व। सह॑ रे॒तो द॑धाव॒है। पु॒गं॒से पु॒त्राय॑ वे॒त्तवै॑।
रा॒य॒स्पोषा॑य सु॒प्रजा॑स्त्वाय सु॒वीर्या॑येति। अ॒र्ध ए॒वैना॑मुप॒ह्वय॑ते। सै॒व ततः॑
प्रायश्चि॒त्तिः॥ [९]

यद्वि॒ष्वण्णे॑न जुहु॒यात्। अ॒प्र॒जा अ॒प॒शुर्य॑ज॒मानः॑ स्यात्। यद॑ना॒यत॑ने नि॒नर्य॑त्।

अनायतनः स्यात्। प्राजापत्ययर्चा वल्मीकवपायामवनयेत्। प्राजापत्यो वै
वल्मीकः। यज्ञः प्रजापतिः। प्रजापतावेव यज्ञं प्रतिष्ठापयति। भूरित्याह। भूतो वै
प्रजापतिः। [१०] भूतिमेवोपैति। तत्कृत्वा। अन्यां दुग्ध्वा पुनर् होतव्यम्। सैव
ततः प्रायश्चित्तिः॥ यत्कीटावपन्नेन जुहुयात्। अप्रजा अपशुर्यजमानः स्यात्।
यदनायतने निनयेत्। अनायतनः स्यात्। मध्यमेन पर्णेन द्यावापृथिव्ययर्चाऽन्तः
परिधि निनयेत्। द्यावापृथिव्योरेवैनत्प्रतिष्ठापयति। [११] तत्कृत्वा। अन्यां दुग्ध्वा
पुनर् होतव्यम्। सैव ततः प्रायश्चित्तिः॥ यदववृष्टेन जुहुयात्।
अपरूपमस्यात्मज्जायेत। किलासो वा स्यादर्शसो वा। यत्प्रत्येयात्। यज्ञं
विच्छिन्धात्। स जुहुयात्। मित्रो जनान्कल्पयति प्रजानन्। [१२] मित्रो दाधार
पृथिवीमुत द्याम्। मित्रः कृष्टीरनिमिषाऽभिचष्टे। सत्याय हव्यं घृतवज्जुहोतेति।
मित्रेणैवैनत्कल्पयति। तत्कृत्वा। अन्यां दुग्ध्वा पुनर् होतव्यम्। सैव ततः
प्रायश्चित्तिः॥ यत्पूर्वस्यामाहुत्याग्ं हुतायामुत्तराऽऽहुतिः स्कन्देत्। द्विपाद्भिः
पशुभिर्यजमानो व्यृद्ध्येत। यदुत्तरयाऽभिजुहुयात्। [१३] चतुष्पाद्भिः
पशुभिर्यजमानो व्यृद्ध्येत। यत्र वेत्थ वनस्पते देवानां गुह्या नामानि। तत्र
हव्यानि गामयेति वानस्पत्ययर्चा समिधमाधाय। तूष्णीमेव पुनर्जुहुयात्।
वनस्पतिनैव यज्ञस्यार्ता चानार्ता चाहुती विदाधार। तत्कृत्वा। अन्यां दुग्ध्वा
पुनर् होतव्यम्। सैव ततः प्रायश्चित्तिः॥ यत्पुरा प्रयाजेभ्यः प्राङ्ङारः स्कन्देत्।
अध्वर्यवे च यजमानाय चाकग्ं स्यात्। [१४] यदक्षिणा। ब्रह्मणे च यजमानाय
चाकग्ं स्यात्। यत्प्रत्यक्। होत्रे च पत्नियै च यजमानाय चाकग्ं स्यात्।
यदुदङ्। अग्नीधे च पशुभ्यश्च यजमानाय चाकग्ं स्यात्। यदभि जुहुयात्।
रुद्रोऽस्य पशून् घातुकः स्यात्। यन्नाभिजुहुयात्। अशान्तः प्रहियेत। [१५]

सुवस्य बुध्नेनाभि निदध्यात्। मा तमो मा यज्ञस्तमन्मा यजमानस्तमत्।
 नमस्ते अस्त्वायते। नमो रुद्र परायते। नमो यत्र निषीदसि। अमुं मा
 हिग्ंसीरमुं मा हिग्ंसीरिति येन स्कन्देत्॥ तं प्रहरेत्। सहस्रशृङ्गो वृषभो
 जातवेदाः। स्तोमपृष्ठो घृतवान्त्सुप्रतीकः। मा नो हासीन्मेत्थितो नेत्त्वा जहामा
 गोपोषं नो वीरपोषं च यच्छेति। ब्रह्मणैवैनं प्रहरति। सैव ततः प्रायश्चित्तिः॥
 [१६]

वि वा एष इन्द्रियेण वीर्येणर्ध्यते। यस्याहिताग्नेरग्निर्मथ्यमानो न जायते।
 यत्रान्यं पश्येत्। तत आहृत्य होतव्यम्। अग्नावेवास्याग्निहोत्रं हुतं भवति॥
 यद्यन्यं न विन्देत्। अजायागं होतव्यम्। आग्नेयी वा एषा। यदजा।
 अग्नावेवास्याग्निहोत्रं हुतं भवति। [१७] अजस्य तु नाश्जीयात्।
 यदजस्याश्जीयात्। यामेवाग्नावाहुतिं जुहुयात्। तामद्यात्। तस्मादजस्य
 नाश्यम्॥ यद्यजां न विन्देत्। ब्राह्मणस्य दक्षिणे हस्ते होतव्यम्। एष वा
 अग्निर्वैश्वानरः। यद्ब्राह्मणः। अग्नावेवास्याग्निहोत्रं हुतं भवति। [१८] ब्राह्मणं
 तु वसत्यै नापरुन्ध्यात्। यद्ब्राह्मणं वसत्या अपरुन्ध्यात्। यस्मिन्नेवाग्नावाहुतिं
 जुहुयात्। तं भागधेयेन व्यर्धयेत्। तस्माद्ब्राह्मणो वसत्यै नापरुन्ध्यः॥ यदि
 ब्राह्मणं न विन्देत्। दर्भस्तम्बे होतव्यम्। अग्निवान् वै दर्भस्तम्बः।
 अग्नावेवास्याग्निहोत्रं हुतं भवति। दर्भाग्स्तु नाध्यासीत। [१९]

यद्द॒र्भान्ध्यासी॑त। यामे॒वाग्नावाहु॑तिं जुहु॒यात्। तामध्या॑सीत। तस्मा॑द्द॒र्भान्ध्या॑सितव्याः॥ यदि॑ द॒र्भान्न॑ विन्देत्। अ॒प्सु हो॑तव्यम्। आपो॑ वै सर्वा॑ दे॒वताः॥ दे॒वता॑स्वे॒वास्या॑ग्निहोत्रं हु॒तं भ॑वति। आप॒स्तु न॑ परि॒चक्षी॑त। यदापः॑ परि॒चक्षी॑त। [१०] यामे॒वाप्स्वाहु॑तिं जुहु॒यात्। तां परि॑चक्षीत। तस्मा॑दापो न परि॒चक्ष्याः॥ मे॒ध्या च॑ वा ए॒तस्या॑मे॒ध्या च॑ त॒नुवौ॑ स॒गंसृ॑ज्येते। यस्या॑हि॒ताग्ने॑रन्यैर॒ग्निभि॑र॒ग्नयः॑ स॒गंसृ॑ज्यन्ते। अ॒ग्नये॑ वि॒विच॑ये पु॒रोडा॑शम॒ष्टाक॑पालं निर्व॒पेत्। मे॒ध्यां चै॒वास्या॑मे॒ध्यां च॑ त॒नुवौ॑ व्याव॑र्तयति। अ॒ग्नये॑ व्र॒तप॑तये पु॒रोडा॑शम॒ष्टाक॑पालं निर्व॒पेत्। अ॒ग्निमे॒व व्र॒तप॑तिग्ं स्वेन॑ भा॒गधे॒येनो॑पधावति। स ए॒वैनं॑ व्र॒तमा॑लम्भयति॥ [११] गर्भ॑ग्ं स्र॒वन्त॑म॒गद॑म॒कः। अ॒ग्निरिन्द्र॑स्त्वष्टा बृ॒हस्प॑तिः। पृ॒थिव्या॑मव॒चुश्चो॑तै॒तत्। नाभि॑प्राप्नोति नि॒र्ऋतिं॑ प॒राचैः॥ रे॒तो वा॑ ए॒तद्वा॑जिन॒माहि॑ताग्नेः। यद॑ग्निहोत्रम्। तद्य॑त्स्रवेत्। रे॒तोऽस्य॑ वा॒जिन॑ग्ं स्रवेत्। गर्भ॑ग्ं स्र॒वन्त॑म॒गद॑म॒करि॑त्याह। रे॒त ए॒वास्मि॒न्वाजिनं॑ दधाति। [१२] अ॒ग्निरि॑त्याह। अ॒ग्निर्वै रे॒तोधाः॑। रे॒त ए॒व तद्द॑धाति। इन्द्र॑ इत्याह। इन्द्रि॒यमे॒वास्मि॑न्दधाति। त्वष्टे॑त्याह। त्वष्टा॑ वै प॒शूनां॑ मि॒थुना॑नाग्ं रू॒पकृ॑त्। रू॒पमे॒व प॒शुषु॑ दधाति। बृ॒हस्प॑तिरि॒त्याह। ब्र॒ह्म वै दे॒वानां॑ बृ॒हस्प॑तिः। ब्र॒ह्मणो॑वास्मै प्र॒जाः प्र॑जनयति। पृ॒थिव्या॑मव॒चुश्चो॑तै॒तदि॑त्याह। अ॒स्यामे॒वैन॑त्प्रतिष्ठापयति। नाभि॑ प्राप्नोति नि॒र्ऋतिं॑ प॒राचै॑रि॒त्याह। रक्ष॑साम॒पहत्यै॑॥ [१३]

याः पुरस्तात्प्रसवन्ति। उपरिष्ठात्सर्वतश्च याः। ताभी रश्मिपवित्राभिः। श्रद्धां
 यज्ञमारभे॥ देवा गातुविदः। गातुं यज्ञाय विन्दत। मनसस्पतिना देवेना
 वाताद्यज्ञः प्रयुज्यताम्॥ तृतीयस्यै दिवः। गायत्रिया सोम आभृतः। [१४]
 सोमपीथाय संनयितुम्। वकलमन्तरमाददे॥ आपो देवीः शुद्धाः स्था इमा
 पात्राणि शुन्धत। उपातङ्क्याय देवानाम्। पर्णवल्कमुत शुन्धत॥ पयो गृहेषु
 पयो अघ्नियासु। पयो वत्सेषु पय इन्द्राय हविषे ध्रियस्वा। गायत्री
 पर्णवल्केन। पयः सोमं करोत्विमम्॥ [१५] अग्निं गृह्णामि सुरथं यो मयोभूः।
 य उद्यन्तमारोहति सूर्यमहम्॥ आदित्यं ज्योतिषां ज्योतिरुत्तमम्। श्वो यज्ञाय
 रमतां देवताभ्यः॥ वसून् रुद्रानादित्यान्। इन्द्रेण सह देवताः। ताः पूर्वः
 परिगृह्णामि। स्व आयतने मनीषया॥ इमामूर्जं पञ्चदशीं ये प्रविष्टाः। तान्देवान्
 परिगृह्णामि पूर्वः। [१६] अग्निर् हव्यवाडिह तानावहतु। पौर्णमासगं
 हविरिदमेषां मयि। आमावास्यगं हविरिदमेषां मयि॥ अन्तराऽग्नी पशवः।
 देवसगं सदमागमन्। तान् पूर्वः परिगृह्णामि। स्व आयतने मनीषया॥ इह
 प्रजा विश्वरूपा रमन्ताम्। अग्निं गृहपतिमभि संवसानाः। ताः पूर्वः
 परिगृह्णामि॥ [१७] स्व आयतने मनीषया॥ इह पशवो विश्वरूपा रमन्ताम्। अग्निं
 गृहपतिमभि संवसानाः। तान् पूर्वः परिगृह्णामि। स्व आयतने मनीषया॥ अयं
 पितृणामग्निः। अवाहुव्या पितृभ्य आ। तं पूर्वः परिगृह्णामि। अविषं नः पितुं
 करत्॥ अजस्रं त्वागं सभापालाः। [१८] विजयभागगं समिन्धताम्। अग्ने
 दीदाय मे सभ्या विजित्यै शरदः शतम्॥ अन्नमावसथीयम्। अभिहराणि
 शरदः शतम्। आवसथे श्रियं मन्त्रम्। अहिर्बुध्नियो नियच्छतु॥

इ॒दम॑हम॒ग्निज्ये॑ष्ठेभ्यः। वसु॑भ्यो य॒ज्ञं प्र॑ब्रवीमि। इ॒दम॑हमिन्द्र॒ज्येष्ठे॑भ्यः। [२९]
रु॒द्रेभ्यो॑ य॒ज्ञं प्र॑ब्रवीमि। इ॒दम॑हं वरु॒णज्ये॑ष्ठेभ्यः। आ॒दित्ये॑भ्यो य॒ज्ञं प्र॑ब्रवीमि॥
पय॑स्वतीरोष॒धयः॑। पय॑स्वद्वीरु॒धां पयः॑। अ॒पां पय॑सो यत्पयः॑। तेन॒ मामिन्द्र॑
सग्ं सृ॒ज॥ अ॒ग्ने व्र॑तपते व्र॒तं च॑रिष्यामि। तच्छ॑केयं तन्मे रा॒ध्यता॑म्। वा॒यो
व्र॑तपत आ॒दित्य॑ व्र॒तपते॥ [३०] व्र॒तानां॑ व्र॒तपते॑ व्र॒तं च॑रिष्यामि। तच्छ॑केयं तन्मे
रा॒ध्यता॑म्॥ इ॒मां प्रा॒चीमु॒दीची॑म्। इ॒षमूर्ज॑म॒भि स॒ग्गस्कृ॑ताम्।
ब॒हुपर्णा॑मशु॒ष्काग्रा॑म्। ह॒रामि॑ पशु॒पाम॑हम्॥ यत्कृ॑ष्णो रू॒पं कृ॑त्वा। प्रा॒विश॑स्त्वं
व॒नस्प॑तीन्। त॒तस्त्वामे॑कवि॒ंशति॑धा। संभ॑रामि सु॒संभृ॑ता॥ [३१] त्रीन्
प॒रिधी॑गु॒स्तिस्त्रः॑ स॒मिधः॑। य॒ज्ञायु॑रनु संच॒रान्। उ॒पवेषं॑ मे॒क्षणं॑ धृ॒ष्टिम्। संभ॑रामि
सु॒संभृ॑ता॥ या जा॒ता ओष॑धयः। दे॒वेभ्य॑स्त्रियु॒गं पु॒रा। तासां॑ पर्व रा॒ध्यास॑म्।
प॒रिस्तर॑मा॒हरन्॥ अ॒पां मे॒ध्यं य॒ज्ञिय॑म्। स॒देव॑गं शि॒वम॑स्तु मे॥ [३२] आ॒च्छेत्ता
वो मा रि॑षम्। जी॒वानि॑ श॒रदः॑ श॒तम्॥ अ॒परि॑मितानां प॒रि॒मिताः॑। सं॒नह्ये॑
सु॒कृता॑य॒ कम्। ए॒नो मा नि॒गां क॒तम॑च्च॒नाह॑म्। पु॒नरु॑त्थाय॒ बहु॑ला भवन्तु॥
स॒कृदा॑च्छिन्नं ब॒र्हिरू॑र्णामृ॒दु। स्यो॒नं पि॒तृभ्य॑स्त्वा भ॒राम्य॑हम्। अ॒स्मिन्त्सी॑दन्तु
मे पि॒तरः॑ सो॒म्याः। पि॒ताम॑हाः प्र॒पिता॑महाश्चानु॒गैः स॒ह॥ [३३] त्रि॒वृत्प॑लाशे
दर्भः॑। इ॒यां प्रा॑देश॒संमि॑तः। य॒ज्ञे प॒वित्रं॑ पो॒तृ॒तम॑म्। प॒यो ह॒व्यं करो॑तु मे॥
इ॒मौ प्रा॑णा॒पानौ॑। य॒ज्ञस्या॑ङ्गानि स॒र्वशः॑। आ॒प्याय॑यन्तौ संच॒रता॑म्। प॒वित्रे॑
ह॒व्यशो॑धने॥ प॒वित्रे॑ स्थो वै॒ष्णवी॑। वा॒युर्वा॑ मनसा पु॒नातु॥ [३४] अ॒यं
प्रा॒णश्चा॑पानश्च। य॒जमान॑मपि॒गच्छ॑ताम्। य॒ज्ञे ह्य॑भू॒तां पो॑तारौ। प॒वित्रे॑
ह॒व्यशो॑धने॥ त्वया वे॒दिं वि॒विदुः॑ पृ॒थि॒वीम्। त्वया॑ य॒ज्ञो जा॑यते वि॒श्वदा॑निः।
अ॒च्छिद्रं॑ य॒ज्ञम॑न्वे॒षि वि॒द्वान्। त्वया॑ हो॒ता सं॑तनोत्य॒र्थमा॑सान्॥ त्रय॑स्त्रि॒गुंशो॑ऽसि

तन्तूनाम्। पवित्रेण सहागहि। [३५] शिवेयगं रज्जुरभिधानी।
अघ्नियामुपसेवताम्॥ अप्रस्रगंसाय यज्ञस्य। उखे उपदधाम्यहम्। पशुभिः
संनीतं बिभृताम्। इन्द्राय शृतं दधि॥ उपवेषोऽसि यज्ञाय। त्वां
परिवेषमधारयन्। इन्द्राय हविः कृण्वन्तः। शिवः शग्मो भवासि नः॥ [३६]
अमृन्मयं देवपात्रम्। यज्ञस्यायुषि प्रयुज्यताम्। तिरः पवित्रमति नीताः। आपो
धारय माऽतिगुः॥ देवेन सवित्रोत्पूताः। वसोः सूर्यस्य रश्मिभिः। गां
दोहपवित्रे रज्जुम्। सर्वा पात्राणि शुन्धताम्॥ एता आचरन्ति मधुमद्बुहानाः।
प्रजावतीर्यशसो विश्वरूपाः। [३७] बह्वीर्भवन्तीरुप जायमानाः। इह व इन्द्रो
रमयतु गावः॥ पूषा स्थः॥ अयक्ष्मा वः प्रजया सगंसृजामि। रायस्पोषेण
बहुला भवन्तीः। ऊर्जं पयः पिन्वमाना घृतं च। जीवो जीवन्तीरुप वः
सदेयम्॥ द्यौश्चेमं यज्ञं पृथिवी च संदुहाताम्। धाता सोमं न सह वातेन वायुः।
यजमानाय द्रविणं दधातु॥ [३८] उथ्सं दुहन्ति कलशं चतुर्बिलम्। इडां देवीं
मधुमतीगं सुवर्विदम्। तदिन्द्राग्नी जिन्वतगं सूनृतावत्। तद्यजमानममृतत्वे
दधातु॥ कामधुक्षः प्रणो ब्रूहि। इन्द्राय हविरिन्द्रियम्॥ अमूं यस्यां देवानाम्।
मनुष्याणां पयो हितम्॥ बहु दुग्धीन्द्राय देवेभ्यः। हव्यमाप्यायतां पुनः॥ [३९]
वथ्सेभ्यो मनुष्येभ्यः। पुनर्दोहाय कल्पताम्॥ यज्ञस्य संततिरसि। यज्ञस्य त्वा
संततिमनु संतनोमि॥ अदस्तमसि विष्णावे त्वा। यज्ञायपिदधाम्यहम्।
अद्भिररिक्तेन पात्रेण। याः पूताः परिशेरते॥ अयं पयः सोमं कृत्वा। स्वां
योनिमपिगच्छतु॥ [४०] पर्णवल्कः पवित्रम्। सौम्यः सोमाद्धि निर्मितः॥ इमौ
पर्णं च दर्भं च। देवानागं हव्यशोधनौ। प्रातर्वेषाय गोपाय। विष्णो हव्यगं हि
रक्षसि॥ उभावग्नी उपस्तृणते। देवता उपवसन्तु मे। अहं ग्राम्यानुप वसामि।

मह्यं गोपतये पशून्॥[४१]

देवा देवेषु पराक्रमध्वम्। प्रथमा द्वितीयेषु। द्वितीयास्तृतीयेषु। त्रिरेकादशा इह
माऽवता। इदं शकेयं यदिदं करोमि। आत्मा करोत्वात्मने। इदं करिष्ये
भेषजम्। इदं मे विश्वभेषजा। अश्विना प्रावतं युवम्॥ इदमहं सेनाया
अभीत्वये। [४२] मुखमपोहामि॥ सूर्य ज्योतिर्विभाहि। महत इन्द्रियाय॥
आप्यायतां घृतयोनिः। अग्निर् हव्याऽनुमन्यताम्। खमङ्क्ष्व त्वचमङ्क्ष्व।
सुरूपं त्वा वसुविदम्। पशूनां तेजसा। अग्नये जुष्टमभिधारयामि॥ स्योनं ते
सदनं करोमि। [४३] घृतस्य धारया सुशेवं कल्पयामि। तस्मिन्त्सीदामृते
प्रतिष्ठ। ब्रीहीणां मेध सुमनस्यमानः॥ आर्द्रः प्रथस्नुर्भुवनस्य गोपाः॥ शृत
उत्स्नाति जनिता मतीनाम्॥ यस्त आत्मा पशुषु प्रविष्टः। देवानां विष्टामनु यो
वितस्थे। आत्मन्वान्त्सोम घृतवान् हि भूत्वा। देवान्गच्छ सुवर्विन्द यजमानाय
मह्यम्॥ इरा भूतिः पृथिव्यै रसो मोत्क्रमीत्॥[४४] देवाः पितरः पितरो देवाः।
योऽहमस्मि स सन् यजे। यस्यास्मि न तमन्तरेमि। स्वं मे इष्टग्ं स्वं दत्तम्।
स्वं पूतग्ं स्वग्ं श्रान्तम्। स्वग्ं हुतम्। तस्य मेऽग्निरुपद्रष्टा। वायुरुपश्रोता।
आदित्योऽनुख्याता। द्यौः पिता॥[४५] पृथिवी माता। प्रजापतिर्बन्धुः। य एवास्मि
स सन् यजे॥ मा भेर्मा संविक्षा मा त्वा हिगंसिषम्। मा ते तेजोऽपक्रमीत्।
भरतमुद्धरेमनुषिञ्च। अवदानानि ते प्रत्यवदास्यामि। नमस्ते अस्तु मा मा

हि॒गं॒सीः॥ यद॑व॒दाना॑नि तेऽव॒द्यन्। विलो॒माका॑र्ष॒मात्म॑नः। [४६] आज्ये॑न
 प्रत्य॑नज्म्येनत्। तत्त॒ आप्या॑यतां पुनः॑॥ अज्या॑यो यव॒मात्रा॑त्।
 आव्या॑धात्कृत्यतामिदम्। माऽरू॒रुपाम॑ यज्ञ॒स्य। शु॒द्धग् स्वि॑ष्टमिद॒गं ह॒विः॥
 मनु॑ना दृ॒ष्टां घृ॑तपदीम्। मि॒त्रावरु॑णसमीरिताम्। दक्षि॑णार्धादसंभिन्दन्।
 अव॑द्याम्येकतोमु॒खाम्॥ [४७] इडे॑ भा॒गं जुष॑स्व नः। जिन्व॒ गा जिन्वा॑र्वतः।
 तस्या॑स्ते भक्षि॒वाणः॑ स्याम। सर्वा॑त्मानः सर्व॒गणाः॥ ब्र॒ध्न पि॒न्वस्व। दद॑तो मे
 मा क्षा॑यि। कुर्व॑तो मे मोप॑दसत्। दि॒शां क्लु॑प्तिरसि। दि॒शो मे क॑ल्पन्ताम्।
 कल्प॑न्तां मे दि॒शः॥ [४८] दैवी॑श्च मानु॒षीश्च। अ॒होरा॑त्रे मे कल्पेताम्। अ॒र्धमा॑सा
 मे कल्प॑न्ताम्। मा॒सा मे कल्प॑न्ताम्। ऋ॒तवो॑ मे कल्पन्ताम्। सं॒वत्स॑रो मे
 कल्प॑ताम्। क्लु॑प्तिरसि कल्प॑तां मे॥ आ॒शानां॑ त्वाऽऽशा॒पाले॑भ्यः। च॒तुर्भ्या॑
 अ॒मृत॑ेभ्यः। इ॒दं भू॒तस्या॑ध्यक्षेभ्यः॥ [४९] वि॒धेम॑ ह॒विषा॑ वयम्॥ भज॑तां भागी
 भा॒गम्। माऽभा॑गोऽभक्त। नि॒रभा॑गं भ॒जामः॑। अ॒पस्पि॑न्व। ओष॑धीर्जिन्व।
 द्वि॒पात्पा॑हि। च॒तुष्पा॑दव। दि॒वो वृ॒ष्टिमे॑रय॥ ब्रा॒ह्मणा॑नामिद॒गं ह॒विः॥ [५०]
 सो॒म्याना॑गं सोमपी॒थिना॑म्। निर्भ॑क्तो ब्रा॒ह्मणः॑। नेहा॑ ब्रा॒ह्मण॑स्यास्ति॥ स॒मङ्गां
 ब॒र्हिर् ह॒विषा॑ घृ॒तेन॑। स॒मादि॑त्यैर्वसु॒भिः सं म॑रुद्धिः। स॒मिन्द्रे॑ण
 वि॒श्वेभि॑-र्दे॒वेभि॑रङ्गाम्॥ दि॒व्यं नभो॑ गच्छतु यत्स्वाहा॑॥ इन्द्रा॑णीवावि॒धवा॑
 भूया॑सम्। अ॒दि॒तिरि॒व सु॑पु॒त्रा। अ॒स्थू॒रि त्वा॑ गा॒र्हप॑त्या [५१] उ॒पनि॑षदे
 सु॒प्रजा॑स्त्वाय॥ सं प॒त्नी प॑त्या सुकृ॒तेन॑ गच्छताम्। य॒ज्ञस्य॑ यु॒क्तौ धु॒र्याव॑भूताम्।
 सं॒जाना॑नौ विज॑हतामरातीः। दि॒वि ज्योति॑रजर॒मार॑भेताम्॥ द॒श ते त॒नुवो॑ य॒ज्ञ
 य॒ज्ञियाः॑। ताः प्री॑णातु यज॑मानो घृ॒तेन॑। ना॒रि॒ष्टयोः॑ प्र॒शिष॑मीड॒मानः॑। दे॒वानां॑
 दै॒व्येऽपि॑ यज॑मानोऽमृतोऽभूत्॥ यं वां दे॒वा अ॑कल्पयन्। [५२] ऊ॒र्जो भा॑गं

शत॑क्रतू॒ ए॒तद्वा॑ं तेन॑ प्री॒णानि॑ । तेन॑ तृ॒प्यत॑मगंह॒हौ॑ ॥ अ॒हं दे॒वाना॑गं सु॒कृता॑मस्मि
लो॒के । म॒मेद॑मिष्टं न मि॒थुर्भ॑वाति । अ॒हं ना॒रि॒ष्टाव॑नुयजामि वि॒द्वान् ।
यदा॑भ्यामिन्द्रो॒ अद॑धाद्भाग॒धेयम्॑ ॥ अ॒दार॑सृ॒द्धव॑त दे॒व सो॒मा । अ॒स्मिन् य॒ज्ञे
म॒रुतो॑ मृ॒डता॑ नः । मा नो॑ वि॒दद॑भि भा॒मो अ॒शस्तिः॑ ॥ [५३] मा नो॑ वि॒दद्वृ॒जना॑
द्वे॒ष्ट्या या॑ ॥ ऋ॒षभं॑ वा॒जिनं॑ व॒यम् । पू॒र्णमा॑सं यजामहे । स नो॑ दो॒हता॑गं
सु॒वीर्य॑म् । रा॒यस्पो॑ष॒गं स॒हस्रि॑णम् । प्रा॒णाय॑ सु॒राध॑से । पू॒र्णमा॑साय स्वाहा ॥
अ॒मावा॑स्या सु॒भगा॑ सु॒शेवा॑ । धे॒नुरि॑व भू॒य आ॒प्याय॑माना । सा नो॑ दो॒हता॑गं
सु॒वीर्य॑म् । रा॒यस्पो॑ष॒गं स॒हस्रि॑णम् । अ॒पा॒नाय॑ सु॒राध॑से । अ॒मावा॑स्यायै स्वाहा ॥
अ॒भिस्तृ॑णीहि परि॒धेहि॑ वे॒दिम् । जा॒मिं मा हि॒गंसी॑रमु॒या श॒याना॑ । हो॒तृष॑द॒ना
ह॒रिताः॑ सु॒वर्णाः॑ । नि॒ष्का इ॒मे य॑ज॒मान॑स्य ब्र॒ध्ने ॥ [५४]

परि॑स्तृणीत परि॒धत्ता॑ग्निम् । परि॒हितो॑ऽग्नि॒र्यज॑मानं भुनक्तु । अ॒पा॒गं र॒स
ओ॑ष॒धीना॑गं सु॒वर्णः॑ । नि॒ष्का इ॒मे य॑ज॒मान॑स्य सन्तु का॒मदु॒घाः ।
अ॒मुत्रा॑मुष्मिँल्लो॒के ॥ भू॒पते॑ भुव॒नप॑ते । म॒हतो॑ भू॒तस्य॑ प॒ते । ब्र॒ह्माणं॑ त्वा
वृ॒णीम॑हे ॥ अ॒हं भू॒पति॑रहं भुव॒नप॑तिः । अ॒हं म॒हतो॑ भू॒तस्य॑ प॒तिः ॥ [५५] दे॒वेन॑
स॒वित्रा॑ प्र॒सूत॑ आ॒र्त्विज्यं॑ करिष्यामि । दे॒व स॒वित॑रेतं त्वा वृ॒णते॑ । बृ॒हस्प॑तिं दै॒व्यं
ब्र॒ह्माण॑म् । तद॒हं म॑न॒से प्र॑ब्रवीमि । म॒नो गाय॑त्रीयै । गा॒यत्री॑ त्रि॒ष्टुभै॑ । त्रि॒ष्टुब्ज॑ग॒त्यै ।
ज॒ग॒त्यनु॑ष्टुभै । अ॒नुष्टु॑क् प॒ङ्क्त्यै॑ । प॒ङ्क्तिः॑ प्र॒जाप॑तये । [५६] प्र॒जाप॑तिर्विश्वेभ्यो
दे॒वेभ्यः॑ । विश्वे॑ दे॒वा बृ॒हस्प॑तये । बृ॒हस्प॑तिर्ब्र॒ह्मणे॑ । ब्र॒ह्मा भू॑र्भुवः सु॒वः ।

बृहस्पतिर्देवानां ब्रह्मा॥ अहं मनुष्याणाम्॥ बृहस्पते यज्ञं गोपाय॥ इदं तस्मै
 हर्म्यं करोमि॥ यो वो देवाश्चरति ब्रह्मचर्यम्॥ मेधावी दिक्षु मनसा तपस्वी॥[५७]
 अन्तर्दूतश्चरति मानुषीषु॥ चतुः शिखण्डा युवतिः सुपेशाः॥ घृतप्रतीका
 भुवनस्य मध्ये॥ मर्मज्यमाना महते सौभगाय॥ मह्यं धुक्ष्व यजमानाय कामान्॥
 भूमिर्भूत्वा महिमानं पुपोषा॥ ततो देवी वर्धयते पयागंसि॥ यज्ञिया यज्ञं वि च
 यन्ति शं चा ओषधीराप इह शक्वरीश्च॥ यो मा हृदा मनसा यश्च वाचा॥[५८]
 यो ब्रह्मणा कर्मणा द्वेष्टि देवाः॥ यः श्रुतेन हृदयेनेष्णता च॥ तस्येन्द्र वज्रेण
 शिरश्छिनद्मि॥ ऊर्णामृदु प्रथमानग् स्योनम्॥ देवेभ्यो जुष्टगं सदानाय बर्हिः॥
 सुवर्गे लोके यजमानगं हि धेहि॥ मां नाकस्य पृष्ठे परमे व्योमन्॥
 चतुःशिखण्डा युवतिः सुपेशाः॥ घृतप्रतीका वयुनानि वस्ते॥ सा स्तीर्यमाणा
 महते सौभगाय॥[५९] सा मे धुक्ष्व यजमानाय कामान्॥ शिवा च मे शग्मा
 चैधि॥ स्योना च मे सुषदा चैधि॥ ऊर्जस्वती च मे पयस्वती चैधि॥ इषमूर्ज
 मे पित्वस्वा॥ ब्रह्मतेजो मे पित्वस्वा॥ क्षत्रमोजो मे पित्वस्वा॥ विशं पुष्टिं मे
 पित्वस्वा॥ आयुरन्नाद्यं मे पित्वस्वा॥ प्रजां पशून्मे पित्वस्वा॥[६०] अस्मिन् यज्ञ
 उप भूय इन्नु मे॥ अविक्षोभाय परिधीन्दधामि॥ धर्ता धरुणो धरीयान्॥
 अग्निर्द्वेषागंसि निरितो नुदातै॥ विच्छिनद्मि विधृतीभ्यागं सपन्नान्॥ जातान्
 भ्रातृव्यान् ये च जनिष्यमाणाः॥ विशो यन्त्राभ्यां विधमाम्येनान्॥ अहग्
 स्वानामुत्तमोऽसानि देवाः॥ विशो यन्त्रे नुदमाने अरातिम्॥ विश्वं पाप्मानममतिं
 दुर्मरायुम्॥[६१] सीदन्ती देवी सुकृतस्य लोके॥ धृती स्थो विधृती स्वधृती॥
 प्राणान्मयि धारयतम्॥ प्रजां मयि धारयतम्॥ पशून्मयि धारयतम्॥ अयं प्रस्तर
 उभयस्य धर्ता॥ धर्ता प्रयाजानामुतानूयाजानाम्॥ स दाधार समिधो विश्वरूपाः॥

तस्मिन्सुचो अध्यासादयामि॥ आरोह पथो जुहु देवयानान्॥[६२] यत्रर्षयः
 प्रथमजा ये पुराणाः। हिरण्यपक्षाजिरा सम्भृताङ्गा। वहसि मा सुकृतां यत्र
 लोकाः॥ अवाहं बाध उपभृता सपलान्। जातान् भ्रातृव्यान् ये च
 जनिष्यमाणाः। दोहै यज्ञं सुदुधामिव धेनुम्। अहमुत्तरो भूयासम्। अधरे
 मथ्सपलाः॥ यो मा वाचा मनसा दुर्मरायुः। हृदाऽरातीयादभिदासदग्ने॥[६३]
 इदमस्य चित्तमधरं ध्रुवायाः। अहमुत्तरो भूयासम्। अधरे मथ्सपलाः॥
 ऋषभोऽसि शाक्वरः। घृताचीनागं सूनुः। प्रियेण नाम्ना प्रिये सदसि सीद॥
 स्योनो मे सीद सुषदः पृथिव्याम्। प्रथयि प्रजया पशुभिः सुवर्गे लोके।
 दिवि सीद पृथिव्यामन्तरिक्षे। अहमुत्तरो भूयासम्॥[६४] अधरे मथ्सपलाः॥
 इयग्ग् स्थाली घृतस्य पूर्णा। अच्छिन्नपयाः शतधार उथ्सः। मारुतेन शर्मणा
 दैव्येन॥ यज्ञोऽसि सर्वतः श्रितः। सर्वतो मां भूतं भविष्यच्छ्रयताम्। शतं मे
 सन्त्वाशिषः। सहस्रं मे सन्तु सूनृताः। इरावतीः पशुमतीः। प्रजापतिरसि
 सर्वतः श्रितः॥[६५] सर्वतो मां भूतं भविष्यच्छ्रयताम्। शतं मे सन्त्वाशिषः।
 सहस्रं मे सन्तु सूनृताः। इरावतीः पशुमतीः॥ इदमिन्द्रियममृतं वीर्यम्।
 अनेनेन्द्राय पशवोऽचिकिथ्सन्। तेन देवा अवतोप माम्। इहेषमूर्जं यशः सह
 ओजः सनेयम्। शृतं मयि श्रयताम्॥ यत्पृथिवीमचरत्तत्प्रविष्टम्॥[६६]
 येनासिञ्चद्वलमिन्द्रे प्रजापतिः। इदं तच्छुक्रं मधु वाजिनीवत्।
 येनोपरिष्ठादधिनोन्महेन्द्रम्। दधि मां धिनोतु॥ अयं वेदः पृथिवीमन्वविन्दत्।
 गुहा सतीं गहने गह्वरेषु। स विन्दतु यजमानाय लोकम्। अच्छिद्रं यज्ञं
 भूरिकर्मा करोतु॥ अयं यज्ञः समसदब्धविष्मान्। ऋचा साम्ना यजुषा
 देवताभिः॥[६७] तेन लोकान्सूर्यवतो जयेमा। इन्द्रस्य सख्यममृतत्वमश्याम्॥

यो नः कनीय इह कामयातौ। अस्मिन् यज्ञे यजमानाय मह्यम्। अप-
तमिन्द्राग्नी भुवनान्नुदेताम्। अहं प्रजां वीरवतीं विदेय॥ अग्ने वाजजित्। वाजं
त्वा सरिष्यन्तम्। वाजं जेष्यन्तम्। वाजिनं वाजजितम्। [६८] वाजजित्यायै
संमार्ज्मि। अग्निमन्नादमन्नाद्याय॥ उपहूतो द्यौः पिता। उप मां द्यौः पिता
ह्वयताम्। अग्निराग्नीदधात्। आयुषे वर्चसे। जीवात्वै पुण्याय। उपहूता पृथिवी
माता। उप मां माता पृथिवी ह्वयताम्। अग्निराग्नीदधात्। [६९] आयुषे वर्चसे।
जीवात्वै पुण्याय॥ मनो ज्योतिर्जुषतामाज्यम्। विच्छिन्नं यज्ञं समिमं दधातु।
बृहस्पतिस्तनुतामिमं नः। विश्वे देवा इह मादयन्ताम्॥ यं ते अग्न आवृश्चामि।
अहं वा क्षिपितश्चरन्। प्रजां च तस्य मूलं च। नीचैर्देवा निवृश्चत॥ [७०] अग्ने
यो नोऽभिदासति। समानो यश्च निष्ठ्यः। इध्मस्येव प्रक्षायतः। मा तस्योच्छेषि
किञ्चन॥ यो मां द्वेष्टि जातवेदः। यं चाहं द्वेष्टि यश्च माम्। सर्वाग्स्तानग्ने
संदह। याग्श्चाहं द्वेष्टि ये च माम्॥ अग्ने वाजजित्। वाजं त्वा ससृवाग्ंसम्।
[७१] वाजं जिगिवाग्ंसम्। वाजिनं वाजजितम्। वाजजित्यायै संमार्ज्मि।
अग्निमन्नादमन्नाद्याय॥ वेदिर्बर्हिः शृतं हविः। इध्मः परिधयः सुचः। आज्यं
यज्ञ ऋचो यजुः। याज्याश्च वषट्काराः। सं मे संनतयो नमन्ताम्। इध्मसंनहने
हुते॥ [७२] दिवः खीलोऽवततः। पृथिव्या अध्युत्थितः। तेना सहस्रकाण्डेन।
द्विषन्तं शोचयामसि। द्विषन्मे बहु शोचतु। ओषधे मो अहं शुचम्॥ यज्ञ
नमस्ते यज्ञ। नमो नमश्च ते यज्ञ। शिवेन मे संतिष्ठस्व। स्योनेन मे संतिष्ठस्व।
[७३] सुभूतेन मे संतिष्ठस्व। ब्रह्मवर्चसेन मे संतिष्ठस्व। यज्ञस्यर्धिमनु
संतिष्ठस्व। उप ते यज्ञ नमः। उप ते नमः। उप ते नमः॥ त्रिष्कली
क्रियमाणानाम्। यो न्यङ्गो अवशिष्यते। रक्षसां भागधेयम्।

आप॒स्तत्प्र॑व॒हता॑दि॒तः॥[७४] उ॒लू॒ख॒ले॒ मु॒स॒ले॒ यच्च॑ शूर्पं॥ आ॒शि॒श्ले॒ष दृ॒षदि॑
यत्क॒पालं॑॥ अ॒व॒पु॒षो वि॒पु॒षः सं॑य॒जामि॑॥ वि॒श्वे दे॒वा ह॒विरि॑दं जुषन्ताम्॥ यज्ञे
या वि॒पु॒षः सन्ति॑ ब॒ह्वीः॥ अ॒ग्नौ ताः सर्वाः॑ स्वि॒ष्टाः सु॒हुता॑ जुहोमि॥ उ॒द्यन्न॑द्य
मि॒त्रम॑हः॥ स॒प॒त्नान्मे॑ अ॒नी॒न॒शः॥ दि॒वैनान् वि॒द्युता॑ जहि॥ नि॒म्रोच॑न्न॒धरा॑न्कृ॒धि॥
[७५] उ॒द्यन्न॑द्य वि नो भ॒ज॥ पि॒ता पु॒त्रेभ्यो॑ यथा॥ दी॒र्घायु॑त्वस्य हे॒शिषे॑॥ तस्य॑ नो
देहि॑ सूर्य॥ उ॒द्यन्न॑द्य मि॒त्रम॑हः॥ आ॒रोह॑न्नु॒त्तरां॑ दि॒वम्॥ हृ॒द्रोगं॑ मम सूर्य॥ ह॒रिमा॑णं
च ना॒शया॑॥ शु॒केषु॑ मे ह॒रिमा॑णम्॥ रो॒प॒णाका॑सु दध्मसि॥[७६] अथो॑ हा॒रिद्र॑वेषु
मे॥ ह॒रिमा॑णं नि॒दध्म॑सि॥ उ॒दगा॑दयमा॒दित्यः॑॥ वि॒श्वेन॑ स॒हसा॑ स॒ह॥ द्विष॑न्तं मम
रन्ध॑यन्॥ मो अ॒हं द्विष॑तो र॒धम्॥ यो नः॑ श॒पाद॑श॒पतः॑॥ यश्च॑ नः॑ श॒पतः॑
श॒पात्॥ उ॒षाश्च॑ तस्मै नि॒मृक्च॑॥ सर्वं॑ पा॒प॒गं स॑मू॒हता॑म्॥[७७] यो नः॑ स॒प॒त्नो
यो र॑णः॥ म॒तोऽभि॑दा॒सति॑ दे॒वाः॥ इ॒ध्मस्य॑व प्र॒क्षाय॑तः॥ मा तस्यो॑च्छे॒षि
किञ्च॑न॥ अ॒व॒सृष्टः॑ प॒राप॑ता॥ श॒रो ब्र॑ह्म॒सगं॑शितः॥ ग॒च्छाऽमि॒त्रान् प्र॑वि॒श॥ मैषां॑
कंच॑नोच्छिषः॥[७८]

स॒क्षेदं॑ प॒श्या॥ वि॒ध॒र्त॒रि॒दं प॒श्या॥ ना॒केदं॑ प॒श्या॥ र॒म॒तिः प॒नि॒ष्ठा॥ ऋ॒तं व॑र्षिष्ठम्॥
अ॒मृता॑ या॒न्याहुः॑॥ सू॒र्यो व॑रिष्ठो अ॒क्षभि॑र्वि॒भाति॑॥ अ॒नु द्या॒वापृ॑थि॒वी दे॒वपु॑त्रे॥
दी॒क्षाऽसि॑ त॒पसो॑ योनिः॥ तपो॑ऽसि ब्र॒ह्म॒णो योनिः॥[७९] ब्र॒ह्मा॑सि क्ष॒त्रस्य॑
योनिः॥ क्ष॒त्रम॑स्य॒तस्य॑ योनिः॥ ऋ॒तम॑सि भू॒रार॑भे॥ श्र॒द्धां म॑न॒सा॥ दी॒क्षां त॑प॒सा॥

वि॒श्वस्य॑ भुव॑नस्याधि॒पत्नीम्। सर्वे॑ का॒मा यज॑मानस्य सन्तु॥ वा॒तं प्रा॑णं
मन॑साऽन्वा॒रभा॑महे। प्र॒जाप॑तिं यो भुव॑नस्य गो॒पाः। स नो॑ मृ॒त्योस्त्रा॑यतां
पा॒त्वग्ं॑हसः। [८०] ज्यो॑ग्जी॒वा ज॒राम॑शीमहि॥ इन्द्र॑ शा॒क्वर॑ गाय॒त्रीं प्र॑पद्ये। तां
ते यु॒नज्मि॑। इन्द्र॑ शा॒क्वर॑ त्रि॒ष्टुभं॑ प्र॑पद्ये। तां ते यु॒नज्मि॑। इन्द्र॑ शा॒क्वर॑ जग॑तीं
प्र॑पद्ये। तां ते यु॒नज्मि॑। इन्द्र॑ शा॒क्वरानु॑ष्टुभं प्र॑पद्ये। तां ते यु॒नज्मि॑। इन्द्र॑ शा॒क्वर॑
प॒ङ्क्तिं॑ प्र॑पद्ये। [८१] तां ते यु॒नज्मि॑॥ आऽहं दी॒क्षाम॑रु॒हमृ॑तस्य प॒त्नीम्। गा॒यत्रे॑ण
छ॒न्दसा॑ ब्र॒ह्मणा॑ च। ऋ॒तग्ं स॒त्येऽधा॑यि। स॒त्यमृ॑तेऽधा॑यि। ऋ॒तं च मे॑ स॒त्यं
चा॑भू॒ताम्। ज्यो॑ति॒रभू॒वग्ं सु॑व॒रग॑मम्। सु॒वर्गं॑ लो॒कं ना॑कस्य पृ॒ष्ठम्। ब्र॒ध्नस्य॑
वि॒ष्टप॑मगमम्॥ पृ॒थि॒वी दी॒क्षा॥ [८२] तया॑ऽग्नि॒दीक्ष॑या दी॒क्षितः॑। यया॑ऽग्नि॒दीक्ष॑या
दी॒क्षितः॑। तया॑ त्वा दी॒क्षया॑ दी॒क्षयामि॑। अ॒न्तरि॑क्षं दी॒क्षा। तया॑ वा॒युर्दी॒क्षया॑
दी॒क्षितः॑। यया॑ वा॒युर्दी॒क्षया॑ दी॒क्षितः॑। तया॑ त्वा दी॒क्षया॑ दी॒क्षयामि॑। द्यौर्दी॒क्षा।
तया॑ऽऽदि॒त्यो दी॒क्षया॑ दी॒क्षितः॑। यया॑ऽऽदि॒त्यो दी॒क्षया॑ दी॒क्षितः॑। [८३] तया॑ त्वा
दी॒क्षया॑ दी॒क्षयामि॑। दि॒शो दी॒क्षा। तया॑ च॒न्द्रमा॑ दी॒क्षया॑ दी॒क्षितः॑। यया॑ च॒न्द्रमा॑
दी॒क्षया॑ दी॒क्षितः॑। तया॑ त्वा दी॒क्षया॑ दी॒क्षयामि॑। आपो॑ दी॒क्षा। तया॑ वरु॒णो रा॒जा
दी॒क्षया॑ दी॒क्षितः॑। यया॑ वरु॒णो रा॒जा दी॒क्षया॑ दी॒क्षितः॑। तया॑ त्वा दी॒क्षया॑
दी॒क्षयामि॑। ओष॑धयो दी॒क्षा। [८४] तया॑ सो॒मो रा॒जा दी॒क्षया॑ दी॒क्षितः॑। यया॑
सो॒मो रा॒जा दी॒क्षया॑ दी॒क्षितः॑। तया॑ त्वा दी॒क्षया॑ दी॒क्षयामि॑। वाग् दी॒क्षा। तया॑
प्रा॒णो दी॒क्षया॑ दी॒क्षितः॑। यया॑ प्रा॒णो दी॒क्षया॑ दी॒क्षितः॑। तया॑ त्वा दी॒क्षया॑
दी॒क्षयामि॑। पृ॒थि॒वी त्वा दी॒क्षमा॑णमनु दी॒क्षता॑म्। अ॒न्तरि॑क्षं त्वा दी॒क्षमा॑णमनु
दी॒क्षता॑म्। द्यौस्त्वा दी॒क्षमा॑णमनु दी॒क्षता॑म्। [८५] दि॒शस्त्वा दी॒क्षमा॑णमनु
दी॒क्षन्ता॑म्। आप॑स्त्वा दी॒क्षमा॑णमनु दी॒क्षन्ता॑म्। ओष॑धयस्त्वा दी॒क्षमा॑णमनु

दीक्षन्ताम्। वाक्त्वा दीक्षमाणमनु दीक्षताम्। ऋचस्त्वा दीक्षमाणमनु दीक्षन्ताम्।
सामानि त्वा दीक्षमाणमनु दीक्षन्ताम्। यजूगंषि त्वा दीक्षमाणमनु दीक्षन्ताम्।
अहश्च रात्रिश्च। कृषिश्च वृष्टिश्च। त्विषिश्चापचितिश्च। [८६] आपश्चौषधयश्च। ऊर्वर्च
सूनृता च। तास्त्वा दीक्षमाणमनु दीक्षन्ताम्॥ स्वे दक्षे दक्षपितेह सीद।
देवानागं सुम्नो महते रणाय। स्वासस्थस्तनुवा संविशस्व। पितेवैधि सूनव
आसुशेवः॥ शिवो मा शिवमाविश। सत्यं म आत्मा। श्रद्धा मेऽक्षितिः। [८७]
तपो मे प्रतिष्ठा। सवितृप्रसूता मा दिशो दीक्षयन्तु। सत्यमस्मि॥ अहं त्वदस्मि
मदसि त्वमेतत्। ममासि योनिस्तव योनिरस्मि। ममैव सन्वह हव्यान्यग्ने। पुत्रः
पित्रे लोककृज्जातवेदः॥ आजुह्वानः सुप्रतीकः पुरस्तात्। अग्ने स्वां
योनिमासीद साध्या। अस्मिन्धसधस्थे अध्युत्तरस्मिन्। [८८] विश्वे देवा
यजमानश्च सीदत॥ एकमिषे विष्णुस्त्वाऽन्वेतु। द्वे ऊर्जे विष्णुस्त्वाऽन्वेतु। त्रीणि
व्रताय विष्णुस्त्वाऽन्वेतु। चत्वारि मायो भवाय विष्णुस्त्वाऽन्वेतु। पञ्च पशुभ्यो
विष्णुस्त्वाऽन्वेतु। षड्रायस्पोषाय विष्णुस्त्वाऽन्वेतु। सप्त सप्तभ्यो होत्राभ्यो
विष्णुस्त्वाऽन्वेतु॥ सखायः सप्तपदा अभूमा सख्यं ते गमेयम्। [८९] सख्यात्ते
मा योषम्। सख्यान्मे मा योषाः॥ साऽसि सुब्रह्मण्ये। तस्यास्ते पृथिवी पादः।
साऽसि सुब्रह्मण्ये। तस्यास्तेऽन्तरिक्षं पादः। साऽसि सुब्रह्मण्ये। तस्यास्ते द्यौः
पादः। साऽसि सुब्रह्मण्ये। तस्यास्ते दिशः पादः। [९०] परोरजास्ते पञ्चमः
पादः। सा न इषमूर्जं धुक्ष्वा तेज इन्द्रियम्। ब्रह्मवर्चसमन्नाद्यम्॥ विमिमे त्वा
पयस्वतीम्। देवानां धेनुगं सुदुधामनपस्फुरन्तीम्। इन्द्रः सोमं पिबतु। क्षेमो
अस्तु नः॥ इमां नराः कृणुत वेदिमेत्या। वसुमतीगं रुद्रवतीमादित्यवतीम्। [९१]
वर्ष्मन्दिवः। नाभा पृथिव्याः। यथाऽयं यजमानो न रिष्येत्। देवस्य सवितुः

स॒वे॥ च॒तुःशि॒खण्डा॑ यु॒वतिः॑ सु॒पेशाः॑। घृ॒तप्र॑तीका भु॒वन॑स्य म॒ध्यै। तस्या॑गं
सु॒पर्णा॑वधि यौ नि॒विष्टौ। तयो॑र्दे॒वाना॑मधि भा॒गधे॑यम्॥ अप॒ ज॒न्यं भ॒यं नु॑दा
अप॒ च॒क्राणि॑ वर्त॒या। गृ॒हगं॑ सोम॒स्य ग॑च्छ॒तम्॥ न वा उ॑वे॒तन्म्रि॑यसे न रि॒ष्यसि॑।
दे॒वागं॑ इ॒देषि॑ प॒थिभिः॑ सु॒गेभिः॑। यत्र॒ यन्ति॑ सु॒कृतो॑ नापि दु॒ष्कृतः॑। तत्र॒ त्वा
दे॒वः स॒विता॑ द॒धातु॑॥[११]

यद॒स्य पा॑रे रज॒सः। शु॒क्रं ज्यो॑तिरजा॒यत। तन्नः॑ प॒रुष॑दति द्विषः। अ॒ग्ने वै॒श्वान॑र
स्वाहा॥ यस्मा॑द्भीषाऽवाशि॒ष्टाः। ततो॑ नो अ॒भयं॑ कृ॒धि। प्र॒जाभ्यः॑ सर्वा॑भ्यो मृ॒डा।
नमो॑ रु॒द्राय॑ मी॒ढुषे॑॥ यस्मा॑द्भीषा न्यष॒दः। ततो॑ नो अ॒भयं॑ कृ॒धि॥[१३] प्र॒जाभ्यः॑
सर्वा॑भ्यो मृ॒डा। नमो॑ रु॒द्राय॑ मी॒ढुषे॑॥ उ॒दुस्र॑ तिष्ठ प्र॒तिति॑ष्ठ मा रिषः। मेमं॑ य॒ज्ञं
यज॑मानं च रीरिषः। सु॒वर्गे॑ लो॒के यज॑मानं हि धे॒हि। शं न ए॒धि द्वि॒पदे॑ शं
चतु॑ष्पदे॥ यस्मा॑द्भीषाऽवे॒पिष्ठाः प॒लायि॑ष्ठाः स॒मज्ञा॑स्थाः। ततो॑ नो अ॒भयं॑ कृ॒धि।
प्र॒जाभ्यः॑ सर्वा॑भ्यो मृ॒डा। नमो॑ रु॒द्राय॑ मी॒ढुषे॑॥[१४] य इ॒दम॑कः। तस्मै॒ नमः॑।
तस्मै॒ स्वाहा॑॥ न वा उ॑वे॒तन्म्रि॑यसे। आ॒शानां॑ त्वा वि॒श्वा आ॒शाः॥ य॒ज्ञस्य॑ हि
स्थ ऋ॒त्वि॒यौ। इन्द्रा॑ग्नी चे॒तन॑स्य चा हु॒ताहु॑तस्य तृ॒प्यत॑म्। अहु॑तस्य हु॒तस्य
चा हु॑तस्य चाहु॑तस्य चा। अहु॑तस्य हु॒तस्य॑ चा इन्द्रा॑ग्नी अ॒स्य सोम॑स्य। वी॒तं
पि॒बतं॑ जु॒षेथा॑म्। मा यज॑मानं तमो॑ वि॒दत्। म॒र्त्विजो॑ मो इ॒माः प्र॒जाः। मा यः
सोम॑मिमं पि॒बात्। स॒गं सृष्ट॑मु॒भयं॑ कृ॒तम्॥[१५]

अ॒ना॒ग॒स॒स्त्वा व॒यम्। इ॒न्द्रेण॑ प्रे॒षिता॑ उ॒प। वा॒यु॒ष्टे अ॒स्त्वग्ं॑श॒भूः। मि॒त्रस्ते॑
अ॒स्त्वग्ं॑श॒भूः। वरु॑णस्ते अ॒स्त्वग्ं॑श॒भूः॥ अ॒पां क्ष॒या ऋ॒तस्य॑ गर्भाः। भुव॑नस्य
गो॒पाः इ॒येना॑ अतिथयः। पर्व॑तानां ककु॒भः प्र॒युतो॑ नपा॒तारः। व॒ग्नुने॑न्द्र॒ग्
ह्वय॑त। घो॒षेणा॑मीवाग्श्चा॒तय॑त। [१६] यु॒क्ताः स्थ॑ वह॒त॥ दे॒वा ग्रा॒वाण॑ इ॒न्दुरि॒न्द्र
इ॒त्यवा॑दिषुः। ए॒न्द्रम॑चु॒च्यवुः॑ पर॒मस्याः॑ परा॒वतः॑। आ॒ऽस्मात्स॒धस्था॑त्।
ओ॒रोर॑न्तरि॒क्षात्। आ सु॒भूत॑म॒सुष॑वुः। ब्र॒ह्मव॑र्च॒सं म आ॒ऽसु॑षवुः। स॒मरे
र॒क्षाग्ं॑स्यव॒धिषुः॑। अ॒प॒हतं॑ ब्र॒ह्मज्य॑स्य॥ वाक्च॑ त्वा म॒नश्च॑ श्रिणी॒ताम्। [१७]
प्रा॒णश्च॑ त्वाऽपान॑श्च श्रीणी॒ताम्। चक्षु॑श्च त्वा श्रो॒त्रं च॑ श्रीणी॒ताम्। दक्ष॑श्च त्वा
ब॒लं च॑ श्रीणी॒ताम्। ओज॑श्च त्वा स॒हश्च॑ श्रीणी॒ताम्। आयु॑श्च त्वा ज॒रा च॑
श्रीणी॒ताम्। आ॒त्मा च॑ त्वा त॒नूश्च॑ श्रीणी॒ताम्। शृ॒तोऽसि॑ शृ॒तं कृ॑तः। शृ॒ताय॑ त्वा
शृ॒तेभ्य॑स्त्वा॥ यमि॒न्द्रमा॑हुर्व॒रुणं॑ यमा॒हुः। यं मि॒त्रमा॑हु॒र्यमु॑ स॒त्यमा॑हुः। [१८] यो
दे॒वानां॑ दे॒वत॑मस्तपो॒जाः। तस्मै॑ त्वा तेभ्य॑स्त्वा॥ मयि॑ त्यदि॒न्द्रियं॑ म॒हत्। मयि॑
दक्षो॑ मयि॒ ऋतुः॑। मयि॑ धा॒यि सु॒वीर्य॑म्॥ त्रि॒शु॒घ॒र्मो वि॒भातु॑ मे। आ॒कू॒त्या
म॒नसा॑ स॒ह। वि॒राजा॑ ज्योति॒षा स॒ह। य॒ज्ञेन॑ प॒यसा॑ स॒ह। तस्य॑ दो॒हम॑शीमहि।
[१९] तस्य॑ सु॒म्नम॑शीमहि। तस्य॑ भ॒क्षम॑शीमहि। वा॒ग्जु॒षाणा॑ सोम॒स्य तृ॑प्यतु॥
मि॒त्रो ज॒नान्प्र॑ स मि॒त्र॥ यस्मान्न॑ जा॒तः प॒रो अ॒न्यो अ॒स्ति। य आ॑वि॒वेश
भुव॑नानि वि॒श्वा॥ प्र॒जाप॑तिः प्र॒जया॑ संवि॒दानः॑। त्रीणि॑ ज्योती॒ग्ंषि स॑च॒ते स
षोड॑शी॥ एष॑ ब्र॒ह्मा य ऋ॒त्वियः॑। इ॒न्द्रो ना॑म श्रु॒तो ग॒णे॥ [१००] प्र ते॑ म॒हे वि॒दथे॑
श॒ग्ं॒सि॒षग्ं॑ ह॒री। य ऋ॒त्वियः॑ प्र ते॑ व॒न्वे। व॒नुषो॑ ह॒र्यतं॑ म॒दम्॥ इ॒न्द्रो ना॑म घृ॒तं

न यः। हरिभिश्चारु सेचते। श्रुतो गण आ त्वा विशन्तु। हरिर्वर्षसं गिरः॥
 इन्द्राधिपतेऽधिपतिस्त्वं देवानामसि। अधिपतिं माम्। आयुष्मन्तं वर्चस्वन्तं
 मनुष्येषु कुरु॥[१०१] इन्द्रश्च सम्राड्वरुणश्च राजा। तौ ते भक्षं चक्रतुरग्र एतम्।
 तयोरनु भक्षं भक्षयामि। वाग्जुषाणा सोमस्य तृप्यतु॥ प्रजापतिर्विश्वकर्मा।
 तस्य मनो देवं यज्ञेन राध्यासम्। अर्थे गा अस्य जहितः। अवसानपतेऽवसानं
 मे विन्द॥ नमो रुद्राय वास्तोष्पतये। आयने विद्रवणे॥[१०२] उद्याने यत्परायणे।
 आवर्तने विवर्तने। यो गोपायति तर्गं हुवे॥ यान्यपामित्यान्यप्रतीतान्यस्मि।
 यमस्य बलिना चरामि। इहैव सन्तः प्रति तद्यातयामः। जीवा जीवेभ्यो
 निहराम एनत्॥ अनृणा अस्मिन्ननृणाः परस्मिन्। तृतीये लोके अनृणाः स्यामा।
 ये देवयाना उत्त पितृयाणाः॥[१०३] सर्वान् पथो अनृणा आक्षीयेम॥ इदमू नु
 श्रेयोऽवसानमागन्म। शिवे नो द्यावापृथिवी उभे इमे।
 गोमद्धनवदश्चवदूर्जस्वत्। सुवीरा वीरैरनु संचरेम॥ अर्कः पवित्रगं रजसो
 विमानः। पुनाति देवानां भुवनानि विश्वा। द्यावापृथिवी पयसा संविदाने। घृतं
 दुहाते अमृतं प्रपीने॥ पवित्रमर्को रजसो विमानः। पुनाति देवानां भुवनानि
 विश्वा। सुवर्ज्योतिर्यशो महत्। अशीमहि गाधमुत प्रतिष्ठाम्॥[१०४]

उदस्तांप्सीत्सविता मित्रो अर्यमा। सर्वान्मित्रानवधीद्युगेन। बृहन्तं
 मामकरद्वीरवन्तम्। रथन्तरे श्रयस्व स्वाहा पृथिव्याम्॥ वामदेव्ये श्रयस्व
 स्वाहाऽन्तरिक्षे॥ बृहति श्रयस्व स्वाहा दिवि॥ बृहता त्वोपस्तभ्नोमि॥ आ त्वा

ददे॑ यश॑से वी॒र्या॑य च। अ॒स्मास्व॑ध्निया यू॒यं द॑धाथेन्द्रि॒यं प॑यः॥ यस्तै॑ द्र॒प्सो
 यस्त॑ उद॒र्षः। [१०५] दै॒व्यः के॒तुर्वि॑श्वं भुव॑नमा॒विवेश॑। स नः॑ पा॒ह्यरि॑ष्यै
 स्वाहा॑॥ अनु॑ मा॒ सर्वा॑ य॒ज्ञोऽय॑मेतु। विश्वे॑ दे॒वा म॒रुतः॑ सा॒माकः॑।
 आ॒प्रिय॑श्छन्दा॒गंसि॑ नि॒विदो॑ य॒जूर्गं॑षि। अ॒स्यै पृ॒थिव्यै॑ यद्य॒ज्ञिय॑म्॥
 प्र॒जाप॑तेर्व॒र्तनि॑मनुव॒र्तस्वा॑। अनु॑ वी॒रैरनु॑ रा॒ध्याम॑ गो॒भिः। अ॒न्वश्चै॒रनु॑ सर्वै॒रु
 पु॒ष्टैः। अनु॑ प्र॒जया॑ऽन्विन्द्रि॒येण॑। [१०६] दे॒वा नो॑ य॒ज्ञमृ॑जुधा न॒यन्तु॑॥ प्र॒ति क्ष॑त्रे
 प्र॒ति ति॑ष्ठामि रा॒ष्ट्रे। प्र॒त्यश्चे॑षु प्र॒तिति॑ष्ठामि गो॒षु। प्र॒ति प्र॒जायां॑ प्र॒ति ति॑ष्ठामि
 भ॒व्यै॥ वि॒श्वम॒न्याऽभि॑ वावृ॒धे। तद॒न्यस्या॒मधि॑श्रितम्। दि॒वे च॑ वि॒श्वक॑र्मणे।
 पृ॒थिव्यै॑ चा॒करं॑ नमः॥ अ॒स्कान्द्यौः॑ पृ॒थिवी॑म्। अ॒स्कानृ॑षभो यु॒वा गाः॑। [१०७]
 स्क॒न्नेमा॑ वि॒श्वा भु॑वना। स्क॒न्नो य॒ज्ञः प्र॑जनयतु॥ अ॒स्कान॑जनि प्रा॒जनि॑। आ
 स्क॒न्नाज्जा॑यते वृ॒षा। स्क॒न्नात्प्र॑जनिषीमहि॥ ये दे॒वा येषा॑मिदं भा॒गधे॑यं ब॒भूव।
 येषां॑ प्र॒याजा॑ उ॒तानू॑याजाः। इन्द्र॑ज्येष्ठेभ्यो वरु॒णरा॑जभ्यः। अ॒ग्निहो॑तृभ्यो
 दे॒वेभ्यः॑ स्वाहा॑॥ उ॒त त्या॑ नो दि॒वा म॒तिः। [१०८] अ॒दितिरू॑त्याऽऽग॒मत्। सा
 श॒न्ताची॑ मय॒स्कर॑त्। अप॒ सि॒धः॥ उ॒त त्या॑ दै॒व्या भि॑षजा। शं न॒स्कर॑तो
 अ॒श्विना॑। यू॒याता॑म॒स्मद्र॑पः। अप॒ सि॒धः॥ श॒म॒ग्निर॒ग्निभि॑स्करत्। शं न॒स्तप॑तु
 सूर्यः॑। शं वा॒तो वा॒त्वर॑पाः। [१०९] अप॒ सि॒धः॥ तदि॒त्पदं॑ न वि॒चिके॑त वि॒द्वान्।
 यन्मृ॑तः पु॒नर॑प्येति जी॒वान्। त्रि॒वृ॒धद्भु॑वनस्य रथवृत्। जी॒वो गर्भो॑ न मृ॒तः स
 जी॒वात्॥ प्र॒त्यस्मै॑ पिपीषते। वि॒श्वानि॑ वि॒दुषे॑ भ॒रा अ॒रंग॑माय ज॒ग्मवे॑।
 अप॑श्चा॒दध्व॑ने नरे॑॥ इन्द्रु॑रिन्द्रु॒मवा॑गात्। इन्द्रो॑रिन्द्रो॒ऽपात्। तस्य॑ त
 इन्द्र॑विन्द्र॒पीत॑स्य मधु॒मतः॑। उप॒हूत॑स्योप॒हूतो॑ भक्षयामि॥ [११०]

ब्रह्म॑ प्रति॒ष्ठा॒ मन॑सो ब्रह्म॑ वाचः। ब्रह्म॑ य॒ज्ञाना॑गं ह॒विषा॑माज्य॒स्य। अति॑रिक्तं
 कर्म॑णो यच्च॑ ही॒नम्। य॒ज्ञः प॑र्वाणि प्रति॒रन्ने॑ति कल्पयन्। स्वाहा॑कृ॒ताऽऽहु॑तिरेतु
 दे॒वान्॥ आ॒श्रावि॑तम॒त्याश्रा॑वितम्। वषट्कृतम॒त्यनू॑क्तं च य॒ज्ञे। अति॑रिक्तं कर्म॑णो
 यच्च॑ ही॒नम्। य॒ज्ञः प॑र्वाणि प्रति॒रन्ने॑ति कल्पयन्। स्वाहा॑कृ॒ताऽऽहु॑तिरेतु दे॒वान्॥
 [१११] यद्धो॑ दे॒वा अति॑पादयानि। वा॒चा चि॒त्प्रय॑तं दे॒व हे॒डन॑म्। अ॒रायो अ॒स्माग्
 अ॒भिदु॑च्छुनायते। अन्यत्रा॒स्मन्म॑रुतस्तन्निधे॒तन॑॥ ततं॑ म आप॒स्तदु॑ ता॒यते पुनः॑।
 स्वादि॑ष्ठा धी॒तिरु॑चथाय शस्यते। अ॒यग्ं स॒मुद्र॑ उ॒त वि॒श्वभे॑षजः। स्वाहा॑कृतस्य
 स॒मुत्तृ॑णुत॒र्भुवः॑। उ॒द्वयं॑ तम॒सस्परि॑। उ॒दु त्यं चि॒त्रम्। [११२] इ॒मं मे॑ वरुण॒ तत्त्वा॑
 या॒मि। त्वं नो॑ अ॒ग्ने स॒ त्वं नो॑ अ॒ग्ने। त्वम॑ग्ने अ॒यासि॑ प्र॒जाप॑ते॥ इ॒मं
 जी॒वेभ्यः॑ परि॒धिं द॑धामि। मैषां॑ नु गा॒दप॑रो अ॒र्धमे॒तम्। श॒तं जी॑वन्तु श॒रदः॑
 पु॒रूचीः॑। ति॒रो मृ॒त्युं द॑धतां प॒र्वते॑न॥ इ॒ष्टेभ्यः॑ स्वाहा॒ वष॑डनि॒ष्टेभ्यः॑ स्वाहा॑॥
 भे॒षजं॑ दु॒रिष्यै॑ स्वाहा॒ निष्कृ॑त्यै स्वाहा॑॥ दौ॒रा॒र्ध्यै स्वाहा॑ दै॒वीभ्य॑स्तनू॒भ्यः
 स्वाहा॑॥ [११३] ऋ॒द्ध्यै स्वाहा॑ स॒मृद्ध्यै॑ स्वाहा॑॥ य॒त इन्द्र॑ भया॒महे। ततो॑ नो
 अ॒भयं॑ कृ॒धि। मघ॑वञ्छ॒ग्धि तव॑ तन्न ऊ॒तये॑॥ वि॒ द्विषो॑ वि॒ मृधो॑ जहि॑॥
 स्व॒स्तिदा॑ वि॒शस्प॑तिः। वृ॒त्रहा॑ वि॒मृधो॑ व॒शी। वृ॒षेन्द्रः॑ पु॒र ए॒तु नः॑। स्व॒स्तिदा॑
 अ॒भयं॑करः॥ आ॒भिर्गी॑र्भिर्य॒दतो॑ न ऊ॒नम्। [११४] आ॒प्याय॑य ह॒रिवो॑ वर्ध॒मानः॑।
 य॒दा स्तो॑तृ॒भ्यो म॒हि गो॒त्रा रु॒जासि॑। भू॒यिष्ठ॑भा॒जो अध॑ ते स्या॒मा॥ अना॑ज्ञातं
 यदा॑ज्ञातम्। य॒ज्ञस्य॑ क्रि॒यते॒ मिथु॑। अ॒ग्ने तद॑स्य कल्पय। त्वग्ं॑ हि वे॒त्थ
 यथा॑तथम्॥ पु॒रुष॑सं॒मितो॒ य॒ज्ञः। य॒ज्ञः पु॒रुष॑सं॒मितः। अ॒ग्ने तद॑स्य कल्पय।
 त्वग्ं॑ हि वे॒त्थ यथा॑तथम्॥ य॒त्पाक॑त्रा॒ मन॑सा दी॒नद॑क्षा॒ ना य॒ज्ञस्य॑ म॒न्वते॑

मर्ता॑सः। अ॒ग्नि॑ष्ट॒द्धो॒ता॑ ॥ ऋ॒तु॑वि॒द्वि॒जान॑न्। यजि॑ष्ठो दे॒वाग्ं ॥ ऋ॒तु॑शो य॒जाति॑॥ [११५]

यद्दे॒वा दे॒व॒हे॒ड॒नम्। दे॒वा॒सश्च॑कृ॒मा व॒यम्। आ॒दि॒त्या॒स्तस्मा॑न्मा मुञ्च॒ता॑
 ऋ॒तस्य॑र्ते॒न मा॒मु॒ता॑॥ दे॒वा जी॒वन॑का॒म्या यत्। वा॒चाऽनृ॑तमू॒दि॒मा। अ॒ग्नि॒र्मा
 तस्मा॑दे॒नसः॑। गा॒र्ह॒प॒त्यः प्र॑मुञ्चतु। दु॒रि॒ता या॒नि च॑कृ॒मा। क॒रो॒तु मा॒मने॑नसम्॥
 [११६] ऋ॒तेन॑ द्या॒वापृ॑थि॒वी। ऋ॒तेन॑ त्वग्ं॒ सर॑स्वति। ऋ॒ता॒न्मा मु॒ञ्च॒ताग्ं॒ह॒सः॑।
 यद॒न्यकृ॑तमा॒रि॒मा॑॥ स॒जा॒त॒शग्ं॒सा॒दु॒त वा॑ जा॒मि॒शग्ं॒सा॒त्। ज्या॑य॒सः शग्ं॒सा॒दु॒त
 वा॒ क॒नी॒य॒सः॑। अ॒ना॒ज्ञा॒तं दे॒वकृ॑तं यदे॒नः॑। तस्मा॑त्त्व॒मस्मा॑ज्जा॒तवे॑दो मुमु॒ग्धि॑॥
 यद्वा॒चा य॒न्म॒न॒सा॑। बा॒हु॒भ्या॒मू॒रु॒भ्या॒म॒ष्टी॒वद्भ्या॑म्॥ [११७] शि॒श्नैर्य॑द॒नृ॒तं च॑कृ॒मा
 व॒यम्। अ॒ग्नि॒र्मा तस्मा॑दे॒नसः॑॥ यद्ध॒स्ता॒भ्यां च॑कर॒ कि॒ल्बि॑षाणि। अ॒क्षाणां॑
 व॒ग्नु॒मु॒प॒जिघ्न॑मानः। दू॒रे॒प॒श्या च॑ रा॒ष्ट्र॒भृ॒च्चा। ता॒न्यप्स॑रसा॒व॒नु॒द॒त्ता॒मृ॒णा॒नि॑॥
 अ॒दी॒व्य॒नृ॒णं यद॑हं च॒का॒र। यद्वा॑ऽदा॒स्य॒न्थ॒सं॒ज॒गा॒रा ज॒ने॒भ्यः॑। अ॒ग्नि॒र्मा
 तस्मा॑दे॒नसः॑॥ यन्म॑यि मा॒ता गर्भं॑ स॒ति॑॥ [११८] ए॒नश्च॑का॒र य॒त्पि॒ता॑। अ॒ग्नि॒र्मा
 तस्मा॑दे॒नसः॑॥ यदा॑ पि॒पे॒ष मा॒तरं॑ पि॒तर॑म्। पु॒त्रः प्र॑मु॒दि॒तो ध॑यन्। अ॒हि॒ग्ं॒सि॒तौ
 पि॒तरौ॑ म॒या तत्। तद॑ग्ने अ॒नृ॒णो भ॑वामि॥ यद॒न्तरि॑क्षं पृथि॒वीमु॑त द्याम्।
 यन्मा॑तरं पि॒तरं॑ वा जि॒हि॒ग्ं॒सि॒मा। अ॒ग्नि॒र्मा तस्मा॑दे॒नसः॑॥ यदा॑श॒सा नि॑शसा
 यत्प॑राश॒सा॑॥ [११९] यदे॒नश्च॑कृ॒मा नू॒त॒नं य॑त्यु॒रा॒णम्। अ॒ग्नि॒र्मा तस्मा॑दे॒नसः॑॥
 अ॒ति॒क्रा॒मा॒मि दु॒रि॒तं यदे॑नः। ज॒हा॒मि रि॒प्रं प॑रमे स॒ध॒स्थे॑॥ यत्र॑ य॒न्ति सु॑कृ॒तो
 ना॒पि दु॒ष्कृ॑तः। तमा॑रो॒हामि॑ सु॒कृ॒तां नु॑ लो॒कम्॥ त्रि॒ते दे॒वा अ॑मृ॒जतै॑तदे॒नः॑।
 त्रि॒त ए॒तन्म॑नु॒ष्येषु॑ मा॒मृ॒जे। ततो॑ मा॒ यदि॑ कि॒ञ्चि॑दा॒न॒शे। अ॒ग्नि॒र्मा तस्मा॑दे॒नसः॑॥

[१२०] गार्हपत्यः प्रमुञ्चतु। दुरिता यानि चकृम। करोतु मामनेनसम्॥ दिवि
जाता अप्सु जाताः। या जाता ओषधीभ्यः। अथो या अग्निजा आपः। ता नः
शुन्धन्तु शुन्धनीः॥ यदापो नक्तं दुरितं चराम। यद्वा दिवा नूतनं यत्पुराणम्।
हिरण्यवर्णास्तत उत्पुनीत नः॥ इमं मे वरुण तत्त्वा यामि। त्वं नो अग्ने स त्वं
नो अग्ने। त्वमग्ने अयाऽसि॥[१२१]

यत्ते ग्राव्णा चिच्छिदुः सोम राजन्। प्रियाण्यङ्गानि स्वधिता परूग्ंषि।
तथ्संधत्स्वाज्येनोत वर्धयस्व। अनागसो अधमिथ्संक्षयेम॥ यत्ते ग्रावा
बाहुच्युतो अचुच्यवुः। नरो यत्ते दुदुहुर्दक्षिणेन। तत्त आप्यायतां तत्ते।
निष्च्यायतां देव सोम॥ यत्ते त्वचं बिभिदुर्यच्च योनिम्। यदास्थानात्प्रच्युतो
वेनसि त्मना॥[१२२] त्वया तथ्सोम गुप्तमस्तु नः। सा नः संधाऽसत्परमे
व्योमन्॥ अहाच्छरीरं पयसा समेत्य। अन्योऽन्यो भवति वर्णा अस्या।
तस्मिन्वयमुपहूतास्तव स्मः। आ नो भज सदसि विश्वरूपे॥ नृचक्षाः सोम
उत शुश्रुगस्तु। मा नो विहासीद्विर आवृणानः। अनागास्तनुवो वावृधानः। आ
नो रूपं वहतु जायमानः॥[१२३] उपक्षरन्ति जुह्वो घृतेन। प्रियाण्यङ्गानि तव
वर्धयन्तीः। तस्मै ते सोम नम इद्वषट्च। उप मा राजन्त्सुकृते ह्वयस्व॥ सं
प्राणापानाभ्याग्ं समु चक्षुषा त्वम्। सग्ग् श्रोत्रेण गच्छस्व सोम राजन्। यत्त

आस्थि॑त॒गुं श॒मु तत्ते॑ अस्तु। जा॒नी॒ता॒न्नः सं॒ग॒म॒ने प॒थी॒नाम्॥ ए॒तं
जा॒नी॒ता॒त्प॒र॒मे व्यो॑मन्। वृ॒काः स॒ध॒स्था वि॒द रू॒प॒म॒स्य॥ [१२४] यदा
गच्छा॑त्प॒थिभिर्दे॒व॒यानैः॥ इ॒ष्टा॒पूर्ते॑ कृ॒णु॒तादा॑वि॒र॒स्मै॥ अ॒रि॒ष्टो रा॒ज॒न्न॒गदः॑ प॒रेहि॑।
नम॑स्ते अस्तु चक्ष॑से रघू॒यते॑। ना॒क॒मा॒रोह॑ स॒ह य॒ज॒मा॒नेन॑। सू॒र्यं गच्छ॑तात्प॒र॒मे
व्यो॑मन्॥ अ॒भूद्दे॒वः स॒वि॒ता व॒न्द्योऽनु॑ नः। इ॒दानी॑म॒ह उप॑वाच्यो नृ॒भिः। वि॒ यो
र॒त्ना भ॑जति मा॒नवे॒भ्यः। श्रेष्ठं॑ नो अ॒त्र द्र॒वि॒णं यथा॑ द॒धत्॥ उप॑ नो
मि॒त्राव॑रुणावि॒हाव॑तम्। अ॒न्वादी॑ध्याथा॒मिह॑ नः सखा॑या। आ॒दि॒त्यानां॑ प्र॒सि॒तिर्
हे॒तिः। उ॒ग्रा श॒तापा॑ष्ठा घ॒ विषा॑ परि॒ णो वृ॑णक्तु॥ आ॒प्याय॑स्व सं ते॥ [१२५]

यदि॑दीक्षे॒ मन॑सा यच्च॑ वा॒चा। यद्वा॑ प्रा॒णैश्चक्षु॑षा यच्च॑ श्रो॒त्रेण॑। यद्रे॑तस
मि॒थु॒नेना॑प्या॒त्मना॑। अ॒द्भ्यो लो॒का द॑धिरे तेज इन्द्रि॒यम्। शु॒क्रा दी॒क्षायै॑ तप॑सो
वि॒मोच॑नीः। आपो॑ वि॒मोक्त्री॑र्मयि तेज इन्द्रि॒यम्॥ यदृ॒चा सा॒म्ना य॒जुषा॑
प॒शूनां॑ चर्मन् ह॒विषा॑ दिदीक्षे। यच्छ॑न्दोभि॒रोष॑धीभिर्वनस्प॒तौ। अ॒द्भ्यो लो॒का
द॑धिरे तेज इन्द्रि॒यम्॥ [१२६] शु॒क्रा दी॒क्षायै॑ तप॑सो वि॒मोच॑नीः। आपो॑
वि॒मोक्त्री॑र्मयि तेज इन्द्रि॒यम्॥ येन॑ ब्र॒ह्म येन॑ क्ष॒त्रम्। येन॑न्द्रा॒ग्नी प्र॒जाप॑तिः
सोमो॑ वरु॒णो येन॑ रा॒जा। वि॒श्वे दे॒वा ऋ॒षयो॑ येन॑ प्रा॒णाः। अ॒द्भ्यो लो॒का द॑धिरे
तेज इन्द्रि॒यम्। शु॒क्रा दी॒क्षायै॑ तप॑सो वि॒मोच॑नीः। आपो॑ वि॒मोक्त्री॑र्मयि तेज
इन्द्रि॒यम्॥ अ॒पां पु॒ष्प॒म॒स्योष॑धीना॒गुं रसः॑। सोम॑स्य प्रि॒यं धा॒मा॥ [१२७] अ॒ग्नेः
प्रि॒यत॑म॒गुं ह॒विः स्वा॒हा। अ॒पां पु॒ष्प॒म॒स्योष॑धीना॒गुं रसः॑। सोम॑स्य प्रि॒यं धा॒मा।
इन्द्र॑स्य प्रि॒यत॑म॒गुं ह॒विः स्वा॒हा। अ॒पां पु॒ष्प॒म॒स्योष॑धीना॒गुं रसः॑। सोम॑स्य

प्रियं धामा विश्वेषां देवानां प्रियतमं हविः स्वाहा॥ वयं सोम व्रते तवा
मनस्तनूषु पिप्रतः। प्रजावन्तो अशीमहि॥[१२८] देवेभ्यः पितृभ्यः स्वाहा॥
सोम्येभ्यः पितृभ्यः स्वाहा॥ कव्येभ्यः पितृभ्यः स्वाहा॥ देवास इह
मादयध्वम्। सोम्यास इह मादयध्वम्। कव्यास इह मादयध्वम्॥ अनन्तरिताः
पितरः सोम्याः सोमपीथात्॥ अपैतु मृत्युरमृतं न आगन्। वैवस्वतो नो
अभयं कृणोतु। पर्णं वनस्पतेरिव॥[१२९] अभि नः शीयतां रयिः। सचतां नः
शचीपतिः॥ परं मृत्यो अनुपरेहि पन्थाम्। यस्ते स्व इतरो देवयानात्।
चक्षुष्मते शृण्वते ते ब्रवीमि। मा नः प्रजागं रीरिषो मोत वीरान्॥ इदमू नु
श्रेयोऽवसानमागन्म। यद्गोजिद्धनजिदश्चजिद्यत्। पर्णं वनस्पतेरिव। अभि नः
शीयतां रयिः। सचतां नः शचीपतिः॥[१३०]

॥हरिः ओम्॥

ॐ

तैत्तिरीय ब्राह्मणे तृतीयाष्टके अष्टम प्रपाठकः

॥अश्वमेधब्राह्मणं वैश्वदेवं काण्डं तत्र प्रथममहः॥

हरिः ओम्॥ सांग्रहण्येष्ट्या यजते। इमां जनतां संगृह्णीतीति॥ द्वादशारली
रशना भवति। द्वादश मासाः संवत्सरः। संवत्सरमेवावरुन्धे। मौञ्जी भवति।
ऊर्वे मुञ्जाः। ऊर्जमेवावरुन्धे॥ चित्रा नक्षत्रं भवति। चित्रं वा एतत्कर्म।[१]
यदश्वमेधः समृद्ध्यै॥ पुण्यनाम देवयजनमध्यवस्यति। पुण्यामेव तेन
कीर्तिमभि जयति॥ अपदातीनृत्विजः समावहन्त्या सुब्रह्मण्यायाः। सुवर्गस्य
लोकस्य समष्ट्यै॥ केशश्मश्रु वपते। नखानि निकृन्तते। दतो धावते। स्नाति।
अहतं वासः परिधत्ते। पाप्मनोऽपहत्यै। वाचं यत्वोपवसति। सुवर्गस्य लोकस्य
गुप्त्यै। रात्रिं जागरयन्त आसते। सुवर्गस्य लोकस्य समष्ट्यै॥[२]

चतुष्टय्य आपो भवन्ति। चतुश्शफो वा अश्वः प्राजापत्यः समृद्ध्यै। ता
दिग्भ्यः समाभृता भवन्ति। दिक्षु वा आपः। अन्नं वा आपः। अद्भ्यो वा अन्नं
जायते। यदेवाद्भ्योऽन्नं जायते। तदवरुन्धे॥ तासु ब्रह्मौदनं पचति। रेत एव
तदधाति।[३] चतुश्शरावो भवति। दिक्ष्वेव प्रतितिष्ठति॥ उभयतो रुक्मौ भवतः।
उभयत एवास्मिन्नुचं दधाति। उद्धरति शतत्वाया। सर्पिष्वान् भवति मेध्यत्वाया।
चत्वार आर्षेयाः प्राश्नन्ति। दिशामेव ज्योतिषि जुहोति॥ चत्वारि हिरण्यानि
ददाति। दिशामेव ज्योतीं गृष्यवरुन्धे॥ [४] यदाज्यमुच्छिष्यते। तस्मिन् शनां

न्यु॒न॒ति॒ । प्र॒जा॒प॒ति॒र्वा ओ॒द॒नः । रे॒त आ॒ज्यम् । यदा॒ज्ये र॒श॒नां न्यु॒न॒ति॒ ।
 प्र॒जा॒प॒ति॒मे॒व रे॒त॒सा स॒म॒र्थ॒य॒ति॒ ॥ द॒र्भ॒म॒यी र॒श॒ना भ॒व॒ति॒ । ब॒हु वा ए॒ष
 कु॒च॒रोऽमे॒ध्यमु॒प॒गच्छ॑ति । यद॒श्वः । प॒वि॒त्रं वै द॒र्भाः ॥५॥ यद॒र्भ॒म॒यी र॒श॒णा भ॒व॒ति॒ ।
 पु॒ना॒त्ये॒वैनम् । पू॒त॒मे॒नं मे॒ध्यमा॒ल॒भ॒ते ॥ अ॒श्व॒स्य वा आ॒ल॒ब्ध॒स्य म॒हि॒मो॒द॒क्राम॑त् ।
 स म॒ह॒र्त्वि॒जः प्रा॒वि॒शत् । त॒न्म॒ह॒र्त्वि॒जां म॒ह॒र्त्वि॒क्त्वम् । य॒न्म॒ह॒र्त्वि॒जः प्रा॒श्न॒न्ति॒ ।
 म॒हि॒मा॒नमे॒वास्मि॑न्तद॒धाति॒ । अ॒श्व॒स्य वा आ॒ल॒ब्ध॒स्य रे॒त उ॒द॒क्राम॑त् । तथ्सु॒व॒र्ण॒गं
 हि॒र॒ण्य॒मभ॑वत् । यथ्सु॒व॒र्ण॒गं हि॒र॒ण्यं द॑दाति । रे॒त ए॒व तद॑धाति । ओ॒द॒ने द॑दाति ।
 रे॒तो वा ओ॒द॒नः । रे॒तो हि॒र॒ण्यम् । रे॒तसै॒वास्मि॑न्ने॒तो द॑धाति ॥६॥

यो वै ब्र॒ह्म॒णे दे॒वेभ्यः॑ प्र॒जा॒प॒तयेऽप्र॑तिप्रो॒च्याश्च॑ मे॒ध्यं ब॒ध्ना॒ति॒ । आ दे॒वता॑भ्यो
 वृ॒क्ष्य॒ते । पापी॑यान् भवति । यः प्र॒तिप्रो॒च्या न दे॒वता॑भ्य आ॒वृ॒क्ष्य॒ते । वसी॑यान्
 भवति ॥ यदा॒ह । ब्र॒ह्म॒न्नश्च॑ मे॒ध्यं भ॑न्त्स्यामि दे॒वेभ्यः॑ प्र॒जा॒प॒तये ते॒न
 रा॒ध्या॒स॒मि॒ति॒ । ब्र॒ह्म वै ब्र॒ह्मा । ब्र॒ह्म॒ण ए॒व दे॒वेभ्यः॑ प्र॒जा॒प॒तये प्र॑तिप्रो॒च्याश्च॑
 मे॒ध्यं ब॒ध्ना॒ति॒ ॥७॥ न दे॒वता॑भ्य आ॒वृ॒क्ष्य॒ते । वसी॑यान् भवति ॥ दे॒व॒स्य त्वा
 स॒वि॒तुः प्र॑स॒व इति॑ र॒श॒नामा॒द॒त्ते प्र॑सू॒त्यै । अ॒श्विनौर्बा॒हुभ्या॑मित्या॒ह । अ॒श्विनौ हि
 दे॒वाना॑मध्व॒र्यू आ॑स्ताम् । पू॒ष्णो ह॑स्ताभ्या॒मित्या॑ह य॒त्यै ॥ व्य॒ब्धं वा ए॒तद्य॒ज्ञस्य॑ ।
 यद॒यजु॑ष्के॒ण क्रि॒यते॑ । इ॒मां गृ॑भ्णन्न॒श॒नामृ॑तस्येत्य॒धिव॑दति यजु॑ष्कृत्यै । य॒ज्ञस्य॑
 स॒मृद्ध्यै ॥८॥ तदा॒हुः । द्वा॒द॒शा॒र॒ली र॒श॒ना क॑र्त॒व्या॒३ त्रयो॑द॒शा॒र॒ली॒३ रि॒ति॒ ।
 ऋ॒षभो॑ वा ए॒ष ऋ॒तूना॑म् । यथ्सं॒व॒त्स॒रः । तस्य॑ त्रयो॒द॒शो मा॒सो वि॑ष्ट॒पम् । ऋ॒षभ
 ए॒ष य॒ज्ञा॒नाम् । यद॒श्वमे॒धः । यथा॑ वा ऋ॒षभ॑स्य वि॒ष्ट॒पम् । ए॒वमे॒तस्य॑ वि॒ष्ट॒पम् ।

त्रयोदशमरत्निङ् रशनायामुपादधाति। [९] यथर्षभस्य विष्टपङ् सङ् स्क्रोति।
 तादृगेव तत्। पूर्व आयुषि विदथेषु कव्येत्याह। आयुरेवास्मिन्दधाति। तया
 देवाः सुतमाबभूवुरित्याह। भूतिमेवोपावर्तते। ऋतस्य सामन्त्सरमारपन्तीत्याह।
 सत्यं वा ऋतम्। सत्येनैवैनमृतेनारभते॥ अभिधा असीत्याह। [१०]
 तस्मादश्वमेधयाजी सर्वाणि भूतान्यभिभवति। भुवनमसीत्याह। भूमानमेवोपैति।
 यन्ताऽसीत्याह। यन्तारमेवैनं करोति। धर्ताऽसीत्याह। धर्तारमेवैनं करोति।
 सोऽग्निं वैश्वानरमित्याह। अग्नावेवैनं वैश्वानरे जुहोति। सप्रथसमित्याह। [११]
 प्रजयैवैनं पशुभिः प्रथयति। स्वाहाकृत इत्याह। होम एवास्यैषः।
 पृथिव्यामित्याह। अस्यामेवैनं प्रतिष्ठापयति। यन्ता राङ्मन्ताऽसि यमनो धर्ताऽसि
 धरुण इत्याह। रूपमेवास्यैतन्महिमानं व्याचष्टे॥ कृष्यै त्वा क्षेमाय त्वा रथ्यै
 त्वा पोषाय त्वेत्याह। आशिषमेवैतामाशास्ते॥ स्वगा त्वा देवेभ्य इत्याह।
 देवेभ्य एवैनङ् स्वगा करोति। स्वाहा त्वा प्रजापतय इत्याह। प्राजापत्यो वा
 अश्वः। यस्या एव देवताया आलभ्यते। तयैवैनङ् समर्धयति॥ [१२]

यः पितुरनुजायाः पुत्रः। स पुरस्तान्नयति। यो मातुरनुजायाः पुत्रः। स
 पश्चान्नयति। विष्वञ्चमेवास्मात्पाप्मानं विवृहतः। यो अर्वन्तं जिघागंसति
 तमभ्यमीति वरुण इति श्वानं चतुरक्षं प्रसौति। परो मर्तः परः श्वेति
 शुनश्चतुरक्षस्य प्रहन्ति। श्वेव वै पाप्मा भ्रातृव्यः। पाप्मानमेवास्य भ्रातृव्यङ्
 हन्ति॥ सैध्रकं मुसलं भवति। [१३] कर्म कर्मैवास्मै साधयति। पौग्श्चलेयो
 हन्ति। पुग्श्चल्वां वै देवाः शुचं न्यदधुः। शुचैवास्य शुचङ् हन्ति॥ पाप्मा

वा ए॒तमी॑प्स॒तीत्या॑हुः। यो॑ऽश्व॒मेधे॑न॒ यज॑त॒ इति॑। अश्व॑स्याध॒स्पदमु॑पा॒स्यति॑।
व॒ज्री वा अश्वः॑ प्राजाप॒त्यः। वज्रै॑णै॒व पाप्मानं॑ भ्रातृ॒व्यमव॑क्रामति॥
दक्षि॑णाऽप॒प्लाव॑यति॥[१४] पाप्मान॑मे॒वास्माच्छ॑मलमप॒ प्लाव॑यति॥ ऐ॒षीक॑ उ॒दूहो॑
भव॑ति। आयु॒र्वा इ॒षीकाः॑। आयु॑रे॒वास्मि॑न्दधति। अ॒मृतं॑ वा इ॒षीकाः॑।
अ॒मृतमे॒वास्मि॑न्दधति। वे॒तस॒शाखो॑पसंब॒द्धा भव॑ति। अ॒प्सुयो॑नि॒र्वा अश्वः॑।
अ॒प्सुजो॑ वे॒तसः॑। स्वा॒दे॒वैनं॑ यो॒नेर्नि॑र्मिमीते। पु॒रस्ता॑त्प्र॒त्यञ्च॑मभ्युदू॒हति॑।
पु॒रस्ता॑दे॒वास्मिन् प्र॑तीच्य॒मृतं॑ दधाति॥ अ॒हं च त्वं च॑ वृ॒त्रह॑न्निति॒ ब्रह्मा॑
यज॑मानस्य ह॒स्तं गृ॑ह्णाति। ब्र॒ह्मक्ष॑त्रे ए॒व सं॑दधाति। अ॒भि ऋ॑त्वे॒न्द्र भू॒रध॑
ज्म॒न्नित्य॑ध्व॒र्युर्यज॑मानं वाचयत्य॒भिजि॑त्यै॥[१५]

च॒त्वार ऋ॒त्विजः॑ स॒मुक्ष॑न्ति। आ॒भ्य ए॒वैनं॑ च॒तसृ॑भ्यो दि॒ग्भ्योऽभि॑समी॒रय॑न्ति॥
श॒तेन॑ रा॒जपु॒त्रैः स॒हाध्व॑र्युः। पु॒रस्ता॑त्प्र॒त्यङ्गि॑ष्ठन् प्रोक्षति। अ॒नेनाश्वे॑न॒
मे॒ध्यैनेष्ट॑वा। अ॒यगं॑ रा॒जा वृ॒त्रं व॑ध्यादिति। रा॒ज्यं वा अ॑ध्व॒र्युः। क्ष॒त्रगं॑
रा॒जपु॒त्रः। रा॒ज्येनै॒वास्मिन् क्ष॑त्रं दधाति॥ श॒तेना॑रा॒जभि॑रु॒ग्रैः सह॑ ब्र॒ह्मा॥[१६]
दक्षि॑णत उ॒दङ्गि॑ष्ठन् प्रोक्षति। अ॒नेनाश्वे॑न॒ मे॒ध्यैनेष्ट॑वा। अ॒यगं॑
रा॒जाऽप्र॑ति॒धृष्योऽस्त्व॑ति। ब॒लं वै ब्र॒ह्मा। ब॒लम॑रा॒जो॒ग्रः। ब॒लेनै॒वास्मिन् ब॒लं
दधा॑ति॥ श॒तेन॑ सू॒तग्रा॑म॒णिभिः॑ सह॒ होता॑। प॒श्चात्प्रा॑ङ्गि॒ष्ठन् प्रोक्ष॑ति। अ॒नेनाश्वे॑न॒
मे॒ध्यैनेष्ट॑वा। अ॒यगं॑ रा॒जाऽस्यै॑ वि॒शः॥[१७] ब॒हुग्वै॑ ब॒ह्वश्वा॑यै॒ बह्व॑जा॒विका॑र्यै।
ब॒हुव्री॒हिय॑वायै॒ बहु॑मा॒षति॑लायै। ब॒हुहि॒रण्या॑यै॒ बहु॑ह॒स्तिका॑यै। ब॒हुदा॑स॒पू॒रुषा॑यै॒
रयि॑मत्यै॒ पुष्टि॑मत्यै। ब॒हुरा॑य॒स्पोषा॑यै॒ राजा॑ऽस्त्व॒ति। भू॒मा वै होता॑। भू॒मा

सू॒त॒ग्रा॒म॒ण्यः॑। भू॒म्नै॒वास्मिन्॑ भू॒मानं॑ दधाति॥ श॒तेन॑ क्ष॒त्तसंग्र॑हीतृभिः स॒हो॒द्गा॒ता।
उ॒त्तर॑तो दक्षि॒णा तिष्ठन्॑ प्रोक्षति॥[१८] अ॒नेना॑श्च॒न मे॒ध्यैने॒ष्ट्वा। अ॒य॒गं रा॒जा
सर्व॑मायु॒रेत्विति॑। आ॒युर्वा उ॒द्गा॒ता। आ॒युः क्ष॒त्तसंग्र॑हीतारः।
आ॒युषै॒वास्मिन्ना॑यु॒र्दधाति॑। श॒त॒गं श॒तं भ॑वन्ति। श॒तायुः॑ पु॒रुषः॑ श॒तेन्द्रि॑यः।
आ॒युष्ये॒वेन्द्रि॑ये प्र॒तिति॑ष्ठति॥ च॒तुः श॒ता भ॑वन्ति। च॒तस्रो॑ दि॒शः। दि॒क्ष्वे॒व प्र॒ति
तिष्ठ॑ति॥[१९]

यथा॒ वै ह॒विषो॑ गृही॒तस्य॑ स्क॒न्दति॑। ए॒वं वा ए॒तद॑श्च॒स्य स्क॒न्दति॑।
यन्नि॒क्तम॑नाल॒ब्धमु॒त्सृज॑न्ति। यथ॒स्तो॒क्या अ॒न्वाह॑। स॒र्वहु॑तमे॒वैनं॑
करो॒त्यस्क॑न्दाय। अ॒स्कन्न॑गं हि तत्। यद्भु॒तस्य॑ स्क॒न्दति॑॥ स॒हस्र॑म॒न्वाह॑।
स॒हस्र॑सं॒मितः सु॒वर्गो॑ लो॒कः। सु॒वर्ग॑स्य लो॒कस्या॑भि॒जित्यै॑॥[२०] यत्प॑रि॒मिता
अनु॑ब्रूयात्। परि॒मित॑मव॒रुन्धी॑त। अ॒परि॒मिता अ॒न्वाह॑। अ॒परि॒मितः सु॒वर्गो॑
लो॒कः। सु॒वर्ग॑स्य लो॒कस्य॑ स॒म॒ष्ट्यै॑॥ स्तो॒क्या जु॑होति। या ए॒व व॑र्ष्या॒ आपः॑।
ता अ॒वरु॑न्ध्ये॥ अ॒स्यां जु॑होति। इ॒यं वा अ॒ग्निर्वै॑श्चा॒नरः॑॥[२१] अ॒स्यामे॒वैनाः॑
प्र॒तिष्ठा॑पयति॥ उ॒वाच॑ ह प्र॒जाप॑तिः। स्तो॒क्यासु॑ वा अ॒हम॑श्च॒मेध॑गं स॒गं
स्था॑पयामि। तेन॑ ततः स॒गं स्थि॑तेन च॒रामी॑ति॥ अ॒ग्नये॑ स्वा॒हेत्या॑ह। अ॒ग्नये॑
ए॒वैनं॑ जुहोति। सो॒माय॑ स्वा॒हेत्या॑ह। सो॒मायै॒वैनं॑ जुहोति। स॒वित्रे॑ स्वा॒हेत्या॑ह।
स॒वित्र॑ ए॒वैनं॑ जुहोति॥[२२] सर॑स्वत्यै स्वा॒हेत्या॑ह। सर॑स्वत्या ए॒वैनं॑ जुहोति।
पू॒ष्णे स्वा॑हेत्या॒ह। पू॒ष्ण ए॒वैनं॑ जुहोति। बृ॒हस्प॑तये स्वा॒हेत्या॑ह। बृ॒हस्प॑तये
ए॒वैनं॑ जुहोति। अ॒पां मो॑दाय स्वा॒हेत्या॑ह। अ॒द्भ्य ए॒वैनं॑ जुहोति। वा॒यवे॑

स्वा॒हेत्या॑ह। वा॒यव॑ ए॒वैनं॑ जुहोति॥[१३] मि॒त्राय॑ स्वा॒हेत्या॑ह। मि॒त्रायै॑वैनं॑ जुहोति।
 वरु॑णाय॒ स्वा॒हेत्या॑ह। वरु॑णायै॒वैनं॑ जुहोति। ए॒ताभ्य॑ ए॒वैनं॑ दे॒वता॑भ्यो जुहोति॥
 द॒शद॑श संपादं॑ जुहोति। द॒शाक्ष॑रा वि॒राट्। अन्नं॑ वि॒राट्।
 वि॒राजै॑वान्नाद्यमवरु॑न्धे॥ प्र वा ए॒षोऽस्मा॑ल्लो॒काच्च॑वते। यः
 परा॑ची॒राहु॑तीर्जुहोति। पुनः॑ पुनर॒भ्यावर्तं॑ जुहोति। अ॒स्मिन्ने॒व लो॒के प्र॑ति॒तिष्ठ॑ति॥
 ए॒ताग्ं ह॒ वाव॑ सोऽश्व॑मे॒धस्य॑ स॒ग् स्थि॑तिमु॒वाचा॑स्क॒न्दाय॑। अ॒स्कन्न॑ग्ं हि तत्।
 यद्य॒ज्ञस्य॑ स॒ग् स्थि॑तस्य॒ स्कन्द॑ति॥[१४]

प्र॒जाप॑तये॒ त्वा जु॑ष्टं प्रो॒क्षामी॑ति॒ पुर॒स्तात्प्र॑त्यङ्गि॒ष्ठन् प्रो॑क्षति। प्र॒जाप॑तिर्वै
 दे॒वाना॑मन्नादो वी॒र्या॑वान्। अ॒न्नाद्य॑मे॒वास्मिन्॑ वी॒र्यं॑ दधाति। तस्मा॒दश्वः॑
 प॒शूना॑मन्नादो वी॒र्या॑वत्तमः॥ इन्द्रा॒ग्निभ्यां॑ त्वेति॑ दक्षि॒णतः॑। इन्द्रा॒ग्नी वै
 दे॒वाना॑मोजिष्ठो बलि॑ष्ठौ। ओज॑ ए॒वास्मिन्॑ बलं॑ दधाति। तस्मा॒दश्वः॑
 प॒शूना॑मोजिष्ठो बलि॑ष्ठः॥ वा॒यवे॑ त्वेति॑ प॒श्चात्। वा॒युर्वै दे॒वाना॑माशुः
 सा॒रसा॑रितमः॥ [१५] ज॒वमे॒वास्मि॑न्दधाति। तस्मा॒दश्वः॑ प॒शूना॑माशुः
 सा॒रसा॑रितमः॥ वि॒श्वेभ्य॑स्त्वा दे॒वेभ्य॑ इत्यु॒त्तर॑तः। वि॒श्वे वै दे॒वा दे॒वानां॑
 यश॑स्वितमाः। यश॑ ए॒वास्मि॑न्दधाति। तस्मा॒दश्वः॑ प॒शूनां॑ यश॑स्वितमः॥
 दे॒वेभ्य॑स्त्वेत्य॒धस्ता॑त्। दे॒वा वै दे॒वाना॑मप॒चित॑तमाः। अप॒चिति॑मे॒वास्मि॑न्दधाति।
 तस्मा॒दश्वः॑ प॒शूना॑मप॒चित॑तमः॥[१६] स॒र्वेभ्य॑स्त्वा दे॒वेभ्य॑ इत्यु॒परि॑ष्ठात्। स॒र्वे वै
 दे॒वास्त्वि॑षिमन्तो हर॑स्विनः। त्वि॒षिमे॒वास्मिन्॑ हरो॑ दधाति। तस्मा॒दश्वः॑ प॒शूनां॑
 त्वि॒षिमा॑न् हर॑स्वितमः॥ दि॒वे त्वाऽन्तरि॑क्षाय॒ त्वा पृ॑थि॒व्यै त्वे॒त्याह॑। ए॒भ्य ए॒वैनं॑

लो॒केभ्यः प्रो॒क्षति॑ । स॒ते त्वाऽस॑ते त्वाऽद्भ्य॑स्त्वौष॒धीभ्य॑स्त्वा वि॒श्वेभ्य॑स्त्वा
भू॒तेभ्य॑ इत्या॒ह । तस्मा॑द॒श्वमे॑धयाजि॒नगुं॑ सर्वा॒णि भू॒तान्यु॑पजीवन्ति॥ ब्र॒ह्मवा॒दिनो॑
वदन्ति॑ । यत्प्रा॑जाप॒त्योऽश्वः॑ । अथ कस्मा॑दे॒नम॒न्याभ्यो॑ दे॒वता॑भ्योऽपि प्रो॒क्षतीति॑ ।
अश्वे॒ वै सर्वा॑ दे॒वता॑ अ॒न्वाय॑ताः । तं यद्वि॒श्वेभ्य॑स्त्वा भू॒तेभ्य॑ इति प्रो॒क्षति॑ ।
दे॒वता॑ ए॒वास्मिन्न॑न्वायातयति॑ । तस्मा॑द॒श्वे सर्वा॑ दे॒वता॑ अ॒न्वाय॑ताः ॥ [१७]

यथा॒ वै ह॒विषो॑ गृही॒तस्य॑ स्क॒न्दति॑ । एवं वा ए॒तद॑श्वस्य स्क॒न्दति॑ ।
यत्प्रो॑क्षितमनालब्धमु॒त्सृज॑न्ति । यद॑श्वचरि॒तानि॑ जु॒होति॑ । सर्व॒हुत॑मे॒वैनं॑
करो॒त्यस्क॑न्दाय । अस्क॒न्नगुं॑ हि तत् । यद्धु॒तस्य॑ स्क॒न्दति॑ । ई॒का॒राय॑
स्वाहे॑ कृ॒ताय॑ स्वाहेत्या॒ह । ए॒तानि॑ वा अ॒श्वच॑रि॒तानि॑ चरि॒तैरे॒वैनगुं॑ सम॒र्थय॑ति॥
[१८] तदा॑हुः । अना॑हु॒तयो॒ वा अ॑श्वचरि॒तानि॑ । नैता॑ हो॒तव्या॑ इति॑ । अथो॒
खल्वा॑हुः । हो॒तव्या॑ ए॒वा अत्र॑ वावै॒वं वि॒द्वान॑श्वमे॒धगुं॑ स॒गुं स्था॑पयति॑ ।
यद॑श्वचरि॒तानि॑ जु॒होति॑ । तस्मा॑द्धो॒तव्या॑ इति॑ ॥ ब॒हिर्धा॑ वा ए॒नमे॒तदा॑यतनाद्दधाति॑ ।
भ्रातृ॑व्यमस्मै॒ जन॑यति॑ । [१९] यस्या॑नायतने॒न्यत्रा॑ग्नेराहु॒तीर्जु॑होति॑ । सावि॒त्रिया॑
इ॒ष्ट्याः पु॒रस्ता॑त्स्विष्ट॒कृतः॑ । आ॒हव॑नीये॒ऽश्वच॑रि॒तानि॑ जु॒होति॑ । आ॒यत॑न
ए॒वास्या॑हु॒तीर्जु॑होति॑ । नास्मै॒ भ्रातृ॑व्यं॒ जन॑यति॑ । तदा॑हुः ॥ य॒ज्ञमु॒खे य॒ज्ञमु॒खे
हो॒तव्याः॑ । य॒ज्ञस्य॑ क्लु॒प्त्यै । सु॒वर्ग॑स्य लो॒कस्या॑नु॒ख्यात्या॑ इति॑ ॥ अथो॒
खल्वा॑हुः ॥ [३०] यद्य॒ज्ञमु॒खे य॒ज्ञमु॒खे जुहु॑यात् । प॒शुभि॑र्यज॒मानं॑ व्य॒र्धयेत्॑ । अ॒व
सु॒वर्गाल्लो॒कात्प॑द्येत । पापी॑यान्त्स्यादि॒ति । स॒कृदे॒व हो॒तव्याः॑ । न यज॑मानं
प॒शुभिर्व्य॑र्धयति॑ । अ॒भि सु॒वर्गं॑ लो॒कं ज॑यति॑ । न पापी॑यान् भवति॑ ॥

अष्टाचत्वारिंशतमश्चरूपाणि जुहोति। अष्टाचत्वारिंशदक्षरा जगती।
जागतोऽश्वः प्राजापत्यः समृद्ध्यै॥ एकमतिरिक्तं जुहोति। तस्मादेकः
प्रजास्वर्धुकः॥[३१]

विभूर्मात्रा प्रभूः पित्रेत्याह। इयं वै माता। असौ पिता। आभ्यामेवैनं परिददाति।
अश्वोऽसि हयोऽसीत्याह। शास्त्येवैनमेतत्। तस्माच्छिष्टाः प्रजा जायन्ते॥
अत्योऽसीत्याह। तस्मादश्वः सर्वान् पशूनत्येति। तस्मादश्वः सर्वेषां पशूनाग्
श्रैष्ठ्यं गच्छति।[३२] प्र यशः श्रैष्ठ्यमाप्नोति। य एवं वेद। नरोऽस्यर्वाऽसि
सप्तिरसि वाज्यसीत्याह। रूपमेवास्यैतन्महिमानं व्याचष्टे। ययुर्नामाऽसीत्याह।
एतद्वा अश्वस्य प्रियं नामधेयम्। प्रियेणैवैनं नामधेयेनाभिवदति।
तस्मादप्यामित्रौ संगत्या। नाम्ना चेध्वयेते। मित्रमेव भवतः॥[३३] आदित्यानां
पत्वाऽन्विहीत्याह। आदित्यानेवैनं गमयति॥ अग्नये स्वाहा
स्वाहेन्द्राग्निभ्यामिति पूर्वहोमाञ्जुहोति। पूर्व एव द्विषन्तं भ्रातृव्यमतिक्रामति।
भूरसि भुवे त्वा भव्याय त्वा भविष्यते त्वेत्युत्सृजति सर्वत्वाय॥ देवा
आशापाला एतं देवेभ्योऽश्वं मेधाय प्रोक्षितं गोपायतेत्याह। शतं वै तल्प्या
राजपुत्रा देवा आशापालाः। तेभ्य एवैनं परिददाति॥ ईश्वरो वा अश्वः प्रमुक्तः
परां परावतं गन्तौः। इह धृतिः स्वाहेह विधृतिः स्वाहेह रन्तिः स्वाहेह
रमतिः स्वाहेति चतृषु पथ्सु जुहोति।[३४] एता वा अश्वस्य बन्धनम्।
ताभिरेवैनं बध्नाति। तस्मादश्वः प्रमुक्तो बन्धनमागच्छति। तस्मादश्वः प्रमुक्तो
बन्धनं न जहाति॥ राष्ट्रं वा अश्वमेधः। राष्ट्रे खलु वा एते व्यायच्छन्ते। येऽश्वं

मे॒ध्य॒गं॑ र॒क्षन्ति॑। ते॒षां॒ य उ॒दृ॒चं गच्छ॑न्ति। रा॒ष्ट्रादे॒व ते रा॒ष्ट्रं गच्छ॑न्ति। अथ॒ य
उ॒दृ॒चं न गच्छ॑न्ति। [३५] रा॒ष्ट्रादे॒व ते व्य॒वच्छि॑द्यन्ते। परा॒ वा ए॒ष सि॒च्यते॑।
योऽ॒ब॒लोऽ॒श्वमे॒धेन॑ य॒जते॑॥ यद॒मित्रा॑ अ॒श्वं वि॒न्देर॑न्। ह॒न्येता॑स्य य॒ज्ञः।
चतु॑श्श॒ता र॒क्षन्ति॑। य॒ज्ञस्या॑घा॒ताय॑। अथान्य॒मानी॒य प्रो॒क्षेयुः॑। सै॒व ततः॑
प्रायश्चि॒त्तिः॥ [३६]

प्र॒जाप॑तिर॒काम॑यताश्चमे॒धेन॑ य॒जेये॑ति। स तपोऽ॒स्तप्य॑त। तस्य॑ ते॒पान॑स्य।
स॒प्तात्म॑नो दे॒वता॑ उद॒क्राम॑न्। सा दी॒क्षाऽ॒भवत्। स ए॒तानि॑ वै॒श्वदे॒वान्य॑पश्यत्।
तान्य॑ जुहोत्। तैर्वै स दी॒क्षाम॑वा॒रुन्ध॑। यद्वै॒श्वदे॒वानि॑ जुहोति। दी॒क्षामे॒व
तैर्य॒ज्ञमा॑नोऽ॒वरु॑न्धे॥ [३७] स॒प्त जुहो॑ति। स॒प्त हि ता॑ दे॒वता॑ उद॒क्राम॑न्। अ॒न्वहं॑

जुहो॑ति। अ॒न्वहमे॒व दी॒क्षाम॑वा॒रुन्ध॑। तैर्वै वै॒श्वदे॒वानि॑ जुहो॑ति।
च॒त्वार्यो॑द्ग्र॒हणा॑नि। स॒प्त संप॑द्यन्ते। स॒प्त वै शी॒र्षण्याः॑ प्रा॒णाः। प्रा॒णा दी॒क्षा।
प्रा॒णैरे॒व प्रा॒णान्दी॒क्षाम॑वा॒रुन्ध॑॥ [३८] ए॒कवि॑ंशतिं वै॒श्वदे॒वानि॑ जुहोति।
ए॒कवि॑ंशतिर्वै दे॒वलो॒काः। द्वा॒दश॑ मा॒साः पञ्च॑र्तवः। त्रय॑ इ॒मे लो॒काः।
अ॒सावा॑दित्य॒ एक॑विंशः। ए॒ष सु॒वर्गो॑ लो॒कः। तद्वै॒व्यं क्ष॒त्रम्। सा श्रीः॑।
तद्ब्र॒ध्नस्य॑ वि॒ष्टप॑म्। तथ्स्वा॒राज्य॑मुच्यते॥ [३९] त्रि॒गुंश॑तमौद्ग्र॒हणा॑नि जुहोति।
त्रि॒गुंश॑दक्षरा वि॒राट्। अ॒न्नं वि॒राट्। वि॒राजै॒वान्नाद्य॑मवा॒रुन्ध॑॥ त्रे॒धा वि॒भज्य॑
दे॒वतां॑ जुहोति। त्र्या॒वृ॒तो वै दे॒वाः। त्र्या॒वृ॒त इ॒मे लो॒काः। ए॒षां लो॒काना॑मा॒प्त्यै॑।
ए॒षां लो॒काना॑ व॒त्पु॒त्र्यै॑॥ अप॒ वा ए॒तस्मात्प्रा॑णाः क॒राम॑न्ति॥ [४०] यो
दी॒क्षाम॑तिरे॒चय॑ति। स॒प्ताहं॑ प्र॒चर॑न्ति। स॒प्त वै शी॒र्षण्याः॑ प्रा॒णाः। प्रा॒णा दी॒क्षा।

अष्टाचत्वारिंशतमश्चरूपाणि जुहोति। अष्टाचत्वारिंशदक्षरा जगती।
जागतोऽश्वः प्राजापत्यः समृद्ध्यै॥ एकमतिरिक्तं जुहोति। तस्मादेकः
प्रजास्वर्धुकः॥[३१]

विभूर्मात्रा प्रभूः पित्रेत्याह। इयं वै माता। असौ पिता। आभ्यामेवैनं परिददाति।
अश्वोऽसि हयोऽसीत्याह। शास्त्येवैनमेतत्। तस्माच्छिष्टाः प्रजा जायन्ते॥
अत्योऽसीत्याह। तस्मादश्वः सर्वान् पशूनत्येति। तस्मादश्वः सर्वेषां पशूनाम्
श्रेष्ठ्यं गच्छति।[३२] प्र यशः श्रेष्ठ्यमाप्नोति। य एवं वेद। नरोऽस्यर्वाऽसि
सप्तिरसि वाज्यसीत्याह। रूपमेवास्यैतन्महिमानं व्याचष्टे। ययुर्नामाऽसीत्याह।
एतद्वा अश्वस्य प्रियं नामधेयम्। प्रियेणैवैनं नामधेयेनाभिवदति।
तस्मादप्यामित्रौ संगत्या नाम्ना चेध्वयेते। मित्रमेव भवतः।[३३] आदित्यानां
पत्वाऽन्विहीत्याह। आदित्यानेवैनं गमयति॥ अग्नये स्वाहा
स्वाहेन्द्राग्निभ्यामिति पूर्वहोमाज्जुहोति। पूर्व एव द्विषन्तं भ्रातृव्यमतिक्रामति।
भूरसि भुवे त्वा भव्याय त्वा भविष्यते त्वेत्युत्सृजति सर्वत्वाय॥ देवा
आशापाला एतं देवेभ्योऽश्वं मेधाय प्रोक्षितं गोपायतेत्याह। शतं वै तल्प्या
राजपुत्रा देवा आशापालाः। तेभ्य एवैनं परिददाति॥ ईश्वरो वा अश्वः प्रमुक्तः
परां परावतं गन्तौः। इह धृतिः स्वाहेह विधृतिः स्वाहेह रन्तिः स्वाहेह
रमतिः स्वाहेति चतृषु पथ्सु जुहोति।[३४] एता वा अश्वस्य बन्धनम्।
ताभिरेवैनं बध्नाति। तस्मादश्वः प्रमुक्तो बन्धनमागच्छति। तस्मादश्वः प्रमुक्तो
बन्धनं न जहाति॥ राष्ट्रं वा अश्वमेधः। राष्ट्रे खलु वा एते व्यायच्छन्ते। येऽश्वं

मे॒ध्य॒गं॑ र॒क्षन्ति॑। ते॒षां॒ य उ॒दृ॒चं॑ ग॒च्छन्ति॑। रा॒ष्ट्रादे॒व ते रा॒ष्ट्रं॑ ग॒च्छन्ति॑। अथ॒ य
उ॒दृ॒चं॑ न ग॒च्छन्ति॑। [३५] रा॒ष्ट्रादे॒व ते व्य॒वच्छि॑द्यन्ते। परा॒ वा ए॒ष सि॑च्यते।
योऽ॒बलौ॑ऽश्वमे॒धेन॑ य॒जते॑॥ यदमि॒त्रा अ॒श्वं वि॒न्देर॑न्। ह॒न्येता॑स्य य॒ज्ञः।
चतु॑श्श॒ता र॒क्षन्ति॑। य॒ज्ञस्या॑घा॒ताय॑ अथान्यमा॒नीय॑ प्रोक्षेयुः। सै॒व ततः॑
प्रायश्चि॑त्तिः॥ [३६]

प्र॒जाप॑तिर॒काम॑यताश्चमे॒धेन॑ य॒जेये॑ति। स तपोऽ॒तप्य॑त। तस्य॑ ते॒पान॑स्य।
स॒प्तात्म॑ना॒ दे॒वता॒ उ॒द॒क्राम॑न्। सा दी॒क्षाऽभ॑वत्। स ए॒तानि॑ वै॒श्वदे॒वान्य॑पश्यत्।
तान्य॑ जुहोत्। तैर्वै स दी॒क्षाम॑वा॒रुन्धे॑। यद्वै॒श्वदे॒वानि॑ जुहोति॒ दी॒क्षामे॒व
तैर्य॑ज॒मानोऽव॑रुन्धे॥ [३७] स॒प्त जु॑होति। स॒प्त हि॑ ता दे॒वता॒ उ॒द॒क्राम॑न्। अ॒न्वहं॑
जुहोति। अ॒न्वहमे॒व दी॒क्षाम॑वा॒रुन्धे॑। त्री॒णि वै॒श्वदे॒वानि॑ जुहोति।
च॒त्वार्यो॑द्ग्र॒हणा॑नि। स॒प्त संप॑द्यन्ते। स॒प्त वै शी॑र्ष॒ण्याः प्रा॒णाः। प्रा॒णा दी॒क्षा।
प्रा॒णैरे॒व प्रा॒णान्दी॒क्षाम॑वा॒रुन्धे॑॥ [३८] ए॒कविं॑शतिं वै॒श्वदे॒वानि॑ जुहोति।
ए॒कविं॑शतिर्वै दे॒वलो॒काः। द्वा॒दश॑ मा॒साः पञ्च॑र्तवः। त्रय॑ इ॒मे लो॒काः।
अ॒सावा॑दि॒त्य ए॒कविं॑शः। ए॒ष सु॒वर्गो॑ लो॒कः। तद्वै॒व्यं क्ष॑त्रम्। सा श्रीः।
तद्ब्र॒ध्नस्य॑ वि॒ष्टप॑म्। तथ्स्वा॒राज्य॑मुच्यते॥ [३९] त्रिं॒शत॑मौद्ग्र॒हणा॑नि जुहोति।
त्रिं॒शद॑क्षरा वि॒राट्। अ॒न्नं वि॒राट्। वि॒राजै॒वान्नाद्य॑मवा॒रुन्धे॑॥ त्रे॒धा वि॒भज्य॑
दे॒वतां॑ जुहोति। त्र्या॒वृतो॑ वै दे॒वाः। त्र्या॒वृत॑ इ॒मे लो॒काः। ए॒षां लो॒काना॑मा॒प्त्यै॑।
ए॒षां लो॒कानां॑ क्लु॒प्त्यै॑॥ अप॒ वा ए॒तस्मात्प्रा॑णाः क्रा॒मन्ति॑। [४०] यो
दी॒क्षाम॑तिरे॒चय॑ति। स॒प्ताहं॑ प्र॒चर॑न्ति। स॒प्त वै शी॑र्ष॒ण्याः प्रा॒णाः। प्रा॒णा दी॒क्षा।

प्राणैरेव प्राणान्दीक्षामवरुन्धे॥ पूर्णाहुतिमुत्तमां जुहोति। सर्वं वै पूर्णाहुतिः।
सर्वमेवाप्नोति। अथो इयं वै पूर्णाहुतिः। अस्यामेव प्रतितिष्ठति॥[४१]

प्रजापतिरश्वमेधमसृजत। तत् सृष्टं न किञ्चनोदयच्छत्। तं
वैश्वदेवान्येवोदयच्छत्। यद्वैश्वदेवानि जुहोति। यज्ञस्योद्यत्यै।
स्वाहाऽऽधिमाधीताय स्वाहा॥ स्वाहाऽऽधीतं मनसे स्वाहा॥ स्वाहा मनः
प्रजापतये स्वाहा॥ काय स्वाहा कस्मै स्वाहा कतमस्मै स्वाहेति प्राजापत्ये
मुख्ये भवतः। प्रजापतिमुखाभिरेवैनं देवताभिरुद्यच्छते॥ [४२] अदित्यै
स्वाहाऽदित्यै मह्यै स्वाहाऽदित्यै सुमृडीकायै स्वाहेत्याह। इयं वा अदितिः।
अस्या एवैनं प्रतिष्ठायोद्यच्छते॥ सरस्वत्यै स्वाहा सरस्वत्यै बृहत्यै स्वाहा
सरस्वत्यै पावकायै स्वाहेत्याह। वाग्वै सरस्वती। वाचैवैनमुद्यच्छते॥ पूष्णे
स्वाहा पूष्णे प्रपथ्याय स्वाहा पूष्णे नरन्धिषाय स्वाहेत्याह। पशवो वै पूषा।
पशुभिरेवैनमुद्यच्छते॥ त्वष्ट्रे स्वाहा त्वष्ट्रे तुरीपाय स्वाहा त्वष्ट्रे पुरुरूपाय
स्वाहेत्याह। त्वष्टा वै पशूनां मिथुनानागं रूपकृत्। रूपमेव पशुषु दधाति।
अथो रूपैरेवैनमुद्यच्छते॥ विष्णवे स्वाहा विष्णवे निखुर्यपाय स्वाहा विष्णवे
निभूयपाय स्वाहेत्याह। यज्ञो वै विष्णुः। यज्ञायैवैनमुद्यच्छते॥ पूर्णाहुतिमुत्तमां
जुहोति। प्रत्युत्तब्ध्यै सयत्वाय॥[४३]

सावित्रमष्टाकपालं प्रातर्निर्वपति। अष्टाक्षरा गायत्री। गायत्रं प्रातःसवनम्।

प्रातःसवनादेवैनं गायत्रियाश्छन्दसोऽधि निर्मिमीते। अथो प्रातःसवनमेव तेनाप्नोति। गायत्रीं छन्दः॥ सवित्रे प्रसवित्र एकादशकपालं मध्यन्दिने। एकादशाक्षरा त्रिष्टुप्। त्रैष्टुभं माध्यन्दिनं सवनम्। माध्यन्दिनादेवैनं सवनात्त्रिष्टुभश्छन्दसोऽधि निर्मिमीते। [४४] अथो माध्यन्दिनमेव सवनं तेनाप्नोति। त्रिष्टुभं छन्दः। सवित्र आसवित्रे द्वादशकपालमपराह्णे। द्वादशाक्षरा जगती। जागतं तृतीयसवनम्। तृतीयसवनादेवैनं जगत्याश्छन्दसोऽधि निर्मिमीते। अथो तृतीयसवनमेव तेनाप्नोति। जगतीं छन्दः॥ ईश्वरो वा अश्वः प्रमुक्तः परां परावतं गन्तोः। इह धृतिः स्वाहेह विधृतिः स्वाहेह रन्तिः स्वाहेह रमतिः स्वाहेति चतस्र आहुतीर्जुहोति। [४५] चतस्रो दिशः। दिग्भिरेवैनं परिगृह्णाति॥ आश्वत्थो ब्रजो भवति। प्रजापतिर्देवेभ्यो निलायत। अश्वो रूपं कृत्वा। सोऽश्वत्थे संवत्सरमतिष्ठत्। तदश्वत्थस्याश्वत्थत्वम्। यदाश्वत्थो ब्रजो भवति। स्व एवैनं योनौ प्रतिष्ठापयति॥ [४६]

आ ब्रह्मन् ब्राह्मणो ब्रह्मवर्चसी जायतामित्याह। ब्राह्मण एव ब्रह्मवर्चसं दधाति। तस्मात्पुरा ब्राह्मणो ब्रह्मवर्चस्य जायत॥ आऽस्मिन्नाष्ट्रे राजन्य इषव्यः शूरो महारथो जायतामित्याह। राजन्य एव शौर्यं महिमानं दधाति। तस्मात्पुरा राजन्य इषव्यः शूरो महारथोऽजायत॥ दोग्ध्री धेनुरित्याह। धेन्वामेव पयो दधाति। तस्मात्पुरा दोग्ध्री धेनुरजायत। वोढाऽनड्वानित्याह। [४७] अनडुह्येव वीर्यं दधाति। तस्मात्पुरा वोढाऽनड्वानजायत॥ आशुः सप्तिरित्याह। अश्व एव जवं दधाति। तस्मात्पुराऽऽशुरश्वोऽजायत॥ पुरंधिर्योषेत्याह। योषित्येव रूपं

दधाति। तस्मात्स्त्री युवतिः प्रिया भावुका। जिष्णू रथेष्ठा इत्याह। आ ह वै तत्र जिष्णू रथेष्ठा जायते।[४८] यत्रैतेन यज्ञेन यजन्ते॥ सभेयो युवेत्याह। यो वै पूर्ववयसी। स सभेयो युवा। तस्माद्युवा पुमान् प्रियो भावुकः। आऽस्य यजमानस्य वीरो जायतामित्याह। आ ह वै तत्र यजमानस्य वीरो जायते। यत्रैतेन यज्ञेन यजन्ते॥ निकामे निकामे नः पर्जन्यो वर्षत्वित्याह। निकामे निकामे ह वै तत्र पर्जन्यो वर्षति। यत्रैतेन यज्ञेन यजन्ते। फलिन्यो न ओषधयः पच्यन्तामित्याह। फलिन्यो ह वै तत्रौषधयः पच्यन्ते। यत्रैतेन यज्ञेन यजन्ते। योगक्षेमो नः कल्पतामित्याह। कल्पते ह वै तत्र प्रजाभ्यो योगक्षेमः। यत्रैतेन यज्ञेन यजन्ते॥[४९]

प्रजापतिर्देवेभ्यो यज्ञान्वयादिशत्। स आत्मन्नश्चमेधमधत्त। तं देवा अब्रुवन्। एष वाव यज्ञः। यदश्चमेधः। अप्येव नोऽत्रास्त्विति। तेभ्य एतानन्नहोमान् प्रायच्छत्। तानजुहोत्। तैर्वै स देवानप्रीणात्। यदन्नहोमाञ्जुहोति।[५०] देवानेव तैर्यजमानः प्रीणाति॥ आज्येन जुहोति। अग्नेर्वा एतद्रूपम्। यदाज्यम्। यदाज्येन जुहोति। अग्निमेव तत्प्रीणाति। मधुना जुहोति। महत्यै वा एतद्देवतायै रूपम्। यन्मधु। यन्मधुना जुहोति।[५१] महतीमेव तद्देवतां प्रीणाति। तण्डुलैर्जुहोति। वसूनां वा एतद्रूपम्। यत्तण्डुलाः। यत्तण्डुलैर्जुहोति। वसूनेव तत्प्रीणाति। पृथुकैर्जुहोति। रुद्राणां वा एतद्रूपम्। यत्पृथुकाः। यत्पृथुकैर्जुहोति।[५२] रुद्रानेव तत्प्रीणाति। लाजैर्जुहोति। आदित्यानां वा एतद्रूपम्। यल्लाजाः। यल्लाजैर्जुहोति। आदित्यानेव तत्प्रीणाति। करम्बैर्जुहोति। विश्वेषां वा

ए॒तद्दे॒वाना॑गं॒ रूप॑म्। यत्कर॒म्बाः॑। यत्कर॒म्बैर्जु॑होति। [५३] वि॒श्वा॒ने॒व तद्दे॒वान्
प्री॑णाति। धा॒नाभि॑र्जुहोति। नक्ष॒त्राणां॑ वा ए॒तद्दू॒पम्। यद्वा॒नाः॑। यद्वा॒नाभि॑र्जुहोति।
नक्ष॒त्राण्ये॒व तत्प्री॑णाति। स॒क्तुभि॑र्जुहोति। प्र॒जाप॑तेर्वा ए॒तद्दू॒पम्। यथ्स॑क्तवः।
यथ्स॑क्तुभिर्जुहोति। [५४] प्र॒जाप॑तिमे॒व तत्प्री॑णाति। म॒सू॒स्यैर्जु॑होति। सर्वा॑सां वा
ए॒तद्दे॒वता॑नागं॒ रूप॑म्। यन्म॒सू॒स्यानि॑। यन्म॒सू॒स्यैर्जु॑होति। सर्वा॑ ए॒व तद्दे॒वताः॑
प्री॑णाति। प्रि॒यङ्गु॑तण्डु॒लैर्जु॑होति। प्रि॒याङ्गा॑ ह॒ वै ना॒मैते॑। ए॒तैर्वै दे॒वा
अ॒श्व॒स्याङ्गानि॑ स॒मद॑धुः। यत्प्रि॒यङ्गु॑तण्डु॒लैर्जु॑होति। अ॒श्व॒स्यै॒वाङ्गानि॑ स॒न्दधा॑ति।
द॒शा॒न्नानि॑ जुहोति। द॒शाक्ष॑रा वि॒राट्। वि॒राट्कृ॒त्स्न॒स्यान्ना॒द्यस्या॑व॒रुद्ध्यै॑॥ [५५]

प्र॒जाप॑तिर॒श्वमे॒धम॑सृजत। त॒गं सृ॑ष्ट॒गं र॒क्षाग॑स्यजि॒घाग॑सन्। स ए॒तान्
प्र॒जाप॑तिर्न॒क्त॒गं हो॒मान॑पश्यत्। तान॑जुहोत्। तैर्वै स य॒ज्ञाद्र॒क्षाग॑स्यपा॒हन्।
यन्न॑क्त॒गं हो॒माञ्जु॑होति। य॒ज्ञादे॒व तैर्य॑ज॒मानो॑ र॒क्षाग॑स्यप॒हन्ति॑। आ॒ज्ये॒न
जु॑होति। व॒ज्रो वा आ॒ज्यम्। व॒ज्रैर्नै॒व य॒ज्ञाद्र॒क्षाग॑स्यप॒हन्ति॑। [५६] आ॒ज्य॑स्य
प्र॒तिप॑दं करोति। प्रा॒णो वा आ॒ज्यम्। मु॒खत॑ ए॒वास्य॑ प्रा॒णं द॑धाति।
अ॒न्नहो॒माञ्जु॑होति। शरी॑रवदे॒वाव॑रुन्धे। व्य॒त्यासं॑ जुहोति। उ॒भय॑स्याव॒रुद्ध्यै॑। न॒क्तं
जु॑होति। र॒क्ष॒साम॑प॒हत्यै॑। आ॒ज्ये॒नान्त॑तो जुहोति। [५७] प्रा॒णो वा आ॒ज्यम्।
उ॒भय॑त ए॒वास्य॑ प्रा॒णं द॑धाति। पु॒रस्ता॑च्चो॒परि॑ष्ठाच्च। ए॒कस्मै॑ स्वा॒हेत्या॑ह।

अ॒स्मिन्ने॒व लो॒के प्र॒ति॒ति॒ष्ठति॑ । द्वा॒भ्याग् स्वा॒हेत्या॑ह । अ॒मुष्मिन्ने॒व लो॒के प्र॒ति॒
ति॒ष्ठति॑ । उ॒भयो॑रे॒व लो॒कयोः प्र॒ति ति॒ष्ठति॑ । अ॒स्मिग्श्चा॒मुष्मि॑ग्श्च॥ श॒ताय॑
स्वा॒हेत्या॑ह । श॒तायु॑र्वे॒ पुरु॑षः श॒तवी॑र्यः । आ॒युरे॒व वी॑र्यम॒वरु॑न्धे । स॒हस्रा॑य
स्वा॒हेत्या॑ह । आ॒युर्वे स॒हस्र॑म् । आ॒युरे॒वाव॑रुन्धे । सर्व॑स्मै स्वा॒हेत्या॑ह ।
अ॒परि॑मित॒मे॒वाव॑रुन्धे॥[५८]

प्र॒जाप॑तिं वा ए॒ष ई॒प्स॒तीत्या॑हुः । योऽ॒श्वमे॒धेन॑ य॒जत॑ इति । अथो॑ आहुः ।
सर्वा॑णि भू॒तानी॑ति । एक॑स्मै स्वा॒हेत्या॑ह ॥ प्र॒जाप॑तिर्वा एकः । तमे॒वाप्नो॑ति ।
एक॑स्मै स्वा॒हा द्वा॒भ्याग् स्वा॒हेत्य॑भि॒पूर्व॑माहु॒तीर्जु॑होति । अ॒भि॒पूर्व॑मे॒व सु॒वर्गं
लो॒कमे॑ति ॥ ए॒कोत्त॑रं जुहोति । [५९] ए॒कव॑दे॒व सु॒वर्गं लो॒कमे॑ति । स॒न्त॒तं जु॑होति ।
सु॒वर्ग॑स्य लो॒कस्य॑ सं॒तत्यै॑ । श॒ताय॑ स्वा॒हेत्या॑ह । श॒तायु॑र्वे॒ पुरु॑षः श॒तवी॑र्यः ।
आ॒युरे॒व वी॑र्यम॒वरु॑न्धे । स॒हस्रा॑य स्वा॒हेत्या॑ह । आ॒युर्वे स॒हस्र॑म् ।
आ॒युरे॒वाव॑रुन्धे । अ॒युता॑य स्वा॒हा नि॒युता॑य स्वा॒हा प्र॒युता॑य स्वा॒हेत्या॑ह । [६०]
त्रय॑ इ॒मे लो॒काः । इ॒माने॒व लो॒कान॑वरुन्धे । अ॒र्बुदा॑य स्वा॒हेत्या॑ह । वा॒ग्वा
अ॒र्बुद॑म् । वा॒चमे॒वाव॑रुन्धे । न्य॒र्बुदा॑य स्वा॒हेत्या॑ह । यो वै वा॒चो भू॒मा । त॒न्य॒र्बुद॑म् ।
वा॒च ए॒व भू॒मान॑मवरुन्धे । स॒मुद्रा॑य स्वा॒हेत्या॑ह । [६१] स॒मुद्र॑मे॒वाप्नो॑ति । म॒ध्याय॑
स्वा॒हेत्या॑ह । म॒ध्यमे॒वाप्नो॑ति । अ॒न्ताय॑ स्वा॒हेत्या॑ह । अ॒न्तमे॒वाप्नो॑ति । प॒रार्था॑य
स्वा॒हेत्या॑ह । प॒रार्थ॑मे॒वाप्नो॑ति । उ॒षसे॑ स्वा॒हा व्यु॑ष्च्यै स्वा॒हेत्या॑ह । रा॒त्रिर्वा उ॒षाः ।
अ॒हव्यु॑ष्टिः । अ॒हो॒रा॒त्रे ए॒वाव॑रुन्धे । अथो॑ अ॒हो॒रा॒त्रयो॑रे॒व प्र॒ति॒ति॒ष्ठति॑ । ता
यदु॒भयी॑र्दि॒वा वा न॑क्तं वा जुहु॒यात् । अ॒हो॒रा॒त्रे मो॑हयेत् । उ॒षसे॑ स्वा॒हा व्यु॑ष्च्यै

स्वाहो॑ दे॒ष्यते स्वाहो॑ द्यते स्वाहेत्यनु॑दिते जुहोति। उदिता॑य स्वाहा सुवर्गा॑य
स्वाहा लो॒काय स्वाहेत्यु॑दिते जुहोति। अ॒हो॒रा॒त्रयो॑रव्यतिमोहाय॥[६२]

वि॒भूर्मा॒त्रा प्र॒भूः पि॒त्रेत्य॑श्च॒नामा॑नि जुहोति। उ॒भयो॑रेवैनं॑ लो॒कयो॑र्नाम॒धेयं॑
गमयति॥ आय॑नाय स्वाहा प्राय॑णाय स्वाहेत्युद्गा॑वाञ्जुहोति।
सर्व॑मेवैनमस्क॑न्नं सुवर्गं॑ लो॒कं गम॑यति॥ अ॒ग्नये॑ स्वाहा सोमा॑य स्वाहेति
पूर्व॑होमाञ्जुहोति। पूर्वं॑ ए॒व द्वि॒षन्तं॑ भ्रातृ॒व्यम॑तिक्रामति॥ पृथि॒व्यै
स्वाहा॑ऽन्तरिक्षाय स्वाहेत्याह। यथा॑ यजुरे॒वैतत्॥ अ॒ग्नये॑ स्वाहा सोमा॑य
स्वाहेति पूर्व॑दीक्षा जुहोति। पूर्वं॑ ए॒व द्वि॒षन्तं॑ भ्रातृ॒व्यम॑तिक्रामति॥[६३] पृथि॒व्यै
स्वाहा॑ऽन्तरिक्षाय स्वाहेत्ये॒कवि॑ंशिनीं॑ दीक्षां जुहोति। एक॑विंशतिर्वै
दे॒वलो॒काः। द्वाद॑श मा॒साः पञ्च॑र्तवः। त्रय॑ इमे लो॒काः। अ॒सावा॑दित्य
एक॑विंशः। एष सुवर्गो॑ लो॒कः। सुवर्ग॑स्य लो॒कस्य॑ सम॒ष्ट्यै॥ भुवो॑ दे॒वानां॑
कर्म॑णेत्युदीक्षा जुहोति। ऋतू॑नेवास्मै कल्पयति॥ अ॒ग्नये॑ स्वाहा वा॒यवे॑
स्वाहेति जुहोत्यन॑न्तरित्यै॥ [६४] अ॒र्वाङ्य॑ज्ञः संक्राम॑त्वित्याप्तीर्जुहोति।
सुवर्ग॑स्य लो॒कस्या॑प्त्यै। भूतं॑ भ॒व्यं भ॒विष्य॑दिति पर्या॑प्तीर्जुहोति। सुवर्ग॑स्य
लो॒कस्य॑ पर्या॑प्त्यै। आ मे॑ गृहा भव॑न्त्वित्याभूर्जुहोति। सुवर्ग॑स्य
लो॒कस्या॑भूत्यै। अ॒ग्निना॑ तपोऽन्व॑भवदित्यनुभूर्जुहोति। सुवर्ग॑स्य
लो॒कस्यानु॑भूत्यै। स्वाहा॑ऽऽधि॒माधी॑ताय स्वाहेति समस्तानि वैश्व॑दे॒वानि जुहोति।
समस्त॑मेव द्विषन्तं॑ भ्रातृ॒व्यम॑तिक्रामति॥ [६५] द॒द्भ्यः॑ स्वाहा ह॒नूभ्या॑ग्
स्वाहेत्यङ्ग॑होमाञ्जुहोति। अ॒ङ्गे अ॒ङ्गे वै पु॒रुष॑स्य पा॒प्मोप॑श्लिष्टः।

अङ्गादङ्गादेवैनं पाप्मनस्तेन मुञ्चति॥ अञ्ज्येताय स्वाहा कृष्णाय स्वाहा
 श्वेताय स्वाहेत्यश्वरूपाणि जुहोति। रूपैरेवैनं समर्धयति। ओषधीभ्यः स्वाहा
 मूलैभ्यः स्वाहेत्योषधिहोमाञ्जुहोति। द्वयो वा ओषधयः। पुष्पेभ्योऽन्याः फलं
 गृह्णन्ति। मूलैभ्योऽन्याः। ता एवोभयीरवरुन्धे॥ [६६] वनस्पतिभ्यः स्वाहेति
 वनस्पतिहोमाञ्जुहोति। आरण्यस्यान्नाद्यस्यावरुन्धे॥ मेषस्त्वा
 पचतैरवत्वित्यपाव्यानि जुहोति। प्राणा वै देवा अपाव्याः। प्राणानेवावरुन्धे॥
 कूप्याभ्यः स्वाहाऽद्भ्यः स्वाहेत्यपागं होमाञ्जुहोति। अप्सु वा आपः। अन्नं
 वा आपः। अद्भ्यो वा अन्नं जायते। यदेवाद्भ्योऽन्नं जायते। तदवरुन्धे॥ [६७]

अम्भागंसि जुहोति। अयं वै लोकोऽम्भागंसि। तस्य वसवोऽधिपतयः।
 अग्निर्ज्योतिः। यदम्भागंसि जुहोति। इममेव लोकमवरुन्धे। वसूनागं सायुज्यं
 गच्छति। अग्निं ज्योतिरवरुन्धे॥ नभागंसि जुहोति। अन्तरिक्षं वै नभागंसि।
 [६८] तस्य रुद्रा अधिपतयः। वायुर्ज्योतिः। यन्नभागंसि जुहोति।
 अन्तरिक्षमेवावरुन्धे। रुद्राणागं सायुज्यं गच्छति। वायुं ज्योतिरवरुन्धे॥
 महागंसि जुहोति। असौ वै लोको महागंसि। तस्यादित्या अधिपतयः। सूर्यो
 ज्योतिः। [६९] यन्महागंसि जुहोति। अमुमेव लोकमवरुन्धे। आदित्यानागं
 सायुज्यं गच्छति। सूर्यं ज्योतिरवरुन्धे॥ नमो राज्ञे नमो वरुणायेति यव्यानि
 जुहोति। अन्नाद्यस्यावरुन्धे॥ मयोभूर्वातो अभि वातूस्त्रा इति गव्यानि जुहोति।
 पशूनामवरुन्धे॥ प्राणाय स्वाहा व्यानाय स्वाहेति संततिहोमाञ्जुहोति।
 सुवर्गस्य लोकस्य संतत्यै॥ [७०] सिताय स्वाहाऽसिताय स्वाहेति

प्रमु॑क्तीर्जु॑होति। सु॒वर्ग॑स्य लो॒कस्य॑ प्रमु॑क्त्यै। पृ॒थि॒व्यै स्वा॒हाऽन्तरि॑क्षाय
 स्वा॒हेत्या॑ह। य॒था य॒जुरे॒वैतत्॥ द॒त्त्वते॒ स्वा॒हाऽद॒न्तका॑य स्वा॒हेति॑
 शरी॑रहो॒माञ्जु॑होति। पि॒तृलो॒कमे॒व तैर्य॑जमा॒नोऽव॑रुन्धे॥ क॒स्त्वा यु॑नक्ति स त्वा
 यु॑नक्ति॒वति॑ परि॒धीन्यु॑नक्ति। इ॒मे वै लो॒काः परि॒धयः॑। इ॒माने॒वास्मै॑ लो॒कान्
 यु॑नक्ति। सु॒वर्ग॑स्य लो॒कस्य॑ सम॑ष्ट्यै॥ [७१] यः प्रा॒णतो॒ य आ॑त्म॒दा इति॑
 महि॑मानौ जुहोति। सु॒वर्गो॑ वै लो॒को महः॑। सु॒वर्गमे॒व ताभ्यां॑ लो॒कं
 यज॑मानोऽव॒रुन्धे। आ ब्र॑ह्मन् ब्रा॒ह्मणो॑ ब्र॒ह्मव॑र्चसी जा॒यता॒मिति॑ सम॑स्तानि
 ब्र॒ह्मव॑र्चसानि जुहोति। ब्र॒ह्मव॑र्चसमे॒व तैर्य॑जमा॒नोऽव॑रुन्धे। ज॒ज्ञि बी॒जमिति॑
 जुहो॒त्यन॑न्तरि॒त्यै। अ॒ग्नये॑ सम॒नम॑त्पृ॒थि॒व्यै सम॑नम॒दिति॑ सन्नति॒होमाञ्जु॑होति।
 सु॒वर्ग॑स्य लो॒कस्य॑ सं॒नत्यै॥ भू॒ताय॑ स्वा॒हा भ॒विष्य॑ते स्वा॒हेति॑ भू॒ताभ॒व्यौ
 होमौ॑ जुहोति। अ॒यं वै लो॒को भू॒तम्। [७२] अ॒सौ भ॒विष्य॑त्। अ॒नयो॑रे॒व
 लो॒कयोः॑ प्र॒ति॒तिष्ठ॑ति। स॒र्वस्या॑प्त्यै। स॒र्वस्या॑व॒रुद्ध्यै॥ यद॑क्र॒न्दः प्र॒थमं॑
 जा॒यमा॑न इ॒त्यश्च॑स्तोमी॒यं जुहो॑ति। स॒र्वस्या॑प्त्यै। स॒र्वस्य॑ जि॒त्यै। स॒र्वमे॒व
 तेना॑प्नोति। स॒र्वं ज॑यति। योऽश्च॑मे॒धेन॑ यजते॥ [७३] य उ॑ चैनमे॒वं वेद॑। य॒ज्ञं
 र॒क्षाग्॑स्यजि॒घाग्॑सन्न। स ए॒तान् प्र॑जापति॒र्नक्त॑ग्ं॒होमा॑नपश्यत्। तान॑जुहोत्। तैर्वै
 स य॒ज्ञाद्र॑क्षाग्॒स्यपा॑हन्। यन्न॑क्तग्ं॒होमाञ्जु॑होति। य॒ज्ञादे॒व तैर्य॑जमा॒नो
 र॒क्षाग्॑स्यप॒हन्ति॑। उ॒षसे॒ स्वा॒हा व्यु॑ष्ट्यै स्वा॒हेत्य॑न्ततो जुहोति। सु॒वर्ग॑स्य
 लो॒कस्य॑ सम॑ष्ट्यै॥ [७४]

ए॒क॒यूपो॑ वै॒काद॑शिनी वा। अ॒न्येषां॑ य॒ज्ञानां॑ यू॒पा भ॑वन्ति।

ए॒क॒वि॒ं॒श॒ति॒र॒न्य॒श्च॒मे॒ध॒स्य॑। सु॒व॒र्ग॒स्य॑ लो॒क॒स्य॑भि॒जि॒त्यै॑॥ बै॒ल्वा॑ वा॒ खा॒दि॒रो वा॑
पा॒ला॒शो वा॑। अ॒न्ये॒षां य॒ज्ञ॒क्र॒तूनां॑ यू॒पा भ॑वन्ति। रा॒ज्जु॒दाल॑
ए॒क॒वि॒ं॒श॒त्य॒र॒नि॒र॒श्च॒मे॒ध॒स्य॑। सु॒व॒र्ग॒स्य॑ लो॒क॒स्य॑ स॒म॒ष्ट्यै॑। ना॒न्ये॒षां प॒शूनां॑
ते॒ज॒न्या अव॑द्यन्ति। अव॑द्यन्त्य॒श्च॒स्य॑। [७५] पा॒प्मा वै ते॑जनी। पा॒प्म॒नोऽप॑हत्यै।
प्ल॒क्ष॒शा॒खाया॑म॒न्ये॒षां प॒शूना॑मव॑द्यन्ति। वे॒त॒स॒शा॒खाया॑म॒श्च॒स्य॑। अ॒प्सु॒यो॒नि॒र्वा
अ॒श्चः। अ॒प्सु॒जो वे॑त॒सः। स्व॑ ए॒वा॒स्य॒ यो॒ना॒व॒व॒द्य॒ति॑॥ यू॒पे॒षु ग्रा॒म्यान्
प॒शू॒न्नि॒यु॒ञ्ज॒न्ति॑। आ॒रो॒के॒ष्वा॒र॒ण॒या॒न्धा॒र॒य॒न्ति॑। प॒शूनां॑ व्या॒वृ॒त्यै॑। आ॒ ग्रा॒म्यान्
प॒शू॒ल्ल॒भ॒न्ते॑। प्रा॒र॒ण॒या॒न्त्सृ॒ज॒न्ति॑। पा॒प्म॒नोऽप॑हत्यै॥ [७६]

रा॒ज्जु॒दाल॑म॒ग्नि॒ष्ठं मि॑नोति। भ्रू॒ण॒ह॒त्याया॑ अ॒प॑हत्यै। पौ॒तु॒द्र॒वा॒व॒भि॒तो भ॑वतः।
पु॒ण्य॑स्य ग॒न्ध॒स्या॒व॒रु॒ध्यै॑। भ्रू॒ण॒ह॒त्यामे॒वा॒स्मा॒द॒प॑हत्यै। पु॒ण्ये॒न ग॒न्धे॒नो॒भय॑तः
परि॑गृह्णाति॥ षड्॒बै॒ल्वा भ॑वन्ति। ब्र॒ह्म॒व॒र्च॒स॒स्या॒व॒रु॒ध्यै॑। षट्॒खा॒दि॒राः।
ते॒ज॒सोऽव॑रुध्यै। [७७] षट्॒पा॒ला॒शाः। सो॒म॒पी॒थ॒स्या॒व॒रु॒ध्यै॑। ए॒क॒वि॒ं॒श॒तिः
सं॒प॒द्य॒न्ते॑। ए॒क॒वि॒ं॒श॒तिर्वै॑ दे॒व॒लो॒काः। द्वा॒द॒श मा॒साः प॒ञ्च॒र्त॒वः। त्रय॑ इ॒मे
लो॒काः। अ॒सा॒वा॒दि॒त्य॑ ए॒क॒वि॒ं॒शः। ए॒ष सु॒व॒र्गो लो॒कः। सु॒व॒र्ग॒स्य॑ लो॒क॒स्य॑
स॒म॒ष्ट्यै॑॥ श॒तं प॒श॒वो भ॑वन्ति॥ [७८] श॒ता॒युः पु॒रु॒षः श॒ते॒न्द्रि॒यः। आ॒यु॒ष्ये॒वे॒न्द्रि॒ये
प्र॒ति॒ति॒ष्ठ॒ति॑। स॒र्वं वा॑ अ॒श्च॒मे॒ध्या॒प्नो॑ति। अ॒परि॑मिता भ॑वन्ति।
अ॒परि॑मित॒स्या॒व॒रु॒ध्यै॑॥ ब्र॒ह्म॒वा॒दि॒नो व॑दन्ति। कस्मा॑त्स॒त्यात्। द॒क्षि॒ण॒तोऽन्ये॒षां
प॒शूना॑मव॑द्यन्ति। उ॒त्तर॑तोऽ॒श्च॒स्ये॒ति॑। वा॒रु॒णो वा॑ अ॒श्चः॥ [७९] ए॒षा वै व॑रुणस्य
दिक्। स्वा॒या॒मे॒वा॒स्य॑ दि॒श्य॒व॒द्य॒ति॑। य॒दि॒त रे॒षां प॒शूना॑मव॑द्यति। श॒त॒दे॒व॒त्यं

तेनावरुन्धे॥ चित्ते॑ऽग्नावधि॑वैतसे॒ कटे॑ऽश्वं चिनोति॑। अप्सु॑योनिर्वा॒ अश्वः॑।
 अप्सु॑जो वैत॒सः। स्व॒ ए॒वैनं॒ योनौ॒ प्रति॑ष्ठापयति। पुरस्ता॑त्प्रत्यञ्चं॒ तूपरं॑
 चिनोति॑। पश्चात्प्राचीनं॑ गोमृ॒गम्। [८०] प्राणा॑पानावेवास्मिन्सम्यञ्चौ॑ दधाति।
 अश्वं॑ तूपरं॑ गोमृ॒गमिति॑ सर्व॒हुत॑ एताञ्जु॑होति। ए॒षां लो॒काना॑मभिजित्यै॑॥
 आत्मना॑ऽभिजुहोति। सा॒त्मानमे॒वैन॒गं स॒तनुं॑ करोति। सा॒त्माऽमुष्मि॑ल्लो॒के
 भवति॑। य॒ एवं वेद॑। अथो॒ वसो॑रेव॒ धारां॑ तेनावरुन्धे॥ इ॒लुव॑र्दाय॒ स्वाहा॑
 ब॒लिव॑र्दाय॒ स्वाहे॑त्याह। सं॒व॒थ्सरो॒ वा इ॒लुव॑र्दः। प॒रिव॒थ्सरो॒ ब॒लिव॑र्दः।
 सं॒व॒थ्सरा॑देव॒ प॒रिव॒थ्सरा॑दायुरवरुन्धे। आयु॑रेवास्मिन्दधाति। तस्मा॑दश्वमे॒धया॒जी
 ज॒रसा॑ वि॒स्रसा॑ऽमुं लो॒कमे॑ति॥ [८१]

ए॒क॒वि॒ंशो॑ऽग्निर्भवति। ए॒क॒वि॒ंशः॑ स्तोमः॑। ए॒क॒वि॒ंशति॑र्यूपाः॑॥ यथा॒ वा
 अश्वा॑ व॒र्षभा॑ वा वृषा॑णः स॒ग्ग् स्फुरे॑रन्। ए॒वमे॒तथ्स्तो॒माः स॒ग्ग् स्फुर॑न्ते।
 यदे॒क॒वि॒ंशाः॑। ते यथ्स॑मृच्छेरन्। ह॒न्येता॑स्य य॒ज्ञः। द्वा॒द॒श ए॒वाग्निः॑
 स्या॑दित्याहुः॑। द्वा॒द॒शः स्तोमः॑। [८२] ए॒का॒द॒श यू॒पाः। यद्द्वा॒द॒शो॑ऽग्निर्भवति।
 द्वा॒द॒श मा॒साः सं॒व॒थ्सरः॑। सं॒व॒थ्सरे॒णैवा॒स्मा अ॒न्नम॑वरुन्धे॥ यद्द॒श यू॒पा भव॑न्ति।
 द॒शाक्ष॑रा वि॒राट्। अ॒न्नं वि॒राट्। वि॒राजै॒वान्नाद्य॑मवरुन्धे। य॒ ए॒का॒द॒शः। स्तन॑
 ए॒वास्यै॒ सः। [८३] दु॒ह ए॒वैनां॑ तेन॥ तदा॑हुः॑। यद्द्वा॒द॒शो॑ऽग्निः स्या॑द्द्वा॒द॒शः
 स्तोम॑ ए॒का॒द॒श यू॒पाः। यथा॒ स्थू॒रिणा॑ या॒यात्। ता॒दृक्त॑त्। ए॒क॒वि॒ंश ए॒वाग्निः॑
 स्या॑दित्याहुः॑। ए॒क॒वि॒ंशः स्तोमः॑। ए॒क॒वि॒ंशति॑र्यूपाः॑। यथा॒ प्र॒ष्टिभि॑र्याति।
 ता॒दृगे॒व तत्॥ [८४] यो॒ वा अ॒श्वमे॒धे ति॒स्रः क॒कु॒भो वेद॑। क॒कु॒ब्ध॒ राजां॑ भवति॑॥

ए॒क॒वि॒ंशो॑ऽग्नि॒र्भव॑ति। ए॒क॒वि॒ंशः॑ स्तोमः॑। ए॒क॒वि॒ंश॑तिर्यू॒पाः॑। ए॒ता वा॑
अ॒श्वमे॒धे ति॒स्रः क॒कु॒भः॑। य ए॒वं वे॒द। क॒कु॒ब्ध॒ राजा॑ भवति॥ यो वा अ॒श्वमे॒धे
त्रीणि॑ शी॒र्षाणि॑ वे॒द। शि॒रो ह॒ राजा॑ भवति। ए॒क॒वि॒ंशो॑ऽग्नि॒र्भव॑ति।
ए॒क॒वि॒ंशः॑ स्तोमः॑। ए॒क॒वि॒ंश॑तिर्यू॒पाः॑। ए॒तानि॑ वा अ॒श्वमे॒धे त्रीणि॑ शी॒र्षाणि॑।
य ए॒वं वे॒द। शि॒रो ह॒ राजा॑ भवति॥[८५]

दे॒वा वा॑ अ॒श्वमे॒धे प॒व॒मा॒ने। सु॒व॒र्गं लो॒कं न॑ प्रा॒जा॒न॒न्। तम॑श्चः प्रा॒जा॒नात्।
यद॑श्चमे॒धेऽश्वे॒न मे॒ध्येनो॑द॒ञ्चो ब॒हिष्प॑व॒मा॒नं स॒र्प॑न्ति। सु॒व॒र्गस्य॑ लो॒कस्य॑
प्र॒जा॒त्यै॥ न॒ वै म॒नु॒ष्यः॑ सु॒व॒र्गं लो॒कम॑ञ्जसा वे॒द। अ॒श्वो वै सु॒व॒र्गं
लो॒कम॑ञ्जसा वे॒द। यदु॑द्गातोद्गा॒येत्। यथा॑ऽक्षेत्र॒ज्ञोऽन्ये॑न॒ पथा॑ प्र॒तिपा॑द॒येत्।
तादृ॑क्तत्।[८६] उ॒द्गा॒ता॒रम॑प॒रुद्ध॑य। अ॒श्वमु॒द्गी॒थाय॑ वृणीते। यथा॑ क्षे॒त्र॒ज्ञोऽञ्ज॑सा
न॒य॒ति। ए॒वमे॒वैन॑म॒श्चः सु॒व॒र्गं लो॒कम॑ञ्जसा न॒य॒ति। पु॒च्छ॒मन्वा॑र॒भन्ते। सु॒व॒र्गस्य॑
लो॒कस्य॑ स॒म॒ष्ट्यै। हिं॒ करो॑ति। सा॒मैवा॒कः॑॥ हिं॒ करो॑ति। उ॒द्गी॒थ ए॒वास्य॑ सः॑।
[८७] वड॑बा॒ उप॑ रुन्धन्ति। मि॒थु॒न॒त्वाय॑ प्र॒जा॒त्यै। अथो॑ यथो॒पगा॑ता॒र
उ॒पगा॑यन्ति। तादृ॑गे॒व तत्॥ उ॒दगा॑सीद॒श्चो मे॒ध्य इ॒त्याह॑। प्रा॒जा॒प॒त्यो वा॑ अ॒श्वः॑।
प्र॒जा॒प॒तिरु॒द्गी॒थः॑। उ॒द्गी॒थमे॒वाव॑रुन्धे। अथो॑ ऋ॒क्साम॑यो॒रेव॑ प्र॒ति॒तिष्ठ॑ति॥
हि॒रण्ये॑नोपा॒करो॑ति। ज्योति॒र्वै हि॒रण्य॑म्। ज्योति॒रेव॑ मु॒खतो॑ द॒धा॒ति। यज॑माने च
प्र॒जा॒सु च॑। अथो॑ हि॒रण्य॑ज्योति॒रेव॑ यज॑मानः सु॒व॒र्गं लो॒कमे॑ति॥[८८]

पुरुषो वै यज्ञः। यज्ञः प्रजापतिः। यदश्वे पशून्नियुञ्जन्ति। यज्ञादेव तद्यज्ञं
 प्रयुङ्क्ते॥ अश्वं तूपरं गोमृगम्। तानग्निष्ठ आलभते। सेनामुखमेव
 तत्सगृह्यति। तस्माद्राजमुखं भीष्मं भावुकम्॥ आग्नेयं कृष्णग्रीवं
 पुरस्ताल्ललाटे॥ पूर्वाग्निमेव तं कुरुते॥[८९] तस्मात्पूर्वाग्निं पुरस्तात्स्थापयन्ति।
 पौष्णमन्वञ्चम्॥ अन्नं वै पूषा। तस्मात्पूर्वाग्नावाहार्यमाहरन्ति॥
 ऐन्द्रापौष्णमुपरिष्ठात्। ऐन्द्रो वै राजन्योऽन्नं पूषा। अन्नाद्येनैवैनमुभयतः
 परिगृह्णाति। तस्माद्राजन्योऽन्नादो भावुकः॥ आग्नेयौ कृष्णग्रीवौ बाहुवोः।
 बाहुवोरेव वीर्यं धत्ते। [९०] तस्माद्राजन्यो बाहुबली भावुकः॥ त्वाष्ट्रौ
 लोमशसक्थौ सक्थ्योः। सक्थ्योरेव वीर्यं धत्ते। तस्माद्राजन्य ऊरुबली
 भावुकः॥ शितिपृष्ठौ बारहस्पत्यौ पृष्ठे। ब्रह्मवर्चसमेवोपरिष्ठाद्धत्ते। अथो कवचे
 एवैते अभितः पर्यूहते। तस्माद्राजन्यः सन्नद्धो वीर्यं करोति॥ धात्रे
 पृषोदरमधस्तात्। प्रतिष्ठामेवैतां कुरुते। अथो इयं वै धाता। अस्यामेव प्रति
 तिष्ठति॥ सौर्यं बलक्षं पुच्छे। उथ्सेधमेव तं कुरुते। तस्मादुथ्सेधं भये प्रजा
 अभिसगृह्यन्ति॥[९१]

ॐ

तैत्तिरीय ब्राह्मणे तृतीयाष्टके नवम प्रपाठकः

॥अश्वमेधस्य द्वितीयतृतीयाहर्विधानम्॥

हरिः ओम्॥ प्रजापतिरश्वमेधमसृजत। सोऽस्मात्सृष्टोऽपाक्रामत्।
तमष्टादशिभिरनु प्रायुङ्क्त। तमाप्नोत्। तमाप्त्वाऽष्टादशिभिरवारुन्धे। यदष्टादशिन
आलभ्यन्ते। यज्ञमेव तैराप्त्वा यजमानोऽवरुन्धे। संवत्सरस्य वा एषा प्रतिमा।
यदष्टादशिनः। द्वादश मासाः पञ्चर्तवः। [१] संवत्सरोऽष्टादशः। यदष्टादशिन
आलभ्यन्ते। संवत्सरेमेव तैराप्त्वा यजमानोऽवरुन्धे॥ अग्निष्टेऽन्यान्
पशूनुपाकरोति। इतरेषु यूपेष्वष्टादशिनोऽजामित्वाय। नवनवालभ्यन्ते
सवीर्यत्वाय॥ यदाऽऽरण्यैः सग्ग् स्थापयेत्। व्यवस्येतां पितापुत्रौ। व्यध्वानः
क्रामेयुः। विदूरं ग्रामयोग्रामान्तौ स्याताम्। [२] ऋक्षीकाः पुरुषव्याघ्राः
परिमोषिण आव्याधिनीस्तस्करा अरण्येष्वजायेरन्॥ तदाहुः। अपशवो वा एते।
यदारण्याः। यदारण्यैः सग्ग् स्थापयेत्। क्षिप्रे यजमानमरण्यं मृतगं हरेयुः।
अरण्यायतना ह्यारण्याः पशव इति। यत्पशून्नालभेत। अनवरुद्धा अस्य पशवः
स्युः। यत्पर्यग्निकृतानुत्सृजेत्। [३] यज्ञवेशसं कुर्यात्॥ यत्पशून्नालभेत। तेनैव
पशून्वरुन्धे। यत्पर्यग्निकृतानुत्सृजत्ययज्ञवैशसाय। अवरुद्धा अस्य पशवो
भवन्ति। न यज्ञवेशसं भवति। न यजमानमरण्यं मृतगं हरन्ति। ग्राम्यैः सग्ग्
स्थापयति। एते वै पशवः क्षेमो नाम। सं पितापुत्राववस्यतः। समध्वानः
क्रामन्ति। समन्तिकं ग्रामयोग्रामान्तौ भवतः। नर्क्षीकाः पुरुषव्याघ्राः परिमोषिण

आ॒व्या॒धिनी॒स्तस्करा॒ अरण्ये॒ष्वाजायन्ते॑॥[४]

प्र॒जाप॑तिर॒काम॑यतो॒भौ लो॒काव॑वरुन्धी॒येति॑। स ए॒तानु॒भया॑न् प॒शून्प॑श्यत्।
ग्रा॒म्याग्श्चा॒रण्या॑ग्श्च। ता॒नाल॑भत। तैर्वै स उ॒भौ लो॒काव॑वारुन्ध। ग्रा॒म्यैरे॒व
प॒शुभि॑रि॒मं लो॒कम॑वारुन्ध। आ॒रण्यैर॒मुम्। यद्ग्रा॒म्यान् प॒शूना॒लभ॑ते। इ॒ममे॒व
तैर्लो॒कम॑वरुन्धे। यदा॒रण्या॑न्।[५] अ॒मुं तैः॥ अ॒नवरु॑द्धो वा ए॒तस्य॑ सं॒वत्स॑र
इ॒त्याहुः॥ य इ॒त इ॒तश्चा॒तुर्मा॒स्यानि॑ सं॒वत्स॑रं प्र॒युङ्क्त॑ इति॑। ए॒तावा॑न् वै
सं॒वत्स॑रः। यच्चा॒तुर्मा॒स्यानि॑। यदे॒ते चा॒तुर्मा॒स्याः प॒शव॑ आ॒लभ्य॑न्ते। प्र॒त्यक्ष॑मे॒व
तैः सं॒वत्स॑रं यज॑मा॒नोऽव॑रुन्धे॥ वि वा ए॒ष प्र॒जया॑ प॒शुभि॑र्ऋ॒द्ध्यते॑। यः
सं॒वत्स॑रं प्र॒युङ्क्ते॑। सं॒वत्स॑रः सु॒वर्गो॑ लो॒कः।[६] सु॒वर्गं॑ तु लो॒कं
नाप॑रा॒ध्नोति॑। प्र॒जा वै प॒शव॑ ए॒काद॑शिनी॑। यदे॒त ऐ॒काद॑शि॒नाः प॒शव॑
आ॒लभ्य॑न्ते। सा॒क्षादे॒व प्र॒जां प॒शून् यज॑मा॒नोऽव॑रुन्धे॥ प्र॒जाप॑तिर्वि॒राज॑म॒सृज॑त।
सा सृ॒ष्टाऽश्व॑मे॒धं प्रा॑वि॒शत्। तां द॒शिभि॑रनु प्रा॒युङ्क्त॑। ता॒माप्नो॑त्। ता॒माप्त्वा
द॒शिभि॑रवा॒रुन्ध। यद्द॒शिन॑ आ॒लभ्य॑न्ते।[७] वि॒राज॑मे॒व तैरा॑प्त्वा
यज॑मा॒नोऽव॑रुन्धे॥ ए॒काद॑शद॒शत॑ आ॒लभ्य॑न्ते। ए॒काद॑शाक्षरा त्रि॒ष्टुप्। त्रै॒ष्टुभाः
प॒शवः॑। प॒शूने॒वाव॑रुन्धे॥ वै॒श्वदे॒वो वा अ॑श्वः। ना॒नादे॒वत्याः॑ प॒शवो॑ भवन्ति।
अ॒श्वस्य॑ सर्व॒त्वाय॑। ना॒नारू॒पा भव॑न्ति। तस्मा॒न्नाना॑रू॒पाः प॒शवः॑। ब॒हुरू॒पा
भव॑न्ति। तस्मा॒द्बहू॑रू॒पाः प॒शवः॑ स॒मृद्ध्यै॑॥[८]

अ॒स्मै॒ वै लो॒काय॑ ग्रा॒म्याः प॒शव॑ आल॒भ्यन्ते॑। अ॒मुष्मा॑ आ॒रण्याः॑। यद्ग्रा॒म्यान्
प॒शूना॑ल॒भते॑। इ॒ममे॒व तैर्लो॒कम॑व॒रुन्धे॑। यदा॒रण्यान्॑। अ॒मुं तैः॑। उ॒भया॑न्
प॒शूना॑ल॒भते॑। ग्रा॒म्याग्श्चा॒रण्या॑ग्श्च। उ॒भयोर्लो॒कयो॒रव॑रु॒द्ध्यै॑। उ॒भया॑न्
प॒शूना॑ल॒भते॑। [९] ग्रा॒म्याग्श्चा॒रण्या॑ग्श्च। उ॒भय॑स्यान्नाद्यस्याव॒रुद्ध्यै॑। उ॒भया॑न्
प॒शूना॑ल॒भते॑। ग्रा॒म्याग्श्चा॒रण्या॑ग्श्च। उ॒भये॑षां प॒शूना॑मव॒रुद्ध्यै॑॥ त्रय॑स्त्रयो
भव॑न्ति। त्रय॑ इ॒मे लो॒काः। ए॒षां लो॒काना॑माप्त्यै॑॥ ब्र॒ह्मवा॑दिनो॒ वद॑न्ति।
तस्मा॑त्स॒त्यात्। [१०] अ॒स्मिँल्लो॒के ब॒हवः॑ का॒मा इति॑। यत्स॒मानी॑भ्यो
दे॒वता॑भ्योऽन्ये॑ऽन्ये प॒शव॑ आल॒भ्यन्ते॑। अ॒स्मिन्ने॒व तल्लो॒के का॒मान्द॑धाति।
तस्मा॑द॒स्मिँल्लो॒के ब॒हवः॑ का॒माः॥ त्रया॑णां त्रया॑णाग्ं स॒ह व॒पा जु॑होति।
त्र्या॑वृ॒तो वै दे॒वाः। त्र्या॑वृ॒त इ॒मे लो॒काः। ए॒षां लो॒काना॑माप्त्यै॑। ए॒षां लो॒काना॑
क्लु॑प्त्यै॑॥ पर्य॑ग्निकृताना॒रण्या॑नु॒त्सृज॑न्त्यहि॒गंसा॑यै॑॥ [११]

यु॒ञ्जन्ति॑ ब्र॒ध्नमि॑त्याह। अ॒सौ वा आ॒दित्यो॑ ब्र॒ध्नः। आ॒दित्य॑मे॒वास्मै॑ यु॒नक्ति॑।
अ॒रुष॑मि॒त्याह॑। अ॒ग्निर्वा अ॒रुषः॑। अ॒ग्निमे॒वास्मै॑ यु॒नक्ति॑। च॒रन्त॑मि॒त्याह॑। वा॒युर्वै
च॒रन्। वा॒युमे॒वास्मै॑ यु॒नक्ति॑। प॒रित॑स्थुष॒ इत्या॑ह। [१२] इ॒मे वै लो॒काः
प॒रित॑स्थुषः॑। इ॒माने॒वास्मै॑ लो॒कान् यु॒नक्ति॑॥ रो॒चन्ते॑ रो॒चना॑ दि॒वीत्या॑ह।
नक्ष॑त्राणि वै रो॒चना॑ दि॒वि। नक्ष॑त्राण्ये॒वास्मै॑ रो॒चय॑ति। यु॒ञ्जन्त्य॑स्य का॒म्येत्या॑ह।
का॒माने॒वास्मै॑ यु॒नक्ति॑। ह॒री वि॒पक्ष॑सेत्या॑ह। इ॒मे वै ह॒री वि॒पक्ष॑सा। इ॒मे ए॒वास्मै॑
यु॒नक्ति॑। [१३] शो॒णा धृ॒ष्णू नृ॒वाह॑सेत्या॑ह। अ॒हो॒रात्रे॑ वै नृ॒वाह॑सा। अ॒हो॒रात्रे॑
ए॒वास्मै॑ यु॒नक्ति॑। ए॒ता ए॒वास्मै॑ दे॒वता॑ यु॒नक्ति॑। सु॒वर्ग॑स्य लो॒कस्य॑ स॒मष्ट्यै॑॥

के॒तुं कृ॒ण्वन्न॑के॒तव॑ इति॑ ध्व॒जं प्र॑तिमु॒ञ्चति॑। यश॑ ए॒वैन॒गं रा॒ज्ञां ग॑मयति।
जी॒मूत॑स्येव भवति॑ प्र॒तीक॑मित्याह। यथा॑ य॒जुरे॑वैतत्। ये ते॒ पन्था॑नः स॒वितः॑
पू॒र्व्यास॑ इत्य॒ध्वर्यु॑र्यज॒मानं॑ वाचयत्य॒भिजि॑त्यै॥[१४] परा॒ वा ए॒तस्य॑ य॒ज्ञ ए॑ति।
यस्य॑ प॒शुरु॑पाकृ॒तोऽन्यत्र॑ वे॒द्या ए॑ति। ए॒तग्ं स्तो॑तरेतेन॒ पथा॑
पुन॑रश्च॒माव॑र्तयासि न इत्याह। वा॒युर्वै स्तो॑ता। वा॒युमे॒वास्य॑ पर॒स्ताद॑धात्यावृ॒त्यै॥
यथा॑ वै ह॒विषो॑ गृही॒तस्य॑ स्कन्दति। एवं॑ वा ए॒तद॑श्चस्य स्कन्दति।
यद॑स्योपाकृ॒तस्य॑ लो॒मानि॑ शी॒यन्ते॑। यद्वा॒लेषु॑ का॒चाना॑वयन्ति। लो॒मान्ये॒वास्य॑
तथ्सं॑भरन्ति॥[१५] भूर्भुवः॑ सुव॒रिति॑ प्रा॒जाप॑त्याभि॒राव॑यन्ति। प्रा॒जाप॑त्यो वा
अ॒श्वः। स्वयै॒वैनं॑ दे॒वत॑या॒ सम॑र्धयन्ति। भू॒रिति॑ म॒हिषी॑। भुव॑ इति॒ वावा॑ता।
सुव॒रिति॑ परि॒वृत्ती॑। ए॒षां लो॒काना॑म॒भिजि॑त्यै॥ हि॒रण्य॑याः का॒चा भ॑वन्ति।
ज्योति॑र्वै हि॒रण्यम्। रा॒ष्ट्रम॑श्चमे॒धः॥[१६] ज्योति॑श्चै॒वास्मै॑ रा॒ष्ट्रं च॑ स॒मीची॑ दधाति।
सह॑स्रं भवन्ति। सह॑स्रसं॒मितः॑ सुव॒र्गो लो॒कः। सुव॒र्गस्य॑ लो॒कस्या॑भि॒जि॑त्यै॥
अप॑ वा ए॒तस्मा॑त्तेज॒ इन्द्रि॑यं प॒शवः॑ श्रीः क्रा॒मन्ति॑। योऽश्च॑मे॒धेन॑ यज॒ते।
वस॑वस्त्वाऽञ्जन्तु गाय॒त्रेण॑ छन्द॒सेति॑ म॒हिष्य॑भ्यनक्ति। तेजो॒ वा आ॑ज्यम्। तेजो॑
गाय॒त्री। तेज॑सै॒वास्मै॑ तेजोऽव॒रुन्धे॑॥[१७] रु॒द्रास्त्वाऽञ्जन्तु॑ त्रै॒ष्टुभे॑न छन्द॒सेति॑
वावा॑ता। तेजो॒ वा आ॑ज्यम्। इन्द्रि॒यं त्रि॒ष्टुप्। तेज॑सै॒वास्मा॑ इन्द्रि॒यमव॑रुन्धे।
आदि॑त्यास्त्वाऽञ्जन्तु जा॒गते॑न छन्द॒सेति॑ परि॒वृत्ती॑। तेजो॒ वा आ॑ज्यम्। प॒शवो॑
जग॑ती। तेज॑सै॒वास्मै॑ प॒शून्व॑रुन्धे। प॒नयो॑ऽभ्यञ्जन्ति। श्रि॒या वा ए॒तदू॑पम्॥[१८]
यत्प॑लयः। श्रि॒यमे॒वास्मि॑न्तद॒धति॑। नास्मा॑त्तेज॒ इन्द्रि॑यं प॒शवः॑ श्रीरप॒काम॑न्ति॥
ला॒जी ऽञ्छा॑ची॒ऽन् यशो॑ म॒माँ४ इत्य॑तिरिक्तमन्नमश्वा॒योपा॑हरन्ति।
प्र॒जामे॒वान्ना॒दीं कु॑र्वते। ए॒तद्दे॒वा अ॒न्नम॑तै॒तद॑न्नम॒द्धि प्र॑जाप॒त इत्या॑ह।

प्रजाया॑मे॒वान्नाद्यं॑ द॒धते॑ । यदि॑ ना॒वजिघ्र॑त् । अ॒ग्निः प॒शुरा॑सीदित्य॒वघ्रा॑पयेत् । अ॒व
है॒व जिघ्र॑ति॥ आ॒क्रान् वा॒जी क्र॒मैरत्य॑क्रमी॒द्वाजी॑ द्यौस्ते॒ पृष्ठं॑ पृथि॒वी
स॒धस्थ॑मित्य॒श्चम॑नु॒मन्त्र॑यते । ए॒षां लो॒काना॑म॒भिजि॑त्यै । स॒मिद्धो॑ अ॒ञ्जन्कृ॑दरं
मती॒नामि॑त्य॒श्चस्या॑प्रि॒यो भ॑वन्ति स॒रूप॑त्वाय॥[१९]

तेज॑सा वा ए॒ष ब्र॑ह्मवर्च॒सेन॑ व्य॒द्ध्यते॑ । योऽ॒श्वमे॒धेन॑ यज॑ते । होता॑ च ब्र॒ह्मा च॑
ब्र॒ह्मोद्यं॑ वदतः । तेज॑सा चै॒वैनं॑ ब्र॒ह्मवर्च॑सेन च स॒मर्थ॑यतः॥ दक्षि॒णतो॑ ब्र॒ह्मा
भ॑वति । दक्षि॒णत॑ आय॒तनो॑ वै ब्र॒ह्मा । बा॒र्हस्प॑त्यो वै ब्र॒ह्मा । ब्र॒ह्मवर्च॑समे॒वास्य॑
दक्षि॒णतो॑ दधाति । तस्मा॑दक्षि॒णोऽर्धो॑ ब्र॒ह्मवर्च॑सि॒तरः॥ उत्तर॑तो होता भवति॥[२०]
उत्तर॑त आय॒तनो॑ वै होता॑ । आ॒ग्नेयो॑ वै होता॑ । तेजो॑ वा अ॒ग्निः । तेज॑
ए॒वास्यो॑त्तर॑तो दधाति । तस्मा॑दुत्त॒रोऽर्ध॑स्तेज॒स्वितरः॥ यू॒पम॑भितो वदतः ।
यज॑मानदे॒वत्यो॑ वै यू॒पः । यज॑मानमे॒व तेज॑सा च ब्र॒ह्मवर्च॑सेन च स॒मर्थ॑यतः॥
किग्ग् स्वि॑दासीत्पूर्व॒चित्तिरि॑त्याह । द्यौर्वै॑ वृष्टिः पूर्॒वचित्तिः॥[२१] दि॒वमे॒व
वृष्टि॑मव॒रुन्धे॥ किग्ग् स्वि॑दासीद्बृ॒हद्वय॑ इत्याह । अ॒श्वो वै बृ॒हद्वयः॥
अ॒श्वमे॒वाव॑रुन्धे॥ किग्ग् स्वि॑दासीत्पि॒शङ्गि॑लेत्याह । रा॒त्रिर्वै पि॑शङ्गि॒ला ।
रा॒त्रिमे॒वाव॑रुन्धे॥ किग्ग् स्वि॑दासीत्पि॒लिप्पि॑लेत्याह । श्रीर्वै॑ पि॒लिप्पि॑ला ।
अ॒न्नाद्य॑मे॒वाव॑रुन्धे॥[२२] कः स्वि॑दे॒काकी॑ च॒रती॑त्याह । अ॒सौ वा आ॑दि॒त्य
ए॒काकी॑ च॒रति॑ । तेज॑ ए॒वाव॑रुन्धे॥ क उ॒ स्वि॑ज्जायते पुन॒रित्या॑ह । च॒न्द्रमा॑ वै
जा॒यते॑ पुनः । आ॒युरे॒वाव॑रुन्धे॥ किग्ग् स्वि॑द्धि॒मस्य॑ भेष॒जमि॑त्याह । अ॒ग्निर्वै
हि॒मस्य॑ भेष॒जम् । ब्र॒ह्मवर्च॑समे॒वाव॑रुन्धे॥ किग्ग् स्वि॑दा॒वप॑नं म॒हदि॑त्याह॥[२३]

अ॒यं वै लो॒क आ॒वप॑नं॒ मह॑त्। अ॒स्मिन्ने॒व लो॒के प्र॑ति॒तिष्ठ॑ति॥ पृ॒च्छामि॑ त्वा
पर॑म॒न्तं पृ॒थि॒व्या इ॒त्याह॑। वे॒दिर्वै प॑रोऽन्तः पृ॒थि॒व्याः। वे॒दिमे॒वाव॑रुन्धे॥ पृ॒च्छामि॑
त्वा भु॒वन॑स्य॒ नाभि॑मित्याह॑। य॒ज्ञो वै भु॒वन॑स्य॒ नाभिः॑। य॒ज्ञमे॒वाव॑रुन्धे॥
पृ॒च्छामि॑ त्वा वृ॒ष्णो अ॒श्वस्य॑ रे॒त इ॒त्याह॑। सो॒मो वै वृ॒ष्णो अ॒श्वस्य॑ रे॒तः।
सो॒मपी॒थमे॒वाव॑रुन्धे॥ पृ॒च्छामि॑ वा॒चः पर॑मं व्यो॒मेत्या॑ह॑। ब्र॒ह्म वै वा॒चः पर॑मं
व्यो॒म। ब्र॒ह्मव॑र्च॒समे॒वाव॑रुन्धे॥[१४]

अप॑ वा ए॒तस्मा॑त्प्रा॒णाः क्रा॑मन्ति॒ योऽश्व॑मे॒धेन॑ य॒जते॑। प्रा॒णाय॑ स्वाहा॒ व्या॒नाय॑
स्वाहे॑ति॒ सं॒ज्ञप्य॑मान॒ आहु॑तीर्जु॒होति॑। प्रा॒णाने॒वास्मि॑न्दधाति॒ नास्मा॑त्प्रा॒णा
अप॑क्रामन्ति॥ अ॒वन्तीः॒ स्थाव॑न्तीस्त्वाऽव॑न्तु। प्रि॒यं त्वा प्रि॒याणा॑म्।
वर्षि॑ष्ठमा॒प्याना॑म्। नि॒धीनां॑ त्वा नि॒धिप॑तिग्ं ह॒वामहे॑ व॒सो म॑मेत्याह॑। अपै॒वास्मै॑
तद्ध॑नुवते॥[१५] अथो॒ धुव॑न्त्ये॒वैन॑म्। अथो॒ न्ये॒वास्मै॑ हु॒वते॑॥ त्रिः॒ परि॑यन्ति॒ त्रय॑
इ॒मे लो॒काः। ए॒भ्य ए॒वैनं॑ लो॒केभ्यो॑ धुवते॥ त्रिः पुनः॒ परि॑यन्ति॒ षट्त्सं॑पद्यन्ते।
षड्वा ऋ॒तवः॑। ऋ॒तुभि॑रे॒वैनं॑ धुवते॥ अप॑ वा ए॒तेभ्यः॑ प्रा॒णाः क्रा॑मन्ति॥[१६] ये
य॒ज्ञे धु॒वनं॑ त॒न्वते॑। न॒वकृ॑त्वः॒ परि॑यन्ति॒ नव॑ वै पु॒रुषे॑ प्रा॒णाः।
प्रा॒णाने॒वात्म॑न्दधते। नै॒भ्यः प्रा॒णा अप॑क्रामन्ति॥ अ॒म्बे अ॒म्बाल्य॑म्बि॒क इति॑
प॒त्नीमु॑दानयति॒ अह॑तै॒वैना॑म्। सु॒भगे॑ का॒म्पी॒लवा॑सिनीत्याह॑। तप॑
ए॒वैना॑मु॒पन॑यति॒ सु॒वर्गे॑ लो॒के सं॒प्रो॒र्णवा॑मि॒त्याह॑॥[१७] सु॒वर्गमे॒वैनं॑ लो॒कं
ग॒मय॑ति॥ आ॒ऽह॒मजा॑नि ग॒र्भध॑मा त्वम॒जासि॑ ग॒र्भध॑मि॒त्याह॑। प्र॒जा वै प॒शवो॑

गर्भः। प्रजामेव पशूनात्मन्धत्ते॥ देवा वा अश्वमेधे पवमाने। सुवर्गं लोकं न
 प्राजानन्। तमश्चः प्राजानात्। यत्सूचीभिरसिपथान्कल्पयन्ति। सुवर्गस्य
 लोकस्य प्रजात्यै। गायत्री त्रिष्टुब्जगतीत्याह। [१८] यथा यजुरेवैतत्॥ त्रय्यः
 सूच्यो भवन्ति। अयस्मय्यो रजता हरिण्यः। अस्य वै लोकस्य रूपमयस्मय्यः।
 अन्तरिक्षस्य रजताः। दिवो हरिण्यः। दिशो वा अयस्मय्यः। अवान्तरदिशा
 रजताः। ऊर्ध्वा हरिण्यः। दिश एवास्मै कल्पयति॥ कस्त्वा छयति कस्त्वा
 विशास्तीत्याहाहिगंसायै॥ [१९]

अप वा एतस्माच्छ्री राष्ट्रं क्रामति। योऽश्वमेधेन यजते।
 ऊर्ध्वामेनामुच्छ्रयतादित्याह। श्रीर्वै राष्ट्रमश्वमेधः। श्रियमेवास्मै
 राष्ट्रमूर्ध्वमुच्छ्रयति॥ वेणुभारं गिराविवेत्याह। राष्ट्रं वै भारः। राष्ट्रमेवास्मै
 पर्यूहति॥ अथास्या मध्यमेधतामित्याह। श्रीर्वै राष्ट्रस्य मध्यम्। [३०]
 श्रियमेवावरुन्धे॥ शीते वाते पुनन्निवेत्याह। क्षेमो वै राष्ट्रस्य शीतो वातः।
 क्षेममेवावरुन्धे॥ यद्धरिणी यवमतीत्याह। विड्वै हरिणी। राष्ट्रं यवः। विशं
 चैवास्मै राष्ट्रं च समीची दधाति॥ न पुष्टं पशु मन्यत इत्याह। तस्माद्राजा
 पशून् पुष्यति॥ [३१] शूद्रा यदर्यजारा न पोषाय धनायतीत्याह।
 तस्माद्वैशीपुत्रन्नाभिषिञ्चन्ते॥ इयं यका शकुन्तिकेत्याह। विड्वै शकुन्तिका।
 राष्ट्रमश्वमेधः। विशं चैवास्मै राष्ट्रं च समीची दधाति॥ आहलमिति
 सर्पतीत्याह। तस्माद्राष्ट्राय विशः सर्पन्ति॥ आहतं गभे पस इत्याह। विड्वै
 गभः॥ [३२] राष्ट्रं पसः। राष्ट्रमेव विशाहन्ति। तस्माद्राष्ट्रं विशं घातुकम्॥ माता

च ते पिता च त इत्याह। इयं वै माता। असौ पिता। आभ्यामेवैनं परिददाति॥
 अग्रं वृक्षस्य रोहत इत्याह। श्रीर्वै वृक्षस्याग्रम्। श्रियमेवावरुन्धे॥ [३३]
 प्रसुलामीति ते पिता गभे मुष्टिमतगंसयदित्याह। विड्वै गभः। राष्ट्रं मुष्टिः।
 राष्ट्रमेव विश्याहन्ति। तस्माद्वाष्ट्रं विशं घातुकम्॥ अप वा एतेभ्यः प्राणाः
 क्रामन्ति। ये यज्ञेऽपूतं वदन्ति। दधिक्रावण्णो अकारिषमिति सुरभिमतीमृचं
 वदन्ति। प्राणा वै सुरभयः। प्राणानेवात्मन्दधते। नैभ्यः प्राणा अपक्रामन्ति॥
 आपो हि ष्ठा मयोभुव इत्यद्भिर्मार्जयन्ते। आपो वै सर्वा देवताः।
 देवताभिरेवात्मानं पवयन्ते॥[३४]

प्रजापतिः प्रजाः सृष्ट्वा प्रेणाऽनु प्राविशत्। ताभ्यः पुनः संभवितुं
 नाशक्नोत्। सोऽब्रवीत्। ऋध्नवदिथ्सः। यो मेतः पुनः संभरदिति। तं देवा
 अश्वमेधेनैव समभरन्। ततो वै त आर्धुवन्। योऽश्वमेधेन यजते।
 प्रजापतिमेव संभरत्यृध्नोति॥ पुरुषमालभते। [३५] वैराजो वै पुरुषः।
 विराजमेवालभते। अथो अन्नं वै विराट्। अन्नमेवावरुन्धे॥ अश्वमालभते।
 प्राजापत्यो वा अश्वः। प्रजापतिमेवालभते। अथो श्रीर्वा एकशफम्।
 श्रियमेवावरुन्धे॥ गामालभते। [३६] यज्ञो वै गौः। यज्ञमेवालभते। अथो अन्नं वै
 गौः। अन्नमेवावरुन्धे॥ अजावी आलभते भूम्ने। अथो पुष्टिर्वै भूमा।
 पुष्टिमेवावरुन्धे। पर्यग्निकृतं पुरुषं चारण्याग्श्चोत्सृजन्त्यहिगंसायै॥ उभौ वा
 एतौ पशू आलभ्येते। यश्चावमो यश्च परमः। तेऽस्योभये यज्ञे बद्धाः। अभीष्टा
 अभिप्रीताः। अभिजिता अभिहुता भवन्ति। नैनं दक्ष्णवः पशवो यज्ञे बद्धाः।

अभीष्टा॑ अभिप्री॑ताः। अभिजि॑ता अभिहु॑ता हिग्ंसन्ति॑। योऽश्वमे॒धेन॑ यज॑ते। य
उ॑ चैनमे॒वं वेद॑॥[३७]

प्रथ॑मेन॒ वा ए॒ष स्तो॑मेन॒ राध्वा॑। चतु॑ष्टोमेन॒ कृते॑नाया॒नामु॑त्तरेऽह॒न्। एक॑वि॒गंशे॑
प्रति॑ष्ठायां॒ प्र॒ति॒तिष्ठ॑ति। एक॑वि॒गंशात्प्र॑तिष्ठाया॒ ऋतू॑न्वा॒रोह॑ति। ऋत॑वो॒ वै
पृ॒ष्ठानि॑। ऋत॑वः॒ संव॑त्सरः। ऋतु॑ष्वे॒व संव॑त्सरे॒ प्रति॑ष्ठाया॒ देव॑ता॒ अभ्या॑रोहति।
शक्व॑रयः॒ पृ॒ष्ठं भ॑वन्त्यन्यद॒न्यच्छ॑न्दः। अन्ये॑ऽन्ये॒ वा ए॒ते प॑शव॒ आल॑भ्यन्ते।
[३८] उ॒तेव॑ ग्रा॒म्याः। उ॒तेवा॑रण्याः। अ॒हरे॑व रू॒पेण॑ स॒मर्ध॑यति। अथो॑ अ॒ह ए॒वैष॑
ब॒लिर्ह्रि॑यते॥ तदा॑हुः। अ॒प॒शवो॑ वा ए॒ते। यद॑जाव॒यश्चा॑रण्याश्च। ए॒ते वै स॑र्वे
प॒शवः॑। यद्ग॒व्या इति॑। ग॒व्यान् प॑शूनु॒त्तमे॑ऽह॒न्नाल॑भते। [३९] तेनै॒वोभ्या॑न्
प॒शून्व॑रुन्धे। प्रा॒जाप॑त्या भवन्ति। अ॒न॒भिजि॑तस्याभिजित्यै॑॥ सौरी॑र्न॒व श्वे॑ता
व॒शा अ॒नूब॑न्ध्या भवन्ति। अ॒न्तत॑ ए॒व ब्र॑ह्मव॒र्चस॑मव॒रुन्धे॑। सोमा॑य
स्व॒राज्ञे॑ऽनोवा॒हाव॑न॒ड्वाहा॑विति॒ द्वन्दि॑नः प॒शूना॑लभते। अ॒हो॒रा॒त्राणा॑म॒भिजि॑त्यै॥
प॒शुभि॑र्वा ए॒ष व्य॑द्ध्यते। योऽश्वमे॒धेन॑ यज॑ते। छ॒गलं॑ क॒ल्माषं॑ कि॒किदी॑विं
वि॒दी॒गय॑मिति॒ त्वाष्ट्रा॑न् प॒शूना॑लभते। प॒शुभि॑रे॒वात्मा॑न॒गं स॑मर्धयति॥ ऋतु॑भि॒र्वा
ए॒ष व्य॑द्ध्यते। योऽश्वमे॒धेन॑ यज॑ते। पि॒शङ्गा॑स्त्रयो॒ वास॑न्ता इत्य॑तुप॒शूना॑लभते।
ऋतु॑भि॒रे॒वात्मा॑न॒गं स॑मर्धयति॥ आ॒ वा ए॒ष प॑शु॒भ्यो वृ॑श्च्यते। योऽश्वमे॒धेन॑
यज॑ते। पर्य॑ग्निकृ॒ता उ॒थ्सृ॑जन्त्यना॒व्रस्का॑य॥[४०]

प्रजापतिरकामयत महानन्नादः स्यामिति। स एतावश्चमेधे महिमानावपश्यत्।
तावगृहीत। ततो वै स महानन्नादोऽभवत्। यः कामयेत महानन्नादः स्यामिति।
स एतावश्चमेधे महिमानो गृहीत। महानेवान्नादो भवति॥ यजमानदेवत्या वै
वपा। राजा महिमा। यद्वपां महिम्नोभयतः परियजति। यजमानमेव
राज्येनोभयतः परिगृह्णाति॥ पुरस्तात्स्वाहाकारा वा अन्ये देवाः।
उपरिष्ठात्स्वाहाकारा अन्ये। ते वा एतेऽश्च एव मेध्य उभयेऽवरुध्यन्ते। यद्वपां
महिम्नोभयतः परियजति। तानेवोभयान् प्रीणाति॥[४१]

वैश्वदेवो वा अश्वः। तं यत्प्राजापत्यं कुर्यात्। या देवता अपिभागाः। ता
भागधेयेन व्यर्धयेत्। देवताभ्यः समदं दध्यात्। स्तेगान्दग्घ्वाभ्यां
मण्डूकाञ्जम्भ्येभिरिति। आज्यमवदानं कृत्वा प्रतिसंख्यायमाहुतीर्जुहोति। या
एव देवता अपिभागाः। ता भागधेयेन समर्धयति। न देवताभ्यः समदं दधाति॥
[४२] चतुर्दशैताननुवाकाञ्जुहोत्यनन्तरित्यै। प्रयासाय स्वाहेति पञ्चदशम्।
पञ्चदश वा अर्धमासस्य रात्रयः। अर्धमासशः संवत्सर आप्यते॥ देवासुराः
संयत्ता आसन्। तेऽब्रुवन्नग्नयः स्विष्टकृतः। अश्वस्य मेध्यस्य
वयमुद्धारमुद्धारमहै। अथैतानभिभवामेति। ते लोहितमुदहरन्ता। ततो देवा
अभवन्॥[४३] पराऽसुराः। यत्स्विष्टकृद्भ्यो लोहितं जुहोति भ्रातृव्याभिभूत्यै।
भवत्यात्मना॥ पराऽस्य भ्रातृव्यो भवति॥ गोमृगकण्ठेन प्रथमामाहुतिं जुहोति।
पशवो वै गोमृगः। रुद्रोऽग्निः स्विष्टकृत्। रुद्रादेव पशूनन्तर्दधाति। अथो
यत्रैषाऽहुतिर् हूयते। न तत्र रुद्रः पशूनभिमन्यते॥ [४४] अश्वशफेन

द्वितीयामाहुतिं जुहोति। पशवो वा एकशफम्। रुद्रोऽग्निः स्विष्टकृत्। रुद्रादेव
पशूनन्तर्दधाति। अथो यत्रैषाऽऽहुतिर् हूयते। न तत्र रुद्रः पशूनभिमन्यते॥
अयस्मर्येन कमण्डलुना तृतीयाम्। आहुतिं जुहोत्यायास्यो वै प्रजाः।
रुद्रोऽग्निः स्विष्टकृत्। रुद्रादेव प्रजा अन्तर्दधाति। अथो यत्रैषाऽऽहुतिर् हूयते।
न तत्र रुद्रः प्रजा अभिमन्यते॥[४५]

अश्वस्य वा आलब्धस्य मेध उदक्रामत्। तदश्वस्तोमीयमभवत्। यदश्वस्तोमीयं
जुहोति। स मेधमेवैनमालभते॥ आज्येन जुहोति। मेधो वा आज्यम्।
मेधोऽश्वस्तोमीयम्। मेधेनैवास्मिन्मेधं दधाति॥ षट्त्रिंशतं जुहोति।
षट्त्रिंशदक्षरा बृहती॥[४६] बार्हताः पशवः। सा पशूनां मात्रा। पशूनेव
मात्रया समर्धयति। ता यद्धूयसीर्वा कनीयसीर्वा जुहुयात्। पशून्मात्रया
व्यर्धयेत्। षट्त्रिंशतं जुहोति। षट्त्रिंशदक्षरा बृहती। बार्हताः पशवः। सा
पशूनां मात्रा। पशूनेव मात्रया समर्धयति॥[४७] अश्वस्तोमीयगं हुत्वा द्विपदा
जुहोति। द्विपाद्वै पुरुषो द्विप्रतिष्ठः। तदेनं प्रतिष्ठया समर्धयति॥ तदाहुः।
अश्वस्तोमीयं पूर्वगं होतव्या ३ द्विपदा ३ इति। अश्वो वा अश्वस्तोमीयम्।
पुरुषो द्विपदाः। अश्वस्तोमीयगं हुत्वा द्विपदा जुहोति।
तस्माद्द्विपाच्चतुष्पादमत्ति। अथो द्विपद्येव चतुष्पदः प्रतिष्ठापयति। द्विपदा हुत्वा।
नान्यामुत्तरामाहुतिं जुहुयात्। यदन्यामुत्तरामाहुतिं जुहुयात्। प्र प्रतिष्ठायाश्च्यवेत।
द्विपदा अन्ततो जुहोति प्रतिष्ठित्यै॥[४८]

प्रजापतिरश्वमेधमसृजत। सोऽस्मात्सृष्टोऽपाक्रामत्। तं यज्ञक्रतुभिरन्वच्छत्। तं
यज्ञक्रतुभिर्नान्वविन्दत्। तमिष्टिभिरन्वच्छत्। तमिष्टिभिरन्वविन्दत्।
तदिष्टीनामिष्टित्वम्। यथ्संवत्सरमिष्टिभिर्यजते। अश्वमेव तदन्विच्छति॥
सावित्रियो भवन्ति। [४९] इयं वै सविता। यो वा अस्यां नश्यति यो निलयते।
अस्यां वाव तं विन्दन्ति॥ न वा इमां कश्च नेत्याहुः।
तिर्यङ्नोर्ध्वोऽत्येतुमर्हतीति। यथसावित्रियो भवन्ति। सवितृप्रसूत
एवैनमिच्छति॥ ईश्वरो वा अश्वः प्रमुक्तः परां परावतं गन्तौः। यथसायं
धृतीर्जुहोति। अश्वस्य यत्यै धृत्यै॥ [५०] यत्प्रातरिष्टिभिर्यजते। अश्वमेव
तदन्विच्छति। यथसायं धृतीर्जुहोति। अश्वस्यैव यत्यै धृत्यै। तस्मात्सायं प्रजाः
क्षेम्या भवन्ति। यत्प्रातरिष्टिभिर्यजते। अश्वमेव तदन्विच्छति। तस्मादिवा नष्टैष
एति॥ यत्प्रातरिष्टिभिर्यजते सायं धृतीर्जुहोति। अहोरात्राभ्यामेवैनमन्विच्छति।
अथो अहोरात्राभ्यामेवास्मै योगक्षेमं कल्पयति॥ [५१]

अप वा एतस्माच्छ्रीं राष्ट्रं क्रामति। योऽश्वमेधेन यजते। ब्राह्मणौ वीणागाथिनौ
गायतः। श्रिया वा एतद्रूपम्। यद्वीणा। श्रियमेवास्मिन्तद्धतः। यदा खलु वै
पुरुषः श्रियमश्नुते। वीणाऽस्मै वाद्यते॥ तदाहुः। यदुभौ ब्राह्मणौ गायताम्। [५२]
प्रभ्रगंशुकाऽस्माच्छ्रीः स्यात्। न वै ब्राह्मणे श्री रमत इति। ब्राह्मणोऽन्यो
गायत्। राजन्योऽन्यः। ब्रह्म वै ब्राह्मणः। क्षत्रगं राजन्यः। तथा हास्य ब्रह्मणा
च क्षत्रेण चोभयतः श्रीः परिगृहीता भवति॥ तदाहुः। यदुभौ दिवा गायताम्।

अपा॑स्माद्वा॒ष्ट्रं॑ क्रा॒मेत्॑।[५३] न वै ब्रा॒ह्म॒णे रा॒ष्ट्रं र॑म॒त इति॑। यदा॑ खलु॒ वै राजा॑
का॒मय॑ते। अथ॑ ब्रा॒ह्म॒णं जि॑नाति। दि॒वा ब्रा॒ह्म॒णो गा॑येत्। न॒क्तं रा॒ज॒न्यः। ब्रा॒ह्म॒णो
वै रू॒प॒महः॑। क्ष॒त्र॒स्य रा॒त्रिः। तथा॑ हा॒स्य ब्रा॒ह्म॒णा च॑ क्ष॒त्रेण॑ चोभयतो॑ रा॒ष्ट्रं
परि॑गृही॒तं भ॑वति॥ इत्य॑द॒दा इत्य॑यज॒था इत्य॑प॒च इति॑ ब्रा॒ह्म॒णो गा॑येत्। इ॒ष्टापूर्तं॑
वै ब्रा॒ह्म॒णस्य॑।[५४] इ॒ष्टापूर्ते॑नै॒वैन॑गं स॒ सम॑र्धयति॥ इत्य॑जि॒ना इत्य॑यु॒ध्यथा॑
इत्य॑मु॒गं सं॒ग्रा॒मम॑ह॒न्निति॑ रा॒ज॒न्यः। यु॒द्धं वै रा॒ज॒न्यस्य॑। यु॒द्धेनै॒वैन॑गं स॒
सम॑र्धयति॥ अ॒क्लु॒प्ता वा ए॒तस्य॑र्त॒व इत्या॑हुः। योऽश्व॑मे॒धेन॑ यज॒त इति॑।
ति॒स्रोऽन्यो॑ गा॑यति॒ तिस्रो॑ऽन्यः। षट्थ॑संप॒द्यन्ते॑। षड्वा॑ ऋ॒तवः॑। ऋ॒तून्वास्मै॑
कल्प॑यतः॥ ताभ्या॑गं स॒गं स्था॑याम्। अ॒नो॒युक्ते॑ च॒ श॒ते च॑ द॒दाति॑॥ श॒तायुः॑
पुरु॑षः श॒तेन्द्रि॑यः। आयु॑ष्ये॒वेन्द्रि॑ये प्र॒ति॒तिष्ठ॑ति॥[५५]

सर्वे॑षु वा ए॒षु लो॒केषु॑ मृ॒त्यवोऽन्वा॑य॒ताः। तेभ्यो॑ यदाहु॑ती॒र्न जुहु॑यात्।
लो॒के लो॒क ए॒नं मृ॒त्युर्वि॑न्देत्। मृ॒त्यवे॑ स्वा॒हा मृ॒त्यवे॑
स्वा॒हेत्य॑भिपूर्व॑माहु॑तीर्जु॒होति॑। लो॒का लो॒का दे॒व मृ॒त्युम॑वयजते। नैनं॑
लो॒के लो॒के मृ॒त्युर्वि॑न्दति॥ यद॒मुष्मै॑ स्वा॒हाऽमुष्मै॑ स्वा॒हेति॑ जुह्व॑त्संच॒क्षी॒त। बहुं॑
मृ॒त्युम॑मि॒त्रं कु॑र्वीत। मृ॒त्यवे॑ स्वा॒हेत्ये॒कस्मा॑ ए॒वैकां॑ जुहु॑यात्। ए॒को वा
अ॒मुष्मिँ॑ल्लो॒के मृ॒त्युः।[५६] अ॒श॒नया॑ मृ॒त्युरे॒वा तमे॒वामुष्मिँ॑ल्लो॒केऽव॑ यजते॥
भ्रू॒ण॒ह॒त्यायै॑ स्वा॒हेत्य॑वभृथ॒ आहु॑तिं जुहोति॑। भ्रू॒ण॒ह॒त्यामे॒वाव॑ यजते॥ तदाहुः॑।
यद्भ्रू॒ण॒ह॒त्याऽपा॒त्र्याऽथ॑। कस्मा॑द्य॒ज्ञेऽपि॑ क्रि॒यत॑ इति॥ अ॒मृ॒त्युर्वा अ॒न्यो
भ्रू॒ण॒ह॒त्याया॑ इत्याहुः॑। भ्रू॒ण॒ह॒त्या वा॒व मृ॒त्युरि॑ति॑। यद्भ्रू॒ण॒ह॒त्यायै॑ स्वा॒हेत्य॑वभृथ॒

आहु॑तिं जु॒होति॑।[५७] मृ॒त्युमे॒वाहु॑त्या तर्पयित्वा परि॒पाणं॑ कृ॒त्वा। भ्रू॒णघ्ने॑ भेष॒जं
करो॑ति॥ ए॒ताग्ं ह॒ वै मु॒ण्डिभ॑ औ॒दन्यवः॑। भ्रू॒णह॑त्यायै प्रायश्चि॒तिं
विदा॑ञ्चकार। यो हास्यापि प्र॒जायां॑ ब्राह्म॒णग्ं ह॑न्ति। सर्व॑स्मै तस्मै भेष॒जं
करो॑ति॥ जु॒म्बका॑य स्वाहेत्यवभृथ उत्त॒मामाहु॑तिं जुहोति। वरु॒णो वै जु॒म्बकः॑।
अ॒न्तत॑ ए॒व वरु॑णमवयजते॥ खल॒तेर्वि॒क्लिध॑स्य शु॒क्लस्य॑ पिङ्गाक्ष॒स्य
मूर्ध॑ञ्जुहोति। ए॒तद्वै वरु॑णस्य रू॒पम्। रू॒पेणै॒व वरु॑णमवयजते॥[५८]

वारु॒णो वा अ॑श्वः। तं दे॒वत॑या व्य॒र्धय॑ति। यत्प्रा॑जाप॒त्यं करो॑ति। नमो॒ राज्ञे॑ नमो॒
वरु॑णायेत्याह। वारु॒णो वा अ॑श्वः। स्वयै॒वैनं॑ दे॒वत॑या स॒मर्ध॑यति। नमोऽश्वा॒य
नमः॑ प्र॒जाप॑तय॒ इत्या॑ह। प्रा॒जाप॑त्यो वा अ॑श्वः। स्वयै॒वैनं॑ दे॒वत॑या स॒मर्ध॑यति॥
नमोऽधि॑पतय॒ इत्या॑ह। [५९] धर्मो॒ वा अधि॑पतिः। धर्म॑मे॒वावरु॑न्धे।
अधि॑पतिरस्यधि॒पतिं॑ मा कु॒र्वधि॑पतिर॒हं प्र॒जानां॑ भूयास॒मित्या॑ह।
अधि॑पतिमे॒वैनग्ं॑ स॒माना॑नां करोति॥ मां धे॒हि मयि॑ धे॒हीत्या॑ह।
आ॒शिष॑मे॒वैता॑माशास्ते। उ॒पाकृ॑ताय स्वाहेत्यु॒पाकृ॑ते जुहोति। आल॒ब्धाय॑
स्वाहे॑ति॒ नियु॑क्ते जुहोति। हु॒ताय॑ स्वाहेति हु॒ते जुहो॑ति। ए॒षां
लो॒काना॑मभिजित्यै॥[६०] प्र वा ए॒ष ए॒भ्यो लो॒केभ्य॑श्च्यवते। योऽश्व॑मे॒धेन॑ यजते।
आ॒ग्नेय॑मे॒न्द्रा॒ग्नमा॑श्चिनम्। तान् प॒शूना॑लभते प्रतिष्ठित्यै। यदा॒ग्नेयो॑ भवति।
अ॒ग्निः सर्वा॑ दे॒वताः॑। दे॒वता॑ ए॒वावरु॑न्धे। ब्र॒ह्म वा अ॒ग्निः। क्ष॒त्रमिन्द्रः॑।
यदै॒न्द्रा॒ग्नो भव॑ति। [६१] ब्र॒ह्मक्ष॑त्रे ए॒वावरु॑न्धे। यदा॒श्विनो॑ भवति।
आ॒शिषा॑मवरुद्ध्यै। त्रयो॑ भवन्ति। त्रय॑ इमे लो॒काः। ए॒ष्वेव॑ लो॒केषु॑ प्रति॒तिष्ठ॑ति॥

अ॒ग्नयेऽग॑हो॒मुचेऽष्टा॑क॒पाल॒ इति॑ द॒शह॑विषमिष्टिं॒ निर्व॑पति। द॒शाक्ष॑रा वि॒राट्।
अ॒न्नं वि॒राट्। वि॒राजै॒वान्नाद्य॑मव॒रुन्धे॥ अ॒ग्नेर्म॑न्वे प्रथ॒मस्य॑ प्र॒चेत॑स इति॒
याज्या॑नुवाक्या भवन्ति सर्व॒त्वाय॑॥[६२]

यद्य॑श्चमु॒पत॑प॒द्विन्दे॑त्। आ॒ग्नेय॑म॒ष्टाक॑पालं॒ निर्व॑पेत्। सौ॒म्यं च॒रुम्।
सा॒वि॒त्रम॒ष्टाक॑पालम्। यदा॒ग्नेयो॑ भवति। अ॒ग्निः सर्वा॑ दे॒वताः॑। दे॒वता॑भिरे॒वैनं॑
भिष॑ज्यति। यत्सौ॒म्यो भव॑ति। सोमो॒ वा ओष॑धीनागं॒ राजा॑। याभ्य॑ ए॒वैनं॑
वि॒न्दति॑।[६३] ताभिरे॒वैनं॑ भिष॑ज्यति। यत्सा॒वि॒त्रो भव॑ति। स॒वितृ॑प्र॒सूत॑ ए॒वैनं॑
भिष॑ज्यति। ए॒ताभिरे॒वैनं॑ दे॒वता॑भिर्भिष॑ज्यति। अ॒गदो॑ है॒व भव॑ति॥ पौ॒ष्णं च॒रुं
निर्व॑पेत्। यदि॑ श्लो॒णः स्या॑त्। पू॒षा वै श्लौ॑ण्यस्य भिषक्। स ए॒वैनं॑
भिष॑ज्यति। अ॒श्लो॒णो है॒व भव॑ति।[६४] रौ॒द्रं च॒रुं निर्व॑पेत्। यदि॑ म॒हती॑
दे॒वता॑ऽभि॒मन्ये॑त। ए॒तद्दे॒वत्यो॑ वा अ॒श्वः। स्वयै॒वैनं॑ दे॒वत॑या भिष॑ज्यति। अ॒गदो॑
है॒व भव॑ति॥ वै॒श्वान॑रं द्वाद॒शक॑पालं॒ निर्व॑पेन्मृ॒गाख॑रे यदि॑ नागच्छेत्। इ॒यं वा
अ॒ग्निर्वै॒श्वान॑रः। इ॒यमे॒वैन॑म॒र्चिभ्यां॑ परि॒रोध॑मानयति। आ॒है॒व सु॒त्यम॑हर्गच्छति॥
यद्य॑धीयात्।[६५] अ॒ग्नयेऽग॑हो॒मुचेऽष्टा॑क॒पालः। सौ॒र्यं प॒योः। वा॒यव्य॑
आ॒ज्यभा॑गः। यज॑मानो वा अ॒श्वः। अ॒गंह॑सा वा ए॒ष गृ॑हीतः। यस्या॒श्वो मे॒धाय॑
प्रोक्षि॑तोऽध्येति। यद॒गंहो॒मुचे॑ निर्व॑पति। अ॒गंह॑स ए॒व तेन॑ मुच्यते॥ यज॑मानो
वा अ॒श्वः। रे॒तसा॑ वा ए॒ष व्य॑ध्यते।[६६] यस्या॒श्वो मे॒धाय॑ प्रोक्षि॑तोऽध्येति।
सौ॒र्यं रे॒तः। यत्सौ॒र्यं प॒यो भव॑ति। रे॒तसै॒वैन॑गं॒ स स॑म॒र्धय॑ति॥ यज॑मानो वा
अ॒श्वः। गर्भै॒र्वा ए॒ष व्य॑ध्यते। यस्या॒श्वो मे॒धाय॑ प्रोक्षि॑तोऽध्येति। वा॒यव्या॑ गर्भाः॑।

यद्वायव्यं आज्यभागो भवति। गर्भैरेवैनगं स समर्धयति। अथो यस्यैषाऽश्चमेधे प्रायश्चित्तिः क्रियते। इष्ट्वा वसीयान् भवति॥[६७]

तदाहुः। द्वादश ब्रह्मौदनान्त्सगग्स्थिते निर्वपेत्। द्वादशभिर्वेष्टिभिर्यजेतेति। यदिष्टिभिर्यजेत। उपनामुक एनं यज्ञः स्यात्। पापीयागस्तु स्यात्॥ आप्तानि वा एतस्य छन्दागंसि। य ईजानः। तानि क एतावदाशु पुनः प्रयुञ्जीतेति। सर्वा वै सगग्स्थिते यज्ञे वागाप्यते। [६८] साऽऽप्ता भवति यातयाम्नी। क्रूरीकृतेव हि भवत्यरुष्कृता। सा न पुनः प्रयुज्येत्याहुः। द्वादशैव ब्रह्मौदनान्त्सगग् स्थिते निर्वपेत्॥ प्रजापतिर्वा ओदनः। यज्ञः प्रजापतिः। उपनामुक एनं यज्ञो भवति। न पापीयान् भवति। द्वादश भवन्ति। द्वादश मासाः संवत्सरः। संवत्सर एव प्रतितिष्ठति॥[६९]

एष वै विभूर्नाम यज्ञः। सर्वगं ह वै तत्र विभु भवति। यत्रैतेन यज्ञेन यजन्ते। एष वै प्रभूर्नाम यज्ञः। सर्वगं ह वै तत्र प्रभु भवति। यत्रैतेन यज्ञेन यजन्ते। एष वा ऊर्जस्वान्नाम यज्ञः। सर्वगं ह वै तत्रोर्जस्वद्भवति। यत्रैतेन यज्ञेन यजन्ते। एष वै पयस्वान्नाम यज्ञः। [७०] सर्वगं ह वै तत्र पयस्वद्भवति। यत्रैतेन यज्ञेन यजन्ते। एष वै विधृतो नाम यज्ञः। सर्वगं ह वै तत्र विधृतं भवति। यत्रैतेन यज्ञेन यजन्ते। एष वै व्यावृत्तो नाम यज्ञः। सर्वगं ह वै तत्र व्यावृत्तं भवति। यत्रैतेन यज्ञेन यजन्ते। एष वै प्रतितिष्ठितो नाम यज्ञः। सर्वगं ह वै तत्र

प्रतिष्ठितं भवति। [७१] यत्रैतेन यज्ञेन यजन्ते। एष वै तेजस्वी नाम यज्ञः।
 सर्वगं ह वै तत्र तेजस्वि भवति। यत्रैतेन यज्ञेन यजन्ते। एष वै ब्रह्मवर्चसी
 नाम यज्ञः। आ ह वै तत्र ब्राह्मणो ब्रह्मवर्चसी जायते। यत्रैतेन यज्ञेन यजन्ते।
 एष वा अतिव्याधी नाम यज्ञः। आ ह वै तत्र राजन्योऽतिव्याधी जायते।
 यत्रैतेन यज्ञेन यजन्ते। एष वै दीर्घो नाम यज्ञः। दीर्घायुषो ह वै तत्र मनुष्या
 भवन्ति। यत्रैतेन यज्ञेन यजन्ते। एष वै क्लृप्तो नाम यज्ञः। कल्पते ह वै तत्र
 प्रजाभ्यो योगक्षेमः। यत्रैतेन यज्ञेन यजन्ते॥ [७२]

ताप्येणाश्वगं संज्ञपयन्ति। यज्ञो वै ताप्यम्। यज्ञेनैवैनगं समर्थयन्ति। यामेन
 साम्नां प्रस्तोताऽनूपतिष्ठते। यमलोकमेवैनं गमयति॥ ताप्ये च कृत्यधीवासे
 चाश्वगं संज्ञपयन्ति। एतद्वै पशूनागं रूपम्। रूपेणैव पशूनवरुन्धे।
 हिरण्यकशिपु भवति। तेजसोऽवरुद्ध्यै। [७३] रुक्मो भवति। सुवर्गस्य
 लोकस्यानुख्यात्यै। अश्वो भवति। प्रजापतेराप्त्यै॥ अस्य वै लोकस्य रूपं
 ताप्यम्। अन्तरिक्षस्य कृत्यधीवासः। दिवो हिरण्यकशिपु। आदित्यस्य रुक्मः।
 प्रजापतेरश्वः। इममेव लोकं ताप्येणाप्नोति। [७४] अन्तरिक्षं कृत्यधीवासेन।
 दिवगं हिरण्यकशिपुना। आदित्यगं रुक्मेण। अश्वेनैव मेध्येन प्रजापतेः
 सायुज्यगं सलोकतामाप्नोति। एतासामेव देवतानागं सायुज्यम्। सारष्टितागं
 समानलोकतामाप्नोति। योऽश्वमेधेन यजते। य उ चैनमेवं वेद॥ [७५]

आ॒दि॒त्याश्चाङ्गि॑र॒सश्च॑ सु॒वर्गे लो॒केऽस्पर्ध॑न्ता॒ तेऽङ्गि॑र॒स आ॒दित्ये॑भ्यः।
 अ॒मु॒मादि॒त्यम॑श्च॒ग्ं श्वे॒तं भू॒तं दक्षि॑णाम॒नय॑न्। तेऽबु॑वन्। यं नोऽने॑ष्टा स
 वर्योऽभू॑दिति। तस्मा॒दश्च॒ग्ं स॒वर्ये॑त्याह्व॑यन्ति। तस्मा॑द्य॒ज्ञे वरो॑ दी॒यते॥
 यत्प्र॒जाप॑तिराल॒ब्धोऽश्वो॑ऽभवत्। तस्मा॒दश्वो॑ नाम। [७६] यच्छ॒वय॑दरु॒रासी॑त्।
 तस्मा॒दर्वा॑ नाम। यथ्स॒द्यो वाजा॑न्त्सम॒जय॑त्। तस्मा॑द्वाजी नाम। यदसुराणां
 लो॒काना॑दत्ता। तस्मा॒दादि॒त्यो नाम॥ अ॒ग्निर्वा अ॑श्वमे॒धस्य॑ योनि॒राय॑तनम्।
 सूर्योऽग्ने॒र्योनि॑राय॒तनम्। यद॑श्वमे॒धेऽग्नौ चि॒त्य उत्तर॑वेदिमु॒पव॑पति।
 योनि॑मन्तमे॒वैन॑माय॒तन॑वन्तं करोति। [७७] योनि॑मानाय॒तन॑वान् भवति। य ए॒वं
 वेद॑॥ प्रा॒णापा॒नौ वा ए॒तौ दे॒वाना॑म्। यद॑र्काश्वमे॒धौ। प्रा॒णापा॒नावे॒वावरु॑न्धे।
 ओ॒जो ब॒लं वा ए॒तौ दे॒वाना॑म्। यद॑र्काश्वमे॒धौ। ओ॒जो ब॒लमे॒वावरु॑न्धे॥
 अ॒ग्निर्वा अ॑श्वमे॒धस्य॑ योनि॒राय॑तनम्। सूर्योऽग्ने॒र्योनि॑राय॒तनम्। यद॑श्वमे॒धेऽग्नौ
 चि॒त्य उत्तर॑वेदिं चि॒नोति॑। ताव॑र्काश्वमे॒धौ। अ॒र्काश्वमे॒धावे॒वावरु॑न्धे। अथो
 अ॒र्काश्वमे॒धयो॒रेव॑ प्र॒ति॒तिष्ठ॑ति॥ [७८]

प्र॒जाप॑तिं वै दे॒वाः पि॒तरम्। प॒शुं भू॒तं मे॒धाया॑ल॒भन्ता॒ तमा॒लभ्यो॑पाव॒सन्।
 प्रा॒तर्य॑ष्टास्मह इति। ए॒कं वा ए॒तद्दे॒वाना॑महः। यथ्स॑व॒त्सरः॑। तस्मा॒दश्वः॑
 पु॒रस्ता॑त्स॒वत्सर॑ आल॒भ्यते॑। यत्प्र॒जाप॑तिराल॒ब्धोऽश्वो॑ऽभवत्। तस्मा॒दश्वः॑।
 यथ्स॑द्यो मे॒धोऽभवत्॥ [७९] तस्मा॒दश्वमे॒धः। वेदु॒कोऽश्व॑मा॒शुं भव॑ति। य ए॒वं वेद॑॥

यद्वै तत्प्रजापतिरालब्धोऽश्वोऽभवत्। तस्मादश्वः प्रजापतेः पशूनामनुरूपतमः॥
 आऽस्य पुत्रः प्रतिरूपो जायते। य एवं वेद॥ सर्वाणि भूतानि संभृत्यालभते।
 समेनं देवास्तेजसे ब्रह्मवर्चसाय भरन्ति। योऽश्वमेधेन यजते। [८०] य उ
 चैनमेवं वेद॥ एतद्वै तद्देवा एतां देवताम्। पशुं भूतं मेधायालभन्त। यज्ञमेव।
 यज्ञेन यज्ञमयजन्त देवाः। कामप्रं यज्ञमकुर्वत। तेऽमृतत्वमकामयन्त।
 तेऽमृतत्वमगच्छन्। योऽश्वमेधेन यजते। देवानामेवायनेनैति। [८१] प्राजापत्येनैव
 यज्ञेन यजते कामप्रेण। अपुनर्मरमेव गच्छति॥ एतस्य वै रूपेण
 पुरस्तात्प्राजापत्यमृषभं तूपरं बहुरूपमालभते। सर्वेभ्यः कामेभ्यः।
 सर्वस्याप्त्यै। सर्वस्य जित्यै। सर्वमेव तेनाप्नोति। सर्वं जयति। योऽश्वमेधेन
 यजते। य उ चैनमेवं वेद॥ [८२]

यो वा अश्वस्य मेध्यस्य लोमनी वेद। अश्वस्यैव मेध्यस्य
 लोमल्लोमञ्जुहोति। अहोरात्रे वा अश्वस्य मेध्यस्य लोमनी। यथसायं
 प्रातर्जुहोति। अश्वस्यैव मेध्यस्य लोमल्लोमञ्जुहोति। एतदनुकृति ह स्म वै
 पुरा। अश्वस्य मेध्यस्य लोमल्लोमञ्जुहोति॥ यो वा अश्वस्य मेध्यस्य पदे
 वेद। अश्वस्यैव मेध्यस्य पदेपदे जुहोति। दृशपूर्णमासौ वा अश्वस्य मेध्यस्य
 पदे। [८३] यद्दृशपूर्णमासौ यजते। अश्वस्यैव मेध्यस्य पदे पदे जुहोति।
 एतदनुकृति ह स्म वै पुरा। अश्वस्य मेध्यस्य पदेपदे जुहोति॥ यो वा अश्वस्य
 मेध्यस्य विवर्तनं वेद। अश्वस्यैव मेध्यस्य विवर्तने विवर्तने जुहोति। असौ वा
 आदित्योऽश्वः। स आहवनीयमागच्छति। तद्विवर्तते। यदग्निहोत्रं जुहोति।

अ॒श्व॒स्यै॒व मे॒ध्य॒स्य वि॒वर्त॑ने वि॒वर्त॑ने जुहोति। ए॒तद॑नु॒कृति॑ ह स्म॒ वै पु॒रा।
अ॒श्व॒स्य मे॒ध्य॒स्य वि॒वर्त॑ने वि॒वर्त॑ने जुह्वति॥[८४]

ॐ

USEFUL TEXT BOOKS FOR COLLEGE STUDENTS

*Text in Sanskrit with English Translation, Exhaustive Notes,
Model Questions etc.*

By. T.K. Ramachandra Aiyar, M.A., B.O.L.

BOOKS ON SANSKRIT PROSE

Rs. P.

बालारामायणम्-बाल-अयोध्या-आरण्यकाण्डाः-

A Simple Prose Version of Valmiki Ramayana retaining
the idioms of the original 30.00

Do किष्किन्धा सुन्दर-युद्धकाण्डाः- Part II 20.00

चन्दापीडचरितम् - The story of Bana's Kadambari
Concisely written, Text with Eng., Trans. 50.00

English Translation and Notes on Kadambari Sangraham-
Mahasveta Vritanta (Without Text) 25.00

Do Sukanasa Upadesa 20.00

मृच्छकटिक नाटक कथासंग्रहः 65.00

A short History of Sanskrit Literature - Covering
the whole range of Vedic, Sutras, Classical periods,
Maha Kavyas, Darsanas etc. 65.00

कुवलायानन्दः- श्रीमदप्पथ्यदीक्षित विरचितः (वृत्तिरहितः)

50 selected Alankaras with the commentary
"Samanvaya" in Sanskrit and English 35.00

लघुवृत्तरत्नाकरः- A Small Hand Book on 40 selected
commonly used classical metres with English
Notes and illustrations from Popular Kavyas for
the use of University Students. 25.00

A Guide to the Study of Comparative Philology with
special reference to Sanskrit 75.00

USEFUL TEXT BOOKS FOR COLLEGE STUDENTS

Text in Sanskrit with English Translation Exhaustive Notes, Model Questions etc.

By. T.K. Ramachandra Aiyar, M.A., B.O.L.

BOOKS ON SANSKRIT PROSE

रघुवंशमहाकाव्यम्-	
(दिलीपस्य वसिष्ठाश्रमगमनं नाम प्रथमः सर्गः)	30.00
Do दिलीपस्य नन्दिनीवरप्रदानं नाम द्वितीयः सर्गः	23.00
Do रघुदिग्विजयो नाम चतुर्थः सर्गः	35.00
Do अजस्वयंवराभिगमनो नाम पंचमः सर्गः	40.00
Do दण्डकाप्रत्यागमनो नाम त्रयोदशः सर्गः	25.00
नलोपाख्यानम् (श्रीमन्महाभारते वनपर्वणि अध्यायाः 50-54)	30.00
श्रीकृष्णविलासकाव्यम् - सुकुमारकवि विरचितम् 'विलासिनी'	
व्याख्या सहितो भूभारापनोदन प्रार्थना नाम प्रथमः सर्गः	20.00
Do बालक्रीडा वर्णनं नाम तृतीयः सर्गः	36.00
कुमारसंभवे उमोत्पत्तिः नाम प्रथमसर्गः	30.00
Do उमापरिणयो नाम सप्तमः सर्गः	30.00
किरातार्जुनीयम्-प्रथमः सर्गः	35.00
श्री मत्स्यमहाभारते आरण्यपर्वणि मक्षप्रश्नः	25.00
शिशुपालवधम् प्रथमः सर्गः	45.00

Books on Sanskrit Drama

दूतवाक्यम्	of Bhasa	35.00
कर्णभारम्	Do	35.00
स्वप्नवासवदत्तम्	Do	55.00
प्रतिमानाटकम्	Do	75.00
मध्यव्यायोगः	Do	30.00
उरुभंगम्	Do	30.00
नाधानन्धम्	60.00

R.S. VADHYAR & SONS, Palghat - 678 003

Ph: 2577513, 6450513. E-mail: ID rsvadhyar.sons@gmail.com

Ebenezer, Thrissur-12. Ph: 2360992

9112469